

Nsia yi Mbwe yi ósono **MATYE OSOMO**

Me Matye, muntolo-mpagha wu mu-Dzwife, mumõ mu binduono kwumu ya byele (12), áasono mukaana a Nsia yi Mbwe wu. Nde ásono mukaana wu kundaa ba-Dzwife ba baakasa kana mu Yiisu-Kriste. Ba-Dzwife bagyighili osoolo mikaana mi mili mu Ogwihini ku Okulu, ya Matye li mu osuo kundaa bo ti Yiisu li munde wu aagyí mu osa kuulu ti mi básono mu mikaana mimye mikeele. Mu kuulu, nde aakatarjana mye matala mwohonon. Mukaana wu, Matye ásono nde mu matala ma bábyi ba-Dzwife ba baakasa kana mu Yiisu mu manzo ma bo mama lisamana. Bo bási bimvununu bi bíkagyagha baara baala ka báli ba-Dzwife o. Matye li mu osuo ti Yiisu li Mfumu wu aakaluo ya litumu mu mi ookaluomo Nzaami kundaa babo ba bali a kana. Nde li mu osuo nzili yi nyaghara yi obaghala mikyene mi mili mu Ogwihini ku Okulu. Matye li mu osuo si ti Yiisu li si Mesi, Mubvwuhu wu ookakebe ba-Dzwife.

Nsia yi Mbwe yi ósono Matye yili mu onama ngughu a nzili oyo yi óbaala mukaana wu ósono Mareke. Munsa mukaana a nde, Matye bvughu mandagha ma Yiisu mu bangughu ba mikwughu mitaana: Mu bikaba kii bitaana tee kii nsama (5–7): Mukwughu ku yulu a munguo, li mukyene wu bumweẽ kundaa binduono bi Yiisu. Nde li mu otala minama ña kara li baara bo-a-bo ya ña

kara li baara ya Nzaami. Mukwughu wu ekaba kii kwumu (10): Mukwughu wu li mu osuo litumu ya maluo kunda babo ba bali mu okayitsala Nsia yi Mbwe. Mukwughu wu ekaba kii kwumu ya bitere (13): Mukwughu wu bvughu maluo ma Emfumu ki Mayulu mu mankumu nsaama. Emfumu ki Mayulu eli ki esweme, lo kye eli mu okamono epankala na mihi mi baara bwohono mu matala ma ótsyiri Nzaami. Mukwughu wu ekaba kii kwumu ya mpuomo (18): Mukwughu wu li mu osuo bumweẽ bu baara ba bafaana osomo mu Emfumu ki Mayulu. Mukwughu wu bikaba makwumu-mwolo ya bina ya makwumu-mwolo ya bitaana (24–25): Mukwughu wu bikaba makwumu-mwolo ya bina ya makwumu-mwolo ya bitaana li mu osuo bunu binduono bifaana okebe museene a Nzaami wu masini.

Bu me bu baakakaba mukaana wu:

- Bankagha-kwuru ba Yiisu: 1.1-17.
- Oburu ya bumwana bu Yiisu: 1.18–2.23.
- Maluo ma Dzã Muboghoru: 3.1-12.
- Oboghoru o Yiisu ya bigyeele kunda dyabulu: 3.13–4.11.
- Esala e Yiisu mu etsulu e nsie kii Ngalile (luo, gyihi ya dzuhu mampwumu ma baara): 4.12–18.35.
- Midzye mi Yiisu ku Yerusaleme: 19–20.
- Bitsughu bi Yiisu bibi masini ku Yerusaleme 21–28:
Mukakana wu lipfu,
Lipfu li nde,
Osighili o nde mu lipfu,
Omono o nde kunda baara.

*Musyi a dzumu li Yiisu**(Luk 3.23-38)*

¹ Musyi a dzumu li Yiisu-Kriste, Dabvide, li nkagha-kwuru a Yiisu, Abarahame li nkagha-kwuru a Dabvide.

² Abarahame áburu Idzake, Idzake áburu Dzakobe, Dzakobe áburu Yuda ya bambwee ya banaana ba nde ba babaghala.

³ Yuda áburu Faredze ya Dzara mu Tamare. Faredze áburu Eserõ, Eserõ áburu Arame.

⁴ Arame áburu Aminadabe, Aminadabe áburu Naasõ, Naasõ áburu Salamone,

⁵ Salamone áburu Bohese mu Rahabe. Bohese áburu Obede mu Rute, Obede áburu Yese,

⁶ Yese áburu mukogho Dabvide.

Dabvide áburu Salomõ mu mukala a Uri,

⁷ Salomõ áburu Roboame, Roboame áburu Abiya, Abiya áburu Adzafe,

⁸ Adzafe áburu Dzodzafate, Dzodzafate áburu Dzorame, Dzorame áburu Odzyase,

⁹ Odzyase áburu Yohatame, Yohatame áburu Akadze, Akadze áburu Edzekyase,

¹⁰ Edzekyase áburu Manase, Manase áburu Amose, Amose áburu Dzodzyase,

¹¹ Dzodzyase áburu Dzekonya ya bambwee ya banaana ba nde ba babaghala mu ena ki bábiribaara mu minsunughu ku Babilone.

¹² Na mbihi a na bábiribaara mu minsunughu ku Babilone, Dzekonya áburu Salatyete, Salatyete áburu Dzorobabele,

¹³ Dzorobabele áburu Abiwude, Abiwude áburu Elyakime, Elyakime áburu Adzore,

¹⁴ Adzore áburu Sadoke, Sadoke áburu Akime, Akime áburu Eliwude,

¹⁵ Eliwude áburu Eleyadzare, Eleyadzare áburu Matane, Matane áburu Dzakobe,

¹⁶ Dzakobe áburu Dzodzefe mulumu a Mari, me mu nde báburu Yiisu wu baakata Kriste.

¹⁷ Mu obo, mu obaana Abarahame tee Dabvide, biseene bili kwumu ya bina (14). Mu obaana Dabvide tee mu ena ki bábiri baara mu minsunughu ku Babilone, biseene bili kwumu ya bina (14). Ya mu obaana matala mamu tee etsughu ki báburu Kriste biseene bili kwumu ya bina (14).

*Oburu o Yiisu
(Luk 2.1-7)*

¹⁸ Bu me bu báburu Yiisu-Kriste: Ngughu a nde Mari áli mukaha wu ógwi Dzodzefe bilyimi. Lo nsomo bakala nzo mo, Mari ákeghele mu lileene li Mufulu a Ngili.

¹⁹ Dzodzefe mulumu a nde, áli mbwuru wu bunsumu. Ya nde bu ágwene odzyi otwuhu Mari budzwa ŋa mihi mi baara, nde ábagha bitsimi bii okahaba bala mu ensweghe.

²⁰ Mu matala ma ákabulutsimi nde obo, ngye-yulu a Mfumu áyamoŋono a nde mu nzolo ya ályele kundaa nde ti: «Dzodzefe mwana a Dabvide, ka bara nzalamweë mu ogwolo Mari, mukala a we mu nzo a we o. Mu kuulu, mu lileene li Mufulu a Ngili nde aakeghele*.

²¹ Nde sa aburu mwana wu baghala ya we sa gwa nde nkwumu Yiisu, mu kuulu nde sa abvwuhu baara ba nde mu masumu ma bo.»

²² Mandagha mwohono mamu mámoŋono mu kuulu mi ólyele Mfumu mu mubighili mikeele:

* **1:20 1.20** *aakeghele mbaala ti: aabagha yimi*

²³ «Mono, mutughu wu munkyini sa akeghele. Nde sa aburu mwana wu baghala, ya sa bata nde mu nkwumu yi a Emanwele.»

Mbaala ti: «Nzaami ŋa kara li bihi-a-be.»

²⁴ Bu asighili kunsu ensama, Dzodzefe ási bwunu a bu ótumu nde ngye-yulu a Mfumu, ya ágwolo mukala a nde álo nde mu nzo.

²⁵ Lo nde ka ábvughu mbughu ya Mari o, tee matala ma áburu nde mwana wu baghala wu ágwi nde nkwumu Yiisu.

2

Banga-a-mayele bayimono Yiisu (Luk 2.8-20)

¹ Báburu Yiisu ku Beteleeme, mu nsie yi a Yude, mu matala ma óli Erode mukogho. Mono, banga-a-mayele báfi ku ookapala tala, ya báyanto ŋa Yerusaleme.

² Ya bákabulufwulu ti: «Mukogho a ba-Dzwife wu baaburu kunu ali? Mu kuulu bihi liimono ŋomanomo a nde ku ookapala tala, ya bihi liigyí mu oyagwa nde baana.»

³ Mukogho Erode bu agyughu obo, nde ya baara ba Yerusaleme bwohono, mikolo mi bo míkala maã-maã.

⁴ Nde ábvughu bakwuru ba bangaa ba nzaami bwohono ya baluo-mikyene ba báli ŋa kara li ekaana, ya áfwulu bo kunu-ako bafaana oburu Kriste.

⁵ Ya bo bályele kundaa nde ti: «Ku Beteleeme, lili Yude, mu kuulu mubighili ásono bu:

⁶ «We Beteleeme, mu nsie yi a Yude,
We ka li ebvu-bvulu ŋa kara li mabvulu mama Yude o.

*Mu kuulu, me mu we akala oopala mfumu,
Wu aabiri Isaraye, baara ba me.»*

⁷ Mu obo, Erode bu ati banga-a-mayele mbili mu ensweghe, ásagha ogyighili ogyahaba kundaa bo munsá matala nomañomo aamonono.

⁸ Ya nde ágweghe bo ku Beteleeme ya ályele ti: «Ligye ligyighili ofwulu baara mu mi mitala mwana, ya be limana omono nde, liyalyele me, mu kuulu mehe si ngye yingwa nde baana.»

⁹ Bo bu bamana ogyughu mi ólyele mukogho, bágyene. Ya bo báfirimono nomañomo wu bámono bo ku ookapala tala, ákatswama ku nkulu a bo, tee ku áyitemene nde mu engye-angye ña ebini ki óli mwana.

¹⁰ Bu bamono nomañomo, bo básomo kunsá muyayaã wu alagha.

¹¹ Bu basomo munsá nzo, bámono mwana ya Mari, ngughu a nde. Bo bábwí masu mu nsie mu ogwa nde baana. Bádzubulu bimpogholo bi bo, ya bágwí nde bikaba: Oore, muyiri* ya mananaase mama miire†.

¹² Ña mbihi, Nzaami ágyehe bo mu nzolo, banyaã obvughuru kundaa Erode. Bo bábvughuru ku nsie a bo mu nzili nkimi.

Obara ku Edzipite

¹³ Banga-a-mayele bu babvughuru, ngye-yulu a Mfumu áyamonono kundaa Dzodzefe mu nzolo ya ályele nde ti: «Temene, gwolo mwana ya ngughu a nde, bara a bo ku Edzipite. Yikala oko tee mu matala ma akala aandyele me we ti

2:6 2.6 Mis 5.1 * **2:11 2.11** Malyimi ma baakatsughu mu ogwa mpihi yi mbwe † **2:11 2.11** miire mananaase mama ntala ya mama mpihi yi mbwe

bvughuru. Mu kuulu, Erode sa asagha mwana mu kuulu adzwa nde.»

¹⁴ Mu mpyibi gyini oyo, Dzodzefe átemene, ágwolo mwana ya ngughu a nde, ya áyisweme ku Edzipite.

¹⁵ Nde ákala oko tee matala ma ókpi Erode. Myehene mimye, mu kuulu mandagha ma ólyele Mfumu mu munjma a mubighili makeele:
«*Me aanti mwana a me mbili, apala mu Edzipite.*»

Odzwa ku biba-baana

¹⁶ Erode bu amono ti banga-a-mayele baapfiri nde, nde ákolo nkehe yi alagha. Ya nde ágweghe bambumbulu ku Beteleeme ya mu bitsulu bi nsie bi nde byehene, mu kuulu bayidzwa biba-baana bibi babaghala byehene bibi bamvulu buolo, ya ku nsie, embe-embe ya matala ma ólyele nde banga-a-mayele.

¹⁷ Onjo me ŋa ótswughu ndagha yi ólyele mubighili Dzeremi ti:

¹⁸ «*Likiyi li lili mu ofa ku Rama,
Likiyi li bilili ya minyoõ mi milagha.
Rasyele li mu olili baana ba nde.
Ya nde aabihi babuono nde, mu kuulu baana ba
nde ka baafirisyili o.*»

Obvughuru ku Isaraye

¹⁹ Erode bu akpi, ngye-yulu a Mfumu áyimonono kundaa Dzodzefe mu nzolo ku Edzipite,

²⁰ ya ályele kundaa nde ti: «Temene, gwolo mwana ya ngughu a nde, ya bvughuru ku nsie yi

a Isarayeले, mu kuulu babo ba baakasagha odzwa mwana baakpi».

²¹ Dzodzefe átemene, ágwolo mwana ya ngughu a nde, ya ábvughuru ku nsie yi a Isarayeले.

²² Lo nde bu agyughu ti Arakelaose† li mu okatumu nsie a Yude ña ebini e taara a nde Erode, Dzodzefe ámono nzalamweẽ mu ogye oko. Nzaami bu agyehe nde mu nzolo, nde áyisweme ku bitsulu bi nsie bibi ku Ngalile.

²³ Bu ato, nde áyikala mu bvulu lili Nadzarete, mu kuulu mandagha ma ólyele mibighili magye mu mana: «Sa balyele nde ti nde musi Nadzarete.»

3

Maluo ma Dzã Muboghoru

(Mar 1.1-8; Luk 3.1-18; Dzã 1.19-28)

¹ Mu bitsughu bibye, Dzã Muboghoru ámonono ku syehe lili Yude, ákabuluta mukwughu wu:

² «Ligiyinji mayele, mu kuulu Emfumu ki Mayulu eebehene!»

³ Wu me munde wu ókabighili mubighili Edzayi, ña ályele ti:

«Likyi li munde wu li mu okakehe engumbu ku syehe:

Ligyighili nzili a Mfumu,

lisa mankwulu ma nde makala nsumu!»

⁴ Dzã, áli a enkuru ki bátwu mu mfu a nyama wu a nkwumu syamo, ya ákuru musili wu a mu

† 2:22 2.22 mwana a Erode. Nde ágyinji ña ebini e taara a nde. Empu e nde ébaana bamvulu bana nsomo baburu Yiisu ya egyili bamvulu nsaama ña mbihi a ña báburu Yiisu.

nkobo a nyama mu bala li nde. Nde ákabuludza bansense ya nyunju wu ebiri.

⁵ Baara baba Yerusaleme, baba Yude lwohono, ya baba etsulu e nsie kyehene kii Dzurudě, bákagye kundaa nde,

⁶ ya nde ákaboghoru bo mu nzala yi a Dzurudě bu bákakihi masumu ma bo ŋa mihi mi baara bwohono.

⁷ Bu amono ba-Faridzyě balagha ya ba-Saduseyě ba bákagya kundaa nde mu kuulu nde aboghoru bo, nde ályele kundaa bo ti: «Etswumu ki bampili! Nande aasuo be bu liibara nkehe a Nzaami yili mu ogya?

⁸ Liikasuo mu bigyighili ti be liigyinji mayele.

⁹ Ya ka likakala a bitsimi bi mu beme o ti: “Taara a bihi Abarahame!” Mu kuulu, me ndyele be ti: Nzaami kughu okirili mameě ma makala baana kundaa Abarahame!

¹⁰ Ekwu ayi baatwulu mu otsyiri midza mi miti. Mu obo, nswe muti wu aagwene okaburu bimburu bi bibwe, sa bakpaa nde ya batsili nde ku mbaa.

¹¹ Me ndi mu okaboghoru be mu madza mu nkooro a ogyinji mayele. Lo munde wu li mu ogya ŋa mbihi a me, bvulu me mpini, me ka nkughu onyana misyi mi bikoghoru bi nde o. Nde sa aboghoru be mu Mufulu a Ngili ya mu mbaa.

¹² Nde li a nkwogho yi mampala ŋa kwogho e nde mu okabala bimburu ya bisagha, sa akwomo mbala a nde, sa akwu bimburu bi bele bi nde kunsu etaghala, lo sa atsughu bisagha ku mbaa yi aagwene okadzimi.»

Oboghoru o Yiisu
(*Mar 1.9-11; Luk 3.21-22*)

¹³ Na mbihi oño, Yiisu fi ku Ngalile, gyi ku Dzurudē kundaa Dzã mu kuulu aboghoru nde.

¹⁴ Lo Dzã ka ákadzyi o, ya ályele kundaa nde ti: «Me ndi a nzala ati baboghoru me kundaa we, lo we firigya kundaa me!»

¹⁵ Yiisu ábvuhulu kundaa nde ti: «Mu matala ma, nyaã okala obo. Mu kuulu ofaana okala obo kundaa bihi a we mu kuulu likuhu myehene mi ookatumu Nzaami.» Oño Dzã ákihi.

¹⁶ Bu basaaboghoru nde, ñaana oño Yiisu ápala mu madza. Ya mono, mayulu mádzubulu kundaa nde, ya nde ámono Mufulu a Nzaami mu okayakumu ti beeme, ya gyi ña yulu a nde.

¹⁷ Ya ndagha yífi mu mayulu ya yílyele ti: «Wu me Mwana a me wu mukolo. Mu nde me aankamono esee.»

4

Dyabulu gyeele Yiisu
(*Mar 1.12-13; Luk 4.1-13*)

¹ Na mbihi oño, Mufulu ábiri Yiisu ku syehe, mu kuulu dyabulu gyeele nde.

² Yiisu bu akuru nswele mu bala mu bitsughu makwumu mana (40) ya mampyibi makwumu mana (40), ku masini, nzala yífuru nde.

³ Nga-a-bigyeele áyasele ya ályele kundaa nde ti: «Kala ti we li Mwana a Nzaami, sa ti mameẽ ma makighiri mampa.»

⁴ Lo Yiisu ábvuhulu kundaa nde ti: Básono ti: *Mbwuru ka akala mweẽ yini a mu mampa o, lo mu*

mandagha mwohono ma maakapala mu munjma a Nzaami.

⁵ Onjo dyabulu ábiri nde ku Yerusaleme, bvulu lili ngili, átwulu nde ku yulu a nsweē a Nzo a Nzaami,

⁶ ya ályele kundaa nde ti: Kala ti we li Mwana a Nzaami, bwa ku nsie, mu kuulu básono ti:
Nde sa agwa litumu kundaa bangye-yulu ba nde mu nkooro a we,

ya bo sa bagyagha we mu myaã mi bo, mu kuulu kwulu e we enyaã okubu limeē.

⁷ Yiisu ábvuhulu kundaa nde ti: Básono si ti: *Ka agyeele Mfumu Nzaami a we o.*

⁸ Dyabulu áfiribiri nde ku yulu a munguo wu a nkara mutele. Nde ásuu nde bimfumu bi nsie byehene ya nsia a bye,

⁹ ya ályele kundaa Yiisu ti: «Me sa ngwa we bilogho byehene bi, kala ti we kunu mabuo ŋa nkulu a me mu ogwa me baana.»

¹⁰ Mu obo Yiisu ályele kundaa nde ti: «Satana, mara ŋa bele a me! Mu kuulu básono ti: *We Mfumu Nzaami a we faana obuono, ya yini a nde we faana osamana*».

¹¹ Onjo dyabulu ányaã nde, ya mono, bangye-yulu báyabehene ya nde ya bábaana osalala nde*.

*Yiisu baana esala e nde ku Ngalile
(Mar 1.14-15; Luk 4.14-15)*

¹² Yiisu bu agyughu ti baalo Dzã mu boloko, nde ágyene ku Ngalile.

4:6 4.6 Bik 91.11-12 **4:10 4.10** Det 6.13 * **4:11 4.11** mbaala ti: ogwa nde bilogho bi-odza.

¹³ Nde ásihi Nadzarete ya áyikala ku Kapere-nawume, mu bele a mubu, mu etsulu e nsie kii Dzabulõ ya Nefetali,

¹⁴ mu kuulu mandagha ma ólyele mubighili Edzayi makeele:

¹⁵ *Etsulu e nsie kii Dzabulõ, etsulu e nsie kii Nefetali,*

*nzili yi a mubu, ku ngulu a Dzurudẽ,
Ngalile lili baara baala ka bali ba-Dzwife o!*

¹⁶ *Baara ba báli kunsu mpyibi yi a laŋa-laŋa,
baamono otsyeme ku onene,
ya kunda babo ba bali kunsu edzwunu kii lipfu,
otsyeme omoŋono!*

¹⁷ Obaana matala mamo, Yiisu ábaana oluo ya ákabululyele ti: «Ligiŋi mayele mu kuulu Emfumu ki Mayulu eeyabehene!»

*Binduono bi Yiisu bina bibi nsomo
(Mar 1.16-20; Luk 5.1-11)*

¹⁸ Bu ákabuludzye mu mukogho a mubu a Ngalile, Yiisu ámono baana buolo ba taara mumõ, Simõ wu baakata ti Piere ya Andere mbwee a nde, mu okatere likoho mu mubu, mu kuulu bo báli bilebe banswi.

¹⁹ Nde ályele kunda bo ti: «Linama me, ya me sa nsa be bilebe baara.»

²⁰ Naana oŋo, bo basaabulunyaã nkoho a bo, ya banama nde.

²¹ Bu afirisehe ŋa nkulu, nde áfirimono baana buolo bakimi ba taara mumõ: Dzake ya Dzã, baana ba Nzebede ba babaghala munsu bwara bu bunene. Bo báli ya taara a bo Nzebede mu okagyighili nkoho. Yiisu áti bo mbili.

²² Naana oŋo, bo básaabulunyaã bwara bu bunene ya taara a bo ya bánama nde.

Yiisu luo ya dzuhu babyele

²³ Yiisu ákabulugye mu etsulu e nsie kii Ngalile kyehehe, mu okabululuo munsa manzo mama lisamana ma ba-Dzwife, ya ákabulutsala Nsia yi Mbwe yi a Emfumu. Nde ákabuludzuhu mabyele mwohonono ya bipfwumu byehene ŋa kara li baara.

²⁴ Nsia a nde yítsanama mu Siiri lwohonono. Ya bákayabiri kundaa a nde baara bwohonono ba báli a mabyele mama mawa-mawa ya ba bákamono mpara: banga a mifulu mi mibi, banga a nzyere, ba ópki binama, ya nde ákadzuhu bo.

²⁵ Ya mampwumu ma baara ma máfi ku Ngalile, ku etsulu e nsie kii mabvulu-kwumu, ku Yerusaleme, ku Yude, ya ku ngulu a Dzurudě, mábwi onama nde.

5

Maluo ma Yiisu ŋa yulu a munguo

(Mar 3.13; Luk 6.12-13)

¹ Yiisu bu amono mampwumu ma baara, ákumu ku yulu a munguo, ya bu abwi nsini, binduono bi nde bísele kundaa nde.

² Bu atsughu ndagha, nde ábwi oluo ya olyele bo ti:

Esee kii nganma

(Luk 6.20-23)

³ «Esee kundaa bawele mu Mufulu, mu kuulu Emfumu ki Mayulu eli kii ndaa bo!

⁴ Esee kundaa ba bali mu okalili,

mu kuulu Nzaami sa abuono bo!

⁵ Esee kundaa babo ba bali badzuunu,
mu kuulu bo sa babagha pfa li nsie yi ósiini a bo
Nzaami!

⁶ Esee kundaa babo ba bali a nzala ya nyoro a
bunsumu,
mu kuulu bo sa bagyughuru!

⁷ Esee kundaa babo ba baakamono bana nyĩ,
mu kuulu sa bamono bo si nyĩ!

⁸ Esee kundaa babo ba bali a mikolo mimi tse-
tsee,
mu kuulu bo sa bamono Nzaami!

⁹ Esee kundaa babo ba baakasa ti edzuunu ekala,
mu kuulu sa bata bo baana ba Nzaami!

¹⁰ Esee kundaa babo baala bali mu okamwehẽ bo
kimini mu nkooro a bunsumu,
mu kuulu Emfumu ki Mayulu eli kii ndaa bo!

¹¹ Esee kundaa be kala ti baara batughu be,
bamwehẽ be kimini, ya babili mandagha
mwohono ma mabi mama mpya mu be, mu
nkooro a me.

¹² Likala a emiini ya likala kunsa muyayaã! Mu
kuulu mufuru a be mu mayulu li munene. Me
obo si bákamwehẽ mibighili mi mítswama nsomo
ya be kimini.»

Mungba ya otsyeme o nsie
(Mar 9.50; Luk 14.34-35)

¹³ «Be lili munbga a nsie. Lo, kala ti munbga ka
afirisyili a ese o, lo mu ema bakughu ofiribvurulu
nde kye? Lo nde ka afirisyili a esala o. Bafaana
otsili nde ku mbala ya baara badzyara nde.

¹⁴ Be lili otsyeme o nsie nsyini. Bvulu li bátwu
ṇa yulu a munguo ka likughu osweme o.

¹⁵ Ka baakanahaba mwindi ya bafughu nde nkuru o, lo baakatwulu nde ŋa yulu a ebini ki baakwulu mwindi, ya nde aakagwa otsyeme kundaa baara bwohono ba bali munsa nzo.

¹⁶ Mu obo, nyaã otsyeme o be omoŋono ŋa mihi mi baara bwohono, mu kuulu bo bamono bigyighili bi be bi bibwe, ya basyighi Taara a be wu li mu mayulu.»

Maluo mu mi mitala Mikyene

¹⁷ «Ka litsimi o ti me aangyi mu oyatsala Mikyene mi Moyidze bwunu we maluo ma mibighili. Me ka aangyi mu otsala o, lo mu osa kuulu ti mye mikeele.

¹⁸ Mu enganma me ndyele kundaa be ti, tee mu matala ma ooluru yulu ya nsie, lo ti esono kii nkwwumu i, bwunu we empi-mpiri ki esono nga-emō, ka bamaha kye mu Mikyene o, tee ŋa ookeele mandagha mwohono.

¹⁹ Mu obo, nswe munde wu aatsala mukyene si mumō mu mi mibvulu busala mi, ya luo baara mu osa bumō, sa bata nde wu bvulu busala mu Emfumu ki Mayulu. Lo munde wu aasalala mye ya aaluo mye, sa balyele ti nde mbwuru wu munene mu Emfumu ki Mayulu.

²⁰ Me ndyele kundaa be ti, kala ti bunsumu bu be ka bubvulu bubu ndaa baluo-mikyene ya bubu ndaa ba-Faridzyē o, lo be akala ka lisomo mu Emfumu ki Mayulu o.»

Maluo mu mi mitala nkehe

21 «Be áli liigyughu bályele kundaa bakwuru ti: “Ka dzwa o”^{*}. Munde wu aadzwa bafaana osa nde muyala.

22 Lo me, me ndyele kundaa be ti: Nswe munde wu aakolo nganda-mbwuru a nde nkehe, bafaana osa nde muyala. Munde wu aalyele nganda-mbwuru a nde ti: “Ewulu!” Bafaana osa nde muyala kundaa Ekwuru ki ba-Dzwife[†]. Munde wu aalyele ti: “Nga-a-lala!” Lo bafaana otubu nde ku mungele a mbaa.

23 Lo kala ti we li mu ogwa ekaba ña ebini ki baakagwa bikaba, ya we libili mweë ti nganda-mbwuru li a ndagha ya we,

24 lo nyaã ekaba e we oño, matswama yigwihini ya nde, ña nseele sa yabvughuru ya gwa ekaba e we.

25 Sa maswa mu ogwihini ya mbwuru wu li-ibanana ya we, ñaala be ya nde nkini lili mu nzili. Kala pele, nde sa atyeghe we kundaa nsughu a lamana, nsughu a lamana sa agwa we ña myaã mi bambumbulu, ya bambumbulu sa balo we munsá boloko.

26 Mu enganma me ndyele kundaa we ti: We ka apala omo o, tee ña aamana ofiri we mupara wu masini mu ebyimi ki li a we.»

Maluo mu mi mitala bukala

27 «Be áli liigyughu bályele ti: “Ka bvughu mbughu ya mulumu bwunu we ya mukala a nganda-mbwuru o.”

^{*} 5:21 5.21 Opala 20.13; Deteronome 5.17 † 5:22 5.22 emvujunu ki bakwuru ba ba-Dzwife ba bákalamana mandagha 5:27 5.27 Opa 20.14; Det 5.18

²⁸ Lo, me ndyele kundaa be ti: Nswe mbwuru wu aatala mukaha ya sughu mukolo mu nde, nde maabvughu mbughu ya nde munsa mukolo a nde.

²⁹ Kala ti lihi li we lili ku ngo-kwogho liikabwihi we mu masumu, sogholo lo ya tsili lo la ya we. Mu kuulu, obvulu bubwe kundaa we mu opfihili esighi emõ mu bisighi bi nyuru a we, ya banyaã otsili nyuru a we yohono ku mungele a mbaa.

³⁰ Kala ti ngo-kwogho e we eekabwihi we mu masumu, tsyiri kye ya tsili kye la ya we. Mu kuulu, obvulu bubwe kundaa we mu opfihili esighi emõ mu bisighi bi nyuru a we, mu kuulu nyuru a we yohono yinyaã ogye ku mungele a mbaa.»

Maluo mu mi mitala odzwa bala
(*Mat 19.9; Mar 10.11-12; Luk 16.18*)

³¹ «Báfirilyele si ti: “Kala ti mbwuru byi mukala a nde, lo agwa nde mukaana wu ookpi bala.”

³² Lo me, me ndyele kundaa be ti: “Nswe munde wu aabyi mukala a nde, kala ti ka oli mu nkooro a enkwunu o, lo nde sa atsiini nde mu obwa mu bukala. Ya kala ti mbwuru kye mukaha wu baabyi ku bala, lo nde bwi mu bukala.”»

Maluo mu mi mitala olaba mikihi

³³ «Be áli líifirigyughu bályele kundaa bakwuru ti: “Ka laba mukihi wu a mpya o, lo we faana ogyighili ndagha yi álaba we mukihi kundaa Mfumu”.

³⁴ Lo me, me ndyele kundaa be ti, si okala a bunu, ka likalaba mukihi o, ngu okala mu nkwumu a yulu, mu kuulu lilo likubu li Nzaami.

³⁵ Ngu okala mu nkwumu a nsie, mu kuulu yo yili ebini ki ookatwulu Nzaami myili, ngu okala mu nkwumu a Yerusaleme. Mu kuulu lo lili bvulu li Mukogho wu Munene.

³⁶ Ka laba mukihi mu mutswi a we si o, mu kuulu we ka kughu osa ti lifu si limō lipenjeme bwunu we lipyini o.

³⁷ Nyaã mbiili a we yikala kala “heẽ” lo “heẽ”, kala “pele”, lo “pele”. Mandagha mwohonono ma baakabwehe ŋa yulu kundaa Nga-a-bubi maakafa.»

*Maluo mu mi mitala obvurulu etere
(Luk 6.29-30)*

³⁸ «Be áli liigyughu bályele ti: “Lihi mu lihi, ya lyini mu lyini”.

³⁹ Lo me, me ndyele kundaa be ti: Kala ti mbwuru si be bubi, ka libvurulu nde etere o. Lo, kala ti mbwuru kaha we limpala mu tama lili ku ngo-kwogho, taama nde si tama li like.

⁴⁰ Kala ti mbwuru dzyi osa we mumfwunu mu kuulu agwolo enkuru e we kii butulu, gwa nde si enkuru e we ki ela kii kobo.

⁴¹ Kala ti mbwuru si we enkwili mu odzyara mankpaa pfwunu (1 000) mu myili ya nde, lidz-yara mapfwunu mwolo (2 000) ma mankpaa ya nde.

⁴² Gwa kundaa munde wu aaluomo we. Kundaa munde wu dzyi osuomo kundaa we, ka bihi o.»

Odzyi mitaara
(Luk 6.27-28,32-36)

⁴³ «Be áli liigyughu bályele ti: “Dzyi nganda-mbwuru a we ya bele mutaara a we.”

⁴⁴ Lo me, me ndyele kundaa be ti: Liikadzyi mitaara mi be, ya liikasamana mu babo ba baakamwehẽ be kimini.

⁴⁵ Me obo be liikala baana ba Taara a be wu li mu mayulu, mu kuulu nde aakapaha tala li nde mu baara ba babwe ya ba babi. Ya aakanohõ mvulu mu banga-a-bunsumu ya mu ba bagwene a bunsumu.

⁴⁶ Mu obo, kala ti be okadzyi yini a ba baakadzyi be, nsa mufuru be liibagha? Mintolompagha ka oli bumõ mye si miikasa o?

⁴⁷ Ya kala ti be mboro okagwa yini a kundaa bankele ba be ba babaghala ya ba bakaha, lo nsa ndagha yi okinjimi be liikagyighili? Baala ka bali ba-Dzwife o, bo ka baakasa bumõ o?

⁴⁸ Be me baala likala baara ba bakughu, ti bu oli Taara a be mukughu mu mayulu.»

6

Maluo mu mi mitala ogwa bikaba kundaa bawe

¹ «Lisa mayele mu ogwene osuo bunsumu bu be ña mihi mi baara mu nzala a omonono kundaa bo. Kala pele, be ka libagha mufuru kundaa Taara a be wu li mu mayulu o.

² Mu matala ma aakakaba we kundaa bawele, ka fulu mvulu-a-mvulu o, ti bu ookasa bampibi* mu manzo ma lisamana ma ba-Dzwife, ya mu manzili, mu kuulu baara basyighi bo. Mu enganma, me ndyele kundaa be ti: Bo áyi babagha mufuru a bo.

³ Lo we, mu matala ma aakakaba we kundaa bawele, kwogho e we kii engbambogho enyaã osoolo mi ookasa ngo-kwogho e we,

⁴ mu kuulu ekaba e we ekala kii ensweghe, ya Taara a we wu aakamono mu ensweghe, sa abvurulu we kye.»

*Maluo mu mi mitala lisamana
(Luk 11.2-4)*

⁵ «Ŋa liikasamana be, ka likakala ti anga bampibi ba baakadzyi okasamana mu mukiri mu manzo mama lisamana mama ba-Dzwife o, ya mu mapfulu ma minsagha, mu kuulu baara bamono bo. Mu enganma, me ndyele be ti: Bo áyi babagha mufuru a bo.

⁶ Lo we, mu matala ma dzyi we osamana, somo munsa ngwumu a we, dzughubu munma a nzo, ya samana Taara a we mu ensweghe. Ya Taara a we wu aakamono mu ensweghe sa agwa we mvuru.»

Bu lifaana okasamana

⁷ «Mu matala ma liikasamana be, ka likapaha mandagha malagha o ti bu ookasa baala ka bali

* **6:2 6.2** Bampibi baara banga-a-bifa byele, ku mbala bo baaka-suo efa ekimi, ki ebwe, lo kunsu mukolo a bo bitsimi bikimi, bi bibi. Bo bali baara banga a mpya

ba-Dzwife o, ba baakatsimi ti Nzaami sa agyughu bo kala ti babili ku olagha.

⁸ Ka likapaha mandagha malagha ti bo o. Nzaami a be soolo bi lili a be nzala bye nsomo be liluomo.

⁹ Mu obo, be lifaana okasamana bu:

“Taara a bihi wu li mu mayulu!

Nyaã nkwumu a we yikala yi a ngili.

¹⁰ Nyaã emfumu e we egya,
nyaã dzyi li we likala ña nsie ti bu oli ku yulu.

¹¹ Gwa bihi lolo li, bi-odza bi bihi bibi nswe etsughu.

¹² Sa bubi bu bihi kolokolo,
ti bu liikasa bihi si kolokolo kundaa babo ba baakasa bihi bubi.

¹³ Ka nyaã bihi libwa mu bigyeele o,

Lo kwulu bihi mu bubi.”

[Mu kuulu emfumu, lileene ya nsia bili bibi we,
mu mibvu nswe mibvu. Aamene.]»

¹⁴ «Kala ti be lisi bubi bu baara kolokolo, Taara a be wu li ku mayulu sa asa be si kolokolo.

¹⁵ Lo, kala ti be ka lisi baara kolokolo o, Taara a be si ka asa masumu ma be kolokolo o.»

Maluo mu mi mitala okuru nswele mu bala

¹⁶ «Ña liikakuru be nswele mu bala, ka likakala a bidzili bibi nyĩ o, ti bu ookasa bampibi. Bidzili bi bo biikakighiri mu kuulu bagyighili osuo kundaa baara ti bo baakuru nswele mu bala. Mu enganma, me ndyele kundaa be ti: Bo áyi bábagha mufuru a bo.

¹⁷ Lo we, ña aakakuru we nswele mu bala, aakaswagha busu bu we, ya aakagyogho mutswi a we mananaase.

¹⁸ Mu kuulu nyaã omoŋono kundaa baara ti we aakuru nswele mu bala, ya Taara a we wu aakamono mu ensweghe, sa agwa we mvuru.»

Busini bubu ku yulu
(Luk 12.33-34)

¹⁹ «Ka likakwu busini mu beme ŋa nsie yi o, mu kuulu minkeghere ya bansiele biikabyihi bo, ya banga-a-pfyibi baakabulu bidzughubu ya baakaturu.

²⁰ Lo liikakwu busini bu be ku yulu, oko kuulu minkeghere ya bansiele ka biikabyihi bo o, ya banga-a-pfyibi ka baakabulu bidzughubu ya baakaturu o.

²¹ Mu kuulu ŋa oli busini bu we, me oŋo si ŋa ookala mukolo a we.»

Lihi lili mwindi a nyuru
(Luk 11.34-36)

²² «Lihi lili mwindi a nyuru. Kala ti lihi li we lili nsili, lo nyuru a we yohono sa yikala kunsa otsyeme.

²³ Lo, kala ti lihi li we libyele, lo nyuru a we yohono sa yikala kunsa mpyibi. Kala ti otsyeme ku oli mu we oli ti mpyibi, lo mpyibi oyo yili nkara yi a laŋa-laŋa.»

Nzaami bwunu we nzi
(Luk 16.13)

²⁴ «Ka oli a mbwuru wu kughu osalala bamfumu buolo o. Mu kuulu nde sa abele mumõ ya sa adzyi wu muke, bwunu we nde sa anabara mu mumõ ya sa atsaala wu muke. Be ka likughu osalala Nzaami emõ ya Nzi o.»

Osa kana mu Nzaami
(Luk 12.22-31)

²⁵ «Mu obo me ndyele kundaa be ti: Ka likanyoõ mu nkooro a laama li be o, mu mi mitala bi liidza, bwunu we bi liinjma, ya mu nkooro a nyuru, mu bi liilaha. Laama ka libvulu mupfunu ya bi-odza o? Ya nyuru ka yibvulu binkuru o?

²⁶ Litala banjmini ba yulu: Bo ka baakakunu o, ya ka baakatolo o, bo ka baakakwu mu bitaghala o, ya Taara a be wu li ku yulu, aakabununu bo. Lo bunu, be ka libvulu bo mupfunu o?

²⁷ Nande ña kara li be kughu obwehe bitsughu mu laama li nde mu minyoõ?»

²⁸ «Mu emakye be lili mu okabulunyoõ mu nkooro a binkuru? Litala bu ookamene bifulu mu ebiri: Bye ka biikasala o, ya ka biikatwu biko o.

²⁹ Me ndyele kundaa be ti: Si kala Salomõ ndeme, kunsá nsia a nde yo yohono, ka ábululaha enkuru ki ebvulu bubwe ti efulu nga-emõ mu bye o.

³⁰ Kala ti Nzaami aakalaha bisagha bibi manseghe obo, biili lolo li bye bili, ya mbala-tsughu sa batsili bye ku mbaa, lo bunu, nde ka kughu obvululaha be o, baara baala kana li lisala?

³¹ Ka likakala a minyoõ ya ka likabulubili o ti: “Emakye liidza? Bwunu we emakye liinjma? Bwunu we emakye liilaha?”

³² Mu kuulu bye byehene bibye, baara bwohono ba bagwene osoolo Nzaami baakabulusagha bye ku ogwene a okolo. Taara a be wu a ku yulu soolo ti be lili a nzala a bilogho byehene bibye.

³³ Nsomo, litswama sagha Emfumu e Nzaami ya bunsumu bu nde, sa babwehe be bye byehene bibye ŋa yulu.

³⁴ Mu obo, ka likakala a minyoŋ o mu mi mitala etsughu kii mbala, mu kuulu etsughu kii mbala sa ekala a minyoŋ mu kyeme. Nswe etsughu eli ya mpara a kye.»

7

Ka likalamana banganda-baara o (Luk 6.37-38,41-42)

¹ «Ka likalamana o, mu kuulu banyaã olamana be si.

² Mu kuulu, bwunu a bu liikalamana be banganda-baara, me bwunu obo si akala baalamana be, ya eteese ki liikateese be banganda-baara, me mu kyini ekye si akala baateese be.

³ Mu emakye we li mu okatala lisele li lili mu lihi li nganda-mbwuru a we, lo we ka li mu okamono mubaa wu li mu lihi li weme o?

⁴ Bwunu we, bunu we kughu olyele kundaa nganda-mbwuru a we ti: “Nyaã me maha lisele mu lihi li we”, ŋaala weme li a mubaa mu lihi li we?

⁵ Mpibi, matswama maha mubaa mu lihi li weme, ya we bu gyighili omono, we sa bagha bu omaha lisele mu lihi li nganda-mbwuru a we.»

⁶ «Ka ligwa bilogho bibi ngili kundaa bambwa o, ya ka litsili nsia kundaa bangubulu o, kala pele, bo sa badzyara yo, ya bo bakaala mihi kundaa be, bakaghala be.»

*Oluomo, osagha ya okoboro**(Luk 11.9-13)*

⁷ «Liluomo, ya sa bagwa be, lisagha, ya be sa libagha, likoboro, ya sa badzubulu be,

⁸ mu kuulu, nswe munde wu aakaluomo, baakagwa nde, wu aakasagha aakabagha, ya baakadzubulu kundaa munde wu aakakoboro.

⁹ Nande ŋa kara li be kughu ogwa mwana a nde limeẽ, kala ti nde luomo limpa?

¹⁰ Bwunu we, kala ti nde luomo nswi, nde gwi nde ntaala?

¹¹ Kala ti be baara ba babi lisoolo ogwa bilogho bi bibwe kundaa baana ba be, lo Taara a be wu li ku mayulu, bunu akughu ogwene ogwa bilogho bi bibvulu bubwe kundaa babo ba baaluomo nde bye?»

¹² «Mu obo, myehene mi lidzyi ti baara basa mu be, be si lisa bumõ mu bo. Mu kuulu, mimye me Mikyene mi Moyidze ya Mibighili.»

*Muŋma a nzo wu asala**(Luk 13.24)*

¹³ «Lisomo mu muŋma a nzo wu asala, mu kuulu muŋma a nzo wu munene ya nzili yi nene biikabiri ku obyihili ya baara balagha baakasomo mu yo.

¹⁴ Muŋma a nzo li asala, ya nzili yi aakabiri ku laama yili yi aaswele, ya babo ba baakamono yo ka bali balagha o.»

*Mibighili mimi mpya**(Luk 6.43-44)*

¹⁵ «Lisa mayele mu mibighili mimi mpya! Mye mili mu okagya kundaa be mu efaana ki

bindoomo, lo kunsu kara mye mili bango baba nsihi.

¹⁶ Be sa ligyahaba mye mu bigyighili bi bo. Mu munsene-a-nsene ka bakughu oka bimburu bi bviini o, bwunu we mu mungaama ka bakughu oka mburu a finge* o.

¹⁷ Muti wu mubwe aakaburu bimburu bi bibwe, ya muti wu mubi, aakaburu bimburu bi bibi.

¹⁸ Muti wu mubwe ka kughu oburu bimburu bi bibi o, ya muti wu mubi ka kughu oburu bimburu bi bibwe o.

¹⁹ Nswe muti wu aagwene oburu bimburu bi bibwe, nde wu okpaa ya wu otsili ku mbaa.

²⁰ Me mu obo, be sa lisoolo mibighili mu bimburu bi bo.»

Binduono bibi nganma
(Luk 13.25-27)

²¹ «Ka oli nswe munde wu aakalyele kundaa me ti: “Mfumu, Mfumu!” Aasomo mu Emfumu ki Mayulu o, lo munde wu aakagyighili waa li Taara a me wu li mu mayulu.

²² Mu etsughu ekye, baara balagha akala baalyele kundaa me ti: “Mfumu, Mfumu, bihi ka likabighili mu nkwumu a we o? Bihi ka likabyi mifulu mi mibi mu nkwumu a we o? Bihi, ka likasa bimamaã mu nkwumu a we o?”

²³ Ono me sa ndyele kundaa bo ti: “Me ka nsoolo be si mu tala limõ o! Limara ña bele a me, be ba liikasa bubi!”»

* **7:16 7.16** Finge mburu a muti yifaana a kunu ti anga manga, kunu ti anga mayighi. **7:23 7.23** Bik 6.9

*Nkumu yi manzo mwolo**(Luk 6.47-49)*

²⁴ «Mu obo, nswe mbwuru wu aagyughu mandagha ma ndyele me ma ya salala mo, nde li efaana kii baghala nga-a-mayele wu aatwu nzo a nde ɲa yulu a limeẽ.

²⁵ Mvulu bu anoõ, ndwuru yigyi, efulu egyi ya enyihi nzo oyo, lo yo ka yibwi o, mu kuulu batwu bitsini bi nzo oyo ɲa yulu a limeẽ.

²⁶ Lo nswe wu aagyughu mandagha ma me ma, ya ka asalala mo o, nde li ti baghala wu ewulu wu aatwu nzo a nde ɲa yulu a dzyele.

²⁷ Mvulu bu anoõ, ndwuru yi gyi, efulu egyi ya enyihi nzo oyo. Nzo yibwi, ya yisaatsanama.»

Yiisu kabululuo ya litumu

²⁸ Ankoho, mu matala ma ómana Yiisu oluo mandagha mamu, mampwumu ma baara mákinjimi mu maluo ma nde,

²⁹ mu kuulu nde ka ákaluo ti bu ookaluo baluo-mikyene o, lo nde ákaluo ti mbwuru wu li ya litumu.

8

*Yiisu dzuhu nga-a-buala**(Mar 1.40-45; Luk 5.12-16)*

¹ Mu matala ma ófi Yiisu ku yulu a munguo, mampwumu ya mampwumu ma baara máyanama nde.

² Ya, nga-a-buala mutsyini áyasele kundaa nde, ya ákunu mabuo mu nsie ɲa nkulu a nde ya ályele nde ti: «Mfumu, kala we dzyi, lo we kughu otsehebe me.»

³ Yiisu bu alabala kwogho, ábyeme nde ya ályele kundaa nde ti: «Me ndzyi, kala wu atsyeme!» Ya ñaana onjo, nde átsyeme mu buala bu nde.

⁴ Yiisu áfirilyele kundaa nde ti: «Yughu! Ka lyele kundaa mbwuru ti mumõ o, lo gye yisuo nyuru kundaa ngaa a nzaami, ya yigwa ekaba ki ótumu Moyidze, mu osuo kundaa baara bwohonon ti we aadzughu.»

*Yiisu dzuhu musala a mukwuru a bambumbulu
(Luk 7.1-10; Dzã 4.43-54)*

⁵ Mu matala ma ókasomo Yiisu mu bvulu lili Kaperenawume, mfumu a ekuru ki bambumbulu nkama (100) mumõ áyasele kundaa nde ya ábuono nde

⁶ mu olyele bu: «Mfumu, musala a me baakwoho ku nzo, binama bi nde biikpi, ya nde li mu okamono mpara yi alagha.»

⁷ Yiisu ályele kundaa nde ti: «Me sa ngya ya me sa ndzuhu nde.»

⁸ Lo mukwuru a bambumbulu nkama ábvuhulu kundaa nde ti: «Mfumu, me ka ndi wu a kughu o kuulu we somo mu nzo a me. Lo tsughu yini a ndagha mō, ya musala a me sa adzughu.

⁹ Mu kuulu, meme si ndi kunsá litumu li bakwuru ba me, ya me ndi a bambumbulu ba aakantum me. Kala ti me ndyele kundaa mumõ ti: “Gye!”, Lo nde gyene, kala ti me ndyele kundaa wu muke ti: “Gya!”, Lo nde gyi, ya kala ti me ndyele kundaa musala a me ti: “Sa esala ki!”, Lo nde si kye.»

¹⁰ Yiisu bu agyughu obo, nde ákinjimi ya ályele kundaa ba bákabulunama nde ti: «Mu engarjma

me ndyele kundaa be ti, me nkini aamono mbwuru wu li a kana li linene lili bu mu Isarayele O.

¹¹ Me ndyele be yo, balagha sa bamara ku ookapala ya ku ookadzyama tala mu oyadza kyiri ebinĩ emõ ya Abarahame, Idzake ya Dzakobe mu Emfumu ki Mayulu.

¹² Lo baana ba Emfumu ki Mayulu sa batsili bo kunsã mpyibi yi a laŋa-laŋa yi a ku mbala. Oko sa okala a bilili ya odza myini.»

¹³ Ya Yiisu ályele kundaa mukwuru a bambumbulu nkama ti: «Bvughuru ku nzo a we, ya nyaã okala bwunu a bu aasi we kana.» Mu matala maana mamõ, musala a nde ádzughu.

*Yiisu dzuhu babyele balagha
(Mar 1.29-34; Luk 4.38-41)*

¹⁴ Yiisu bu asomo ku nzo a Piere, nde ámono buko bu Piere wu mukaha ágyonjomo mu nkooro a mukaama.

¹⁵ Yiisu ábyeme kwogho e nde, ya mukaama áfi. Nde átemene ya ábwi osalala Yiisu.

¹⁶ Nkonkolo bu yito, báyabiri kundaa Yiisu baara balagha banga a mifulu mi mibi. Ya mu ndagha a nde, Yiisu ábyi mifulu mimye ya ádzuhu babyele bwohonõ,

¹⁷ mu kuulu mandagha ma, ma áli ólyele mu-bighili Edzayi makeele: «Nde aagwolo bipfwumu bi bihi ya aabiri leme li mabyele ma bihi-a-be.»

*Ba badzyi onama Yiisu
(Luk 9.57-62)*

¹⁸ Yiisu bu amono mpwumu a baara yi áadzyi nde, nde ágwi litumu kundaa binduono bagye ya nde mu ngulu yinke yi a mubu.

¹⁹ Muluo-mikyene mumō áyasele ya ályele kundaa nde ti: «Muluo, nswe ku aagye we, me sa nama we.»

²⁰ Yiisu ályele kundaa nde ti: «Mibagha mili a minjma mi baakasweme, ya banjini ba mayulu bali a manzo, lo Mwana a mbwuru ka li a na aasiili mutswi o.»

²¹ Mukimi mu binduono bi nde ályele kundaa nde ndiri: «Mfumu, gwa me muswa me mangye yindzyighi taara a me.»

²² Lo Yiisu ábvuhulu kundaa nde ti: «Nama me ya nyaã ba báki badzyighi bibyimi bi bo.»

Yiisu si ti efulu ki enene edzuunu

(Mar 4.35-41; Luk 8.22-25)

²³ Ya Yiisu bu asomo mu bwara bu bunene, binduono bi nde bínama nde.

²⁴ Ensihibi, efulu ki enene ébwi ofulu na yulu madza ma mubu. Mampo ma madza mábaana oluhu bwara. Lo Yiisu áli mu ensama.

²⁵ Binduono bígyi na bele a nde, bísiili nde ya bílyele ti: «Mfumu, bvwuhu bihi! Bihi likpi!»

²⁶ Nde ályele kundaa bo ti: «Mu emakye be lili a nzalamweẽ? Be baara baba kana li lisala!» Mu obo, nde átemene, áfyee efulu ya madza ma mubu mu ebaghala, ya edzuunu ki enene ékala.

²⁷ Baara bákinimi ya bákalylele ti: «Nsa mbwuru wu, wuulu bifulu ya mubu biikagyughu nde!»

Yiisu dzuhu banga a mifulu mi mibi buolo

(Mar 5.1-20; Luk 8.26-39)

²⁸ Ya Yiisu bu ato mu ngulu a mubu yinke, mu nsie yi a basi Ngadara, baara buolo banga a mifulu mi mibi bápala kunsá mampyeme ya báyabwana nde. Bo báli a ebaghala ki elagha, me mu obo mbwuru ti mumõ ka ákaluru mu nzili oyo o.

²⁹ Bo bábaana okehe bingubu ti: «Mwana a Nzaami! Nki ndagha yili ña kara a bihi ya we? We bu aagyi ña mu oyamwehẽ bihi mpara nsomo matala mato?»

³⁰ Ankoho, la-la ya bo óli a mukaã a bangubulu wu munene wu áakabuludza.

³¹ Mifulu mi mibi míbuono Yiisu ya mílyele kundaa nde ti: «Kala ti we bihi aabyi, lo gweghe bihi mu mukaã a bangubulu.»

³² Yiisu ályele kundaa mye ti: «Ligye!» Mifulu mimye mípala ya míyisomo mu bangubulu. Ya mono, mukaã a bangubulu ábwi okumunu ku nsie a munguo mu ntyini, bo báyibwa mu mubu ya bákpi mu madza.

³³ Bankyele ba bangubulu básuru a ntyini ya bábvughuru kunsá bvulu, ya bályele mandagha mwohono mamõ bu máluru, ya mi óbwana a baara banga a mifulu mi mibi.

³⁴ Mu obo, baara ba bvulu lwohono bápala mu oyibwana Yiisu, ya bu bamono nde, bábuono nde amara mu etsulu e nsie e bo.

9

*Yiisu dzuhu mbwuru wu ókpi binama
(Mar 2.1-12; Luk 5.17-26)*

¹ Yiisu bu asomo mu bwara bu bunene, ápala mubu ya ágyene ku bvulu lili ndaa ndeme.

² Baara báyabiri mbwuru wu ókpi binama kundaa nde wu bálaha ña yulu a laba. Yiisu bu amono kana li bo, ályele kundaa nde ti: «Kala a bukyini mwana a me! Masumu ma we basi mo kolokolo.»

³ Ankoho, ndaama a baluo-mikyene bákatsimi kunsu mikolo mi bo ti: «Mbwuru wu li mu okat-saala Nzaami!»

⁴ Yiisu bu abaghala bitsimi bi bo, ályele ti: «Mu emakye be lili a bitsimi bi bibi mu mikolo mi be?

⁵ Nsa ndagha yibvulu olenje? Olyele ti: “Masumu ma we basi mo kolokolo”, bwunu we olyele ti: “Temene ya dzyara”?

⁶ Mu kuulu be ligyhaba ti Mwana a mbwuru li a litumu lii osa masumu kolokolo ña yulu a nsie.» Mu obo nde ályele kundaa mbwuru wu ókpi binama ti: «Temene, gwolo laba li we ya bvughuru ku nzo a we.»

⁷ Baghala átemene ya ágyene ku nzo a nde.

⁸ Mampwumu ma baara bu mamono obo, mábagha nzalamweë, ya mábwi osyighi Nzaami wu aagwi kundaa baara litumu lili obo.

*Yiisu ti Matye mbili mu onama nde
(Mar 2.13-17; Luk 5.27-32)*

⁹ Yiisu ámara onjo ágyene. Nde bu ákagye, ámono baghala mumō, nkwwumu a nde Matye, wu áabwi nsini ña ebini ki baakatolo mpagha. Nde ályele kundaa nde ti: «Nama me!» Matye átemene ya ánama nde.

¹⁰ Yiisu bu ákadza mu nzo a Matye, mintolo-mpagha milagha ya banga-a-masumu bágyi mu odza emō ya nde ya binduono bi nde.

¹¹ Ba-Faridzyë bu bamono obo, bályele kundaa binduono bi nde ti: «Mu emakye Muluo a be

ali mu okadza ya mintolo-mpagha ya banga-a-masumu?»

¹² Yiisu bu agyughu obo, ályele ti: «Ka oli baara baba nsiili bali a nzala a ngaa-libughu o, lo babo ba bali babyele.

¹³ Ligye ligyighi ndagha yi: “Mukolo wu a nyiĩ me ndzyi, lo ka otsughu me banyama mu mikaba o”. Mu kuulu, me ka aangyi mu ota baara baba bunsumu mbili o, lo mu babo banga-a-masumu.»

*Efwulu mu mi mitala okuru nswele mu bala
(Mar 2.18-22; Luk 5.33-39)*

¹⁴ Binduono bi Dzã bígyene kundaa Yiisu ya bífwulu nde ndiri: «Mu emakye bihi ya ba-Faridzyẽ liikakuru nswele mu bala, lo binduono bi we ka biikakuru nswele mu bala o?»

¹⁵ Yiisu ábvuhulu kundaa bo ti: «Bandughu ba wu aakye bakughu okala kunsu nyiĩ mu matala maala wu aakye li nkini ya bo? Lo bitsughu sa bigya biili sa bamaha wu aakye ŋa kara li bo, me oŋo bo akala baakuru nswele mu bala.»

¹⁶ «Ka oli a mbwuru wu kughu olo epighi mu enkuru ki ekulu mu mupa wu munyaghara o. Kala pele mupa munde wu baabwehe sa akaghala enkuru ekye ku oluru.

¹⁷ Ka baakaloŋono si bviini li linyaghara mu manduru ma makulu mama mu bibaana bi banyama o, kala pele manduru sa makagha, bviini litsanama ya manduru mapfighili. Lo bviini li linyaghara okaloŋono mu manduru ma manyaghara mama mu bibaana bi banyama, me obo bakughu okele bye binsa bye.»

*Yiisu dzuhu mukaha ya siili mutughu mu lipfu
(Mar 5.21-43; Luk 8.40-56)*

¹⁸ Naala Yiisu nkini áli mu okalyele bo mandagha mamó, mu-Dzwife mumó wu áali mfumu áyabehene, ákunu mabuo ña nsie ña nkulu a nde, ya ályele kundaa nde ti: «Mwana a me wu mukaha maakpa, lo ya naã kwogho ña yulu a nde, ya nde sa akala mweẽ».

¹⁹ Yiisu ya binduono bi nde bu batemene, bánama nde.

²⁰ Mukaha mutsyini wu ókabulupala makili mu bamvulu kwumu ya buolo (12) ágyi ku mbihi a Yiisu ya ábyeme nto a enkuru e nde.

²¹ Mu kuulu nde ákatsimi kunsá mukoló a nde ti: «Kala me mbagha bu obyeme enkuru e nde, me sa mbvwughu.»

²² Lo, Yiisu bu akaghala, ámono mukaha munde, ya ályele kundaa nde ti: «Kala a bukyini, mwana a me! Kana li we liibvwuhu we.» Ya mu matala maana mamó, mukaha ásaabvwughu.

²³ Yiisu bu ayato ku nzo a mfumu munde, ámono ba baakafulu bilue bi bifaana ti biwebe-a-webe ya mpwumu a baara yi áakalili mu mpini.

²⁴ Nde ályele kundaa bo ti: «Lipala ku mbala be bwohonó, mutughu ka aakpi o, nde ensama aagyonómo.» Lo bo bábwi osebe nde.

²⁵ Mpwumu a baara bu yipala ku mbala, Yiisu ásomo mu nzo, ákwara kwogho ki mutughu, ya mutughu ásighili.

²⁶ Nsia yítsañama mu etsulu e nsie kyehene.

Yiisu dzuhu binkpa-mihi byele

²⁷ Mu matala ma ómara Yiisu ña ebini ekye, binkpa-mihi byele bíbwi onama nde ya

bíkabulukehe bingubu ti: «Mwana a Dabvide, mono bihi nyĩ!»

²⁸ Yiisu bu ato ku nzo, binkpa-mihi bíyasele na bele a nde, nde áfwulu kundaa bo ti: «Be lili a kana ti me nkughu ogyighili obo?» Bo bábvuhulu kundaa nde ti: «Eě, Mfumu!»

²⁹ Obo me buulu, nde ábyeme mihi mi bo ya ályele kundaa bo ndiri: «Nyaã okala kundaa be bwunu a bu oli kana li be.»

³⁰ Mihi mi bo mímono. Na nseele, mu ebaghala, Yiisu ályele kundaa bo ti: «Liyighili ogyughu, kparaa, mbwuru si mumõ anyaa osoolo ndagha yi!»

³¹ Lo bo bu bapala, báyitsala nde nsia mu etsulu e nsie kyehene.

*Yiisu dzuhu nkini
(Luk 14.15)*

³² Mu matala ma ópala binkpa-mihi, báyabiri nkini wu áali a mufulu wu mubi kundaa Yiisu.

³³ Yiisu bu abyí mufulu wu mubi munde, nkini ábaana obili. Mampwumu ma baara mákinjimi ya mályele ndiri: «Bihi nkini límaamono yi a bu mu Isarayele o!»

³⁴ Lo ba-Faridzyě bákalyele ti: «Mu mpaana a mukwuru a mifulu mi mibi nde ali mu okapaha mifulu mi mibi.»

*Yiisu mono mampwumu ma baara nyĩ
(Mar 6.6; Luk 10.2)*

³⁵ Yiisu ákabulugye mu mabvulu ya mala mwohono. Nde ákabululuo mu manzo ma lisamana, ákabulutsala Nsia yi Mbwe yi a Emfumu ki Mayulu, ya ákabuludzuhu mabyele mwohono ya bipfwumu byehene.

³⁶ Yiisu bu amono mampwumu ma baara, nde ámono mo nyĩĩ kunsá mukolo, mu kuulu mo máli makolo, ya ka máli a bukyini o, *ti anga bindoomo bi bigwene a munkala bibuolo.*

³⁷ Mu obo Yiisu ályele kundaa binduono bi nde ti: «Bi-otolo bilagha mu nseghe, lo ba baatolo bali basala.

³⁸ Mu obo, libuono mfumu nga-a-nseghe agweghe basala ba balagha ba baatolo mu nseghe a nde.»

10

Bantumu kwumu ya buolo

(Mar 3.13-19; Luk 6.12-16)

¹ Yiisu bu ati binduono bi nde kwumu ya byele (12) mbili, nde ágwi bo litumu lili obyi mifulu mi mibi ya odzuhu mabyele mwohonono ya bipfwumu byehene.

² Ma me mankwumu ma bantumu kwumu ya buolo (12): Wu a nsomo Simō ya Andere mbwee a nde, Dzake ya Dzã mbwee a nde, baana ba Nzebede

³ Filipe ya Baretelemi, Toma ya Matye muntolompagha, Dzake mwana a Alafe ya Tade,

⁴ Simō mu-Nzelote ya Yuda Isikaryote, munde wu átyeghe Yiisu.

Yiisu gweghe bantumu kwumu ya buolo

(Mar 6.7-13; Luk 9.1-6)

⁵ Ba me baara kwumu ya buolo (12) ba ógweghe Yiisu ya ba ályele nde ti: «Ka ligye kundaa baara baala ka bali ba-Dzwife o, ya ka lisomo mu bvulu si limō lili basi Samari o.

⁶ Lo ligye ku oli bindoomo bi nzo a Isarayele bi bídzimini.

⁷ Bu lili mu okabulugye, likabululuo ya okabululyele ti: “Emfumu ki Mayulu eeyabehene!”

⁸ Lidzuhu babyele, lisiili ba bákpí mu lipfu, litsehebe banga-a-buala, libyi mifulu mi mibi. Be liibagha kuu ogwene ogwa nzi, ligwa si kuu ogwene oluomo nzi.

⁹ Ka ligwolo si oore o, ngu okala ngele, ngu okala nzi mu miswele mi bala mi be,

¹⁰ ngu okala empogholo, ngu okala binkuru byele bi bila, ngu okala bikoghoró, ngu okala mukaana. Mu kuulu musala faana obagha bi-odza bi nde.»

¹¹ «Da liisomo be mu bvulu bwunu we mu bula, lifwulu kala ti oli a mbwuru wu a kughu mu ogyagha be, ya likala mu nzo a nde tee matala ma liimara be oyo.

¹² Na liisomo be munsa nzo a baara, ligwa bo mboro.

¹³ Kala ti nzo oyo yili yi a kughu, lo nyaã edzuunu e be ekala mu yo. Lo kala ti yo ka yili yi a kughu o, lo nyaã edzuunu e be ebvughuru kundaa beme.

¹⁴ Nswe munde wu agwene ogyagha be ya wu agwene ogyughu mandagha ma be, lipala munsa nzo oyo, bwunu we bvulu lilo, likubulu lifufunu li myili mi be.

¹⁵ Mu enganma me ndyele kundaa be ti: Mu et-sughu kii Muyala, baara ba bvulu lilo sa babagha masyeme ma mabvulu mama baara ba Sodome ya Ngomore.»

*Kimini li lili mu ogya ku nkulu
(Mar 13.9-13; Luk 21.12-17)*

¹⁶ «Ligyughu, me ngweghe be ti bindoomo ɲa kara li bango. Likala yeelee ti bantaala, ya likala a mikolo mi mitsyeme ti anga mabeeme.

¹⁷ Lisa mayele mu baara, mu kuulu bo sa batyeghe be ku mambala ma miyala ya bo sa bakaha be nswa-nswa munsa manzo ma bo mama lisamana.

¹⁸ Sa babiri be ɲa nkulu a bamfumu ba bitsulu bi mansie ya mikogho, mu nkooro a me, me oɲo be liikala bumpughulu bu me ɲa nkulu a bo, ya kundaa baala ka bali ba-Dzwife o.

¹⁹ ɲa akala baatyeghe be, ka likala a nza-lamweẽ o ti bunu liibili bwunu we mayo li-ilyele, mu kuulu mu matala mamō, sa bagwa be mandagha ma akala liibili.

²⁰ Ka be akala liibili o, lo Mufulu a Taara a be akala aabili mu be.

²¹ Mwana a taara sa atyeghe mwana a taara mu lipfu, ya taara sa atyeghe mwana a nde. Baana sa bakala mitaara mi bataara ya bangughu ba bo, ya sa batumu baara badzwa bo.

²² Baara bwohono sa babele be mu nkooro a nkwumu a me. Lo munde wu aasa mukama tee ku masini, nde sa abvwughu.

²³ Mu matala ma akala baamwehẽ be mpara mu bvulu limō, libara mu bvulu li like. Mu enganma, me ndyele kundaa be ti, be ka limana odzenene mabvulu ma Isarayelee mwohono o, nsomo-a-nsomo Mwana a mbwuru agya.»

²⁴ «Enduono ka eluru muluo a kye o, ya nkana si mumō ka luru mfumu a nde o.

25 Ofaana okala ti enduono ekala ti muluo a kye ya nkana akala ti mfumu a nde. Kala ti bati mfumu a nzo Beledzebule, lo mayo baagwene olyele mu ba bali munsa nzo a nde?»

26 «Mu obo ka libara bo o! Mandagha mwohonono ma másweme sa mamonono, mansweghe mwohonono sa basoolo mo.

27 Mandagha ma aandyele me be kunsu mpyibi, be lilyele mo mu mwii wu ebala. Mandagha ma liikagyughu be mu mamfwunu, be lita mo mukwughu ku yulu a see li nzo lili eyala*.

28 Ka likabara baara ba baakadzwa nyuru o, lo ka bakughu odzwa muwumunu o. Lo liikabara munde wuulu kughu odzihibi muwumunu ya nyuru ku mungele a mbaa.

29 Ka baakatyegehe binswini-a-nswini byele mu mupara mumō†. Lo emō mu bye ka ekughu obwa ŋa nsie o, kala ti Taara a be ka gwi muswa o.

30 Ya kundaa be, si okala mfu a be, Nzaami soolo mutala a yo yohono.

31 Mu obo, ka likala a nzalamweẽ o! Be libvulu binswini-a-nswini bi bilagha mu mupfunu.»

32 «Mu obo, nswe munde wu aakihi ŋa nkulu a baara ti nde li wu a me, lo mehe si sa nkihi ti nde li wu a me ŋa nkulu a Taara a me wu li ku mayulu.

33 Lo nswe munde wu aatunu me ŋa nkulu a baara, lo mehe si sa ntunu nde ŋa nkulu a Taara

* **10:27 10:27** *see li nzo lili eyalasee li nzo li batwu mu ebagha kii eyala. Ku yulu a see lilo baara bákabwa nsini mu okamoŋo, mu okasamana ya mu okagwolo mpyee mu nkonkolo.* † **10:29 10:29** *mupara mumōmufuru wu a esala wu etsughu etsyini o*

a me wu li ku mayulu.»

*Ka oli edzuunu o, lo mamvulu
(Luk 12.51-53; 14.26-27)*

³⁴ «Ka litsimi o ti me aayambiri edzuunu ña nsie. Me ka aangyi mu oyabiri edzuunu o, lo lipee.

³⁵ Me aangyi mu okabala mumpala ya taara a nde, mutughu ya ngughu a nde, mukala a mwana ya buko bu nde wu mukaha.

³⁶ Ya mitaara mi mbwuru, sa mikala baara ba bali ya nde munsa nzo a ndeme».

³⁷ «Nswe munde wu dzyi taara a nde, bwunu we ngughu a nde ku obvulu me, nde ka faana mu okala wu a me o. Nswe munde wu dzyi mwana a nde wu baghala bwunu we wu mukaha ku obvulu me, nde ka faana okala wu a me o.

³⁸ Nswe munde wu aagwene obiri kuruwa li nde ya onama me, ka faana okala wu a me o.

³⁹ Munde wu aakele laama li nde, sa apfihili lo, ya munde wu aapfihili laama li nde mu nkooro a me, sa afiribagha lo.»

*Munde wu aabwana a be, me abwana
(Mar 9.41)*

⁴⁰ «Nswe munde wu aabwana a be, lo meme nde abwana, ya munde wu aabwana a me bwana a munde wu áagweghe me.

⁴¹ Nswe munde wu aabwana a mubighili mu kuulu nde li mubighili, sa abagha mufuru wu baakagwa mubighili. Ya nswe munde wu aabwana a mbwuru wu li nsumu mu kuulu nde li nsumu, nde sa abagha mufuru wu a mbwuru wu li nsumu.

⁴² Nswe munde wu aagwa si ebaha ki madza mama mudzili kundaa mumõ mu bike-bike bi mu kuulu kye eli enduono e me, mu enganma me ndyele be ti, nde ka apfihili mufuru a nde o.»

11

Dzã Muboghoru gweghe bantumu kundaa Yiisu

¹ Yiisu bu amana ogwa mikyene mimye kundaa binduono bi nde kwumu ya byele (12), nde ámara onjo, áyiluo ya áyitsala nsia yi mbwe mu mabvulu ma bo.

² Ya Dzã, munsa boloko mu áli nde, ágyughu bu bákabili mu bigyighili bi Kriste. Nde ágweghe binduono bi nde,

³ mu oyifwulu kundaa nde ti: «We me munde wu li mu ogya, bwunu we mukimi bihi lifaana okebe?»

⁴ Yiisu ábvuhulu kundaa bo ti: «Ligye lilyele kundaa Dzã mi lili mu ogyughu ya omono:

⁵ Binkpa-mihi bili mu omono, bikara bili mu odzyara, banga-a-buala bali mu otsyeme, binkpa-matswi bili mu ogyughu, ba bákpi bali mu osighili mu lipfu, ya bali mu otsala Nsia yi Mbwe kundaa bawele.

⁶ Esee kundaa munde wu aagwene obwihi kana li nde mu nkooro a me!»

⁷ Binduono bibye bu bibvughuru, Yiisu ábwi obili kundaa mampwumu mu mi mitala Dzã: «Emakye be liiyitala ku syehe? Edzyara ki oli mu okanyihi efulu?

⁸ Bu be emakye liiyimono? Baghala wu aalaha binkuru bibi ntala? Bu tala babo ba

baakalaha binkuru bi bibwe mu manzo ma mikogho baakakala.

⁹ Emakye be liiyimono? Mubighili, eẽ? Me ndyele kundaa be ti, nde bvulu ku oluru ya mubighili.

¹⁰ Me mu mi mitala nde básono bu: *Mono, me ntswahaba ntumu a me ku nkulu a we, mu ogyighili nzili a we.*

¹¹ *Mu engañma*, me ndyele be yo: Na kara li ba báburu mu mukaha, ka oli a mbwuru wu áli wu bvulu Dzã Muboghoru o. Lo wu bvulu bugye mu Emfumu ki Mayulu bvulu nde mu bukwuru.

¹² Obaana mu matala ma Dzã Muboghoru tee mu matala ma, bali mu odzwana a Emfumu ki Mayulu mu mpini. Me banga-a-ngirini bali mu okagwohono kye.

¹³ Mu kuulu mibighili myehene, ya Mukyene a Moyidze míkabighili tee mu matala ma Dzã.

¹⁴ Kala ti be likughu okihi yo, me nde, Eli wu áakaagya.

¹⁵ Nyaã nga-a-matswi, agyughu!

¹⁶ Ya nande me nkughu obvughu eseene ki? Kye efaana ti anga bike-bike bi biibwi nsini na mbala a baara bwohono, ya bili mu okalyele mu mpini kundaa bambaala bike-bike ti:

¹⁷ “Bihi liifulu be bilue bi bifaana ti biwebe-a-webe,

lo be ka liikini o.

Bihi liigyimi ekwumu kii lipfu, lo be ka liilili o!”

¹⁸ Mu kuulu Dzã aagyi, nde ka akadza ya okañma o, ya baara baalyele ti: “Nde li a mufulu wu mubi!”

¹⁹ Mwana a mbwuru aagyi, nde li mu okab-uludza ya okabulunma, ya bo bali mu okalyele

ti: “Nde li nga-a-elyili ya enkolo-mala, ndughu a mintolo-mpagha ya banga-a-masumu!” Lo Bunsughu buumonono bubu nsumu mu bigyighili bi nde.»

Mabvulu ma mabihi osa kana

²⁰ Na mbihi oŋo, Yiisu ábwi ofyeẽ mabvulu mamu mu ási nde emvulu-ngughu ki bimamaã bi nde, mu kuulu mo ka mágyinji mayele o.

²¹ «Nyĩĩ kundaa we bvulu lili Koradzine! Nyĩĩ kundaa we, bvulu lili Betesayida! Mu kuulu kala ti bimamaã bi bási ŋa kara li be mu mabvulu mama Tire ya Sidõ bási bye, nkini li edzighi baara baba oko bakaalaha mangooro ya ogyogho lifuru a mbaa mu osuo ti bo baagyinji mayele.

²² Mu obo me ndyele be ti: Mu etsughu kii mumfwunu a baara, ebili e be sa ebvulu kii Tire ya Sidõ.

²³ Ya we bvulu lili Kaperenawume, sa bakuhubu we tee ku yulu? Pele! Sa basurulu we tee ku nsie a ba bákpi! Mu kuulu kala ti bimamaã bi bási ŋa kara li we, áli ku Sodome bási bye, nkini bvulu lilo lili tee lolo bu.

²⁴ Me obo me ndyele be ti: Mu etsughu kii mumfwunu a baara, ebili kii nsie a Sodome sa ebvulu busala ya kii we».

Obagha bumpoholo kundaa Yiisu

(Luk 10.21-22)

²⁵ Mu matala mamu Yiisu ályele ti: «Me nsyighi we Taara, Mfumu a yulu ya nsie, mu kuulu we aasweghe mandagha mamu ŋa mihi mi bansughu ya banga-a-mayele, lo we aasuo mo kundaa bike-bike.

²⁶ Eě, Taara, we aadzyi ti okala obo.»

²⁷ «Taara a me ágwi me byehene. Ka oli a mbwuru si mumō wu soolo Mwana o, kala ka oli yini a Taara o. Ya ka oli a munde wu soolo Taara o, kala ka oli yini a Mwana o ya munde wu odzyi Mwana osuo kundaa Taara.»

²⁸ «Ligya kundaa me, be bwohonono ba liikolo mu obiri maleme, ya me sa ngwa be bumpoholo.

²⁹ Lilaha nkogholo a me ya ligyighi kundaa me, mu kuulu me ndi wu adzuunu ya me ndi a mukolo wu a bunya-nyaã, ya be sa libagha ogwumu ku miwumunu mi be.

³⁰ Mu kuulu nkogholo a me ka yili a mpara mu obiri o, ya leme lili ndaa me lileŋe.»

12

Yiisu ya etsughu kii sabate
(*Mar 2.23-28; Luk 6.1-5*)

¹ Mu matala mamō, Yiisu ákaluru munsa manseghe ma bele, mu etsughu kii sabate. Binduono bi nde bífuru nzala ya bíbwi oka binsia bi bimburu ya odza bye.

² Ba-Faridzyě bu bamono obo bályele kundaa nde ti: «Mono, binduono bi we bili mu ogyighili mi bálighi ogyighili mu etsughu kii sabate».

³ Lo Yiisu ábvuhulu kundaa bo ti: «Bunu, be kálitaã mi ógyighili Dabvide o, mu matala ma ófuru nde nzala ya ba bákakala ya nde?

⁴ Bunu-abo nde ásomo mu Nzo a nzaami, ya áli mampa ma bágwi ekaba kundaa Nzaami, maala nde ya ba bákakala ya nde ka báli a muswa mu odza o, lo yini a bangaa ba nzaami?

⁵ Bwunu we be ka lítaã mu Mukyene o ti, mu etsughu kii sabate, munsa Nzo a nzaami, bangaa ba nzaami baakatsumunu ngili a etsughu kii sabate ku ogwene a obagha ebili?

⁶ Lo me ndyele kundaa be ti: Oli ña, yibvulu Nzo a nzaami.

⁷ Kala ti áli liigyahaba mbaala a bisono bi: *Me ki ndzyi mukolo wu a nyĩ, lo ka okadzwa banyama mu bikaba o*, nkini be ka likaakagwa ebili kundaa baara ba bagwene osoolo ndagha o.

⁸ Buulu Mwana a mbwuru li Mfumu a sabate.»

*Baghala nga a kwogho ki ekpi
(Mar 3.6; Luk 6.6-11)*

⁹ Yiisu bu amara oño, ágyene munsa nzo a bo yi lisamana.

¹⁰ Mu nsa omo, óli a baghala wu áali a kwogho ki ekee. Ba-Faridzyě bu bákasagha ndagha yi baaburulu nde, bágwi nde efwulu ki: «Bunu, oli a muswa mu odzuhu mubyele mu etsughu kii sabate?»

¹¹ Ya Yiisu ábvuhulu kundaa bo ti: «Nande ña kara li be wuulu kala ti nde li a endoomo etsyini, ya kye ebwi mu dzunu mu etsughu kii sabate, nde ka ayipaha kye o?

¹² Buta mbwuru bvulu mupfunu ya endoomo! Mu obo, oli a muswa mu ogyighili bubwe mu etsughu kii sabate.»

¹³ Oño nde ályele kundaa baghala ti: «Labala kwogho e we». Nde álabala kye ya kye ébvughuru nsiili ti kwogho ki eke.

¹⁴ Ba-Faridzyě bu bapala, bákuru mfwunu yi osagha bunu baadzwa Yiisu.

Yiisu li musala wu osuolo Nzaami

¹⁵ Yiisu bu asoolo obo, ámara oŋo. Ya mampwumu ma baara malagha mákanama nde, ya nde ádzuhu bo bwohonono.

¹⁶ Yiisu átswi bo mukele, banyaã otsala nde nsia ti nde na ali,

¹⁷ mu kuulu mandagha ma ólyele mubighili Edzayi matswighi:

¹⁸ «Mono musala a me wu aanswolo me, wu ndzyi me, ya mu nde me aankamono esee. Me sa ntwulu Mufulu a me mu nde, ya nde sa alyele bunsumu kundaa baara ba mansie.

¹⁹ Nde ka banana ya mbwuru o, ka akehe bingubu o, ka bagyughu likyi li nde mu minsagha o.

²⁰ Nde ka abogholo edzyara ki bamaafuru o, nde ka adzihibi musyi a mwindi wu li nkini mu okatsuru o, tee ŋa aasa nde ti bunsumu bulughulu.

²¹ Ya bikaana byehene sa bisa emiini mu nkwumu a nde.»

Yiisu ya Beledzebule

(Mar 3.22-30; Luk 11.14-23)

²² Báyabiri kundaa Yiisu mbwuru mumõ wu áali a mufulu wu mubi, nde áli enkpa-mihi ya nkini. Yiisu ádzuhu nde. Mbwuru wu áali nkini ábwi obili ya ábwi omono.

²³ Mampwumu ma baara mwohonono mákinjimi ya mályele ti: «Wu ka Mwana a Dabvide o?»

²⁴ Lo ba-Faridzyẽ bu bagyughu obo, bályele ti: «Mbwuru wu mu lileene li Beledzebule, mfumu a mifulu mi mibi, ali mu okabyi mifulu mi mibi.»

²⁵ Yiisu bu agyhaba bitsimi bi bo, ályele kundaa bo ti: «Kala ti baara ba bali a emfumu baakadzwana bo-a-bo, lo emfumu ekye sa ebwa. Ya baara baba bvulu bwunu we baba dzumu limõ kala ti bakaghaba, bvulu lilo bwunu we dzumu lilo ka lilaama o.

²⁶ Kala ti Satana byi Satana, lo nde li mu okaghaba ya ndeme, bunu-a-bo emfumu e nde ekughu olaama?

²⁷ Kala ti me mu lileene li Beledzebule ndi mu okabyi mifulu mi mibi, lo baana ba be mu lili nande baakabyi mye? Mu obo, bomo sa bakala bansunghu-a-lamana ba be.

²⁸ Lo, kala ti mu Mufulu a Nzaami me ndi mu okabyi mifulu mi mibi, lo Emfumu e Nzaami ayi eeyato kundaa be.

²⁹ Bwunu we, bunu-a-bo mbwuru akughu osomo mu nzo a nga-a-mpini ya ogwolo bilogho bi nde byehene, kala ti nde ka tswama okuru nde misyi o? Lo, nde amana osa obo, nde kughu ogwohono byehene bi bili mu nzo a nde.

³⁰ Nswe munde wuulu ka ali ya me o, li mutaara a me, ya munde wu aagwene obvughu baara ya me, nde li mu otsala.

³¹ Me mu obo me ndyele kundaa be ti: Sa basa baara kolokolo mu masumu ma bo mwohono ya otsaala kwohono, lo munde wu aatsaala Mufulu a Ngili ka bakughu osa nde kolokolo o.

³² Ya kala ti mbwuru lyele ndagha yi mbi mu Mwana a mbwuru, sa basa nde kolokolo. Lo munde wu aabili bubi mu Mufulu a Ngili, ka basa nde kolokolo o, ngu okala mu matala ma, ngu okala mu matala ma maagya.»

Muti ya bimburu bi nde
(Luk 6.43-45)

³³ «Kala ti muti li mubwe, lo bimburu bi nde si bili bi bibwe. Ya kala ti muti li mubi, lo bimburu bi nde si bili bi bibi. Mu kuulu muti okagyahaba nde mu bimburu bi nde.

³⁴ Etswumu ki bampili ki! Bunu-abo be likughu olyele mandagha ma mabwe, ŋaala be lili baara ba babi? Mu kuulu mandagha ma maakapala mu muŋma, me ma maalwulu mu mukolo.

³⁵ Mbwuru wu mubwe aakapaha bilogho bi bibwe bi bili mu nkiri-mbughu* a nde yi mbwe. Mbwuru wu mubi aakapaha bilogho bi bibi bi bili mu nkiri-mbughu a nde yi mbi.

³⁶ Me ndyele kundaa be ti: Mu etsughu kii Muyala, nswe mbwuru sa agwa mvuru mu mandagha ma magwene a mupfunu ma ápaha mu muŋma a nde.

³⁷ Me mu mbiili a we, we akala alughulu, ya me mu mbiili a we, we akala abwa.»

Baara baluomo elyimi
(Mar 8.11-12; Luk 11.29-32)

³⁸ Ŋaana oŋo, baluo-mikyene bana ya ba-Faridzyē babake bályele kundaa Yiisu ndiri: «Mu-luo, bihi lidzyi ti we, we suo bihi elyimi nga-emō.»

³⁹ Nde ábvuhulu kundaa bo ti: «Eseene kii lolo, ki eli ebi ya ki eegwene okanama Nzaami eli mu oluomo elyimi! Lo ka oli a elyimi ki baasuo kundaa be o, kala ti ka oli yini a elyimi kii mubighili Dzonase o.

* 12:35 12.35 Nkiri-mbughu, ebini ki baakasweghe busini.

⁴⁰ *Bwunu a bu ósi Dzonase bitsughu bitere ya mampyibi matere munsá mweẽ a nswi wu munene, bwunu obo si Mwana a mbwuru aasa bitsughu bitere ya mampyibi matere ku nsini a nsie.*

⁴¹ Mu etsughu kii muyala, baara baba bvulu li Ninibve sa batemene ya bafwunu baara baba eseene ki. Bo sa babwihi eseene ki, buulu baara ba Ninibve bágyinjí mayele mu maluo ma Dzonase. Lo oli ña, wu bvulu Dzonase.

⁴² Mu etsughu kii muyala, Ngasa[†] wu a nsie yi a Sude, sa atemene ya afwunu eseene ki, ya sa abwihi kye, mu kuulu Ngasa ámara ku bitsulu bi nsie bi bibvulu la mu oyagyughu bunsughu bu Salomõ. Lo oli ña, wu bvulu Salomõ!»

*Obvughuru o mufulu wu mubi
(Luk 11.24-26)*

⁴³ «Ña ookapala mufulu wu mubi mu nyuru a mbwuru, nde aakagye mu bibini bibi syehe mu okabulusagha ña aagwumu. Lo kala ti nde ka abagha kye o,

⁴⁴ onjo nde aalyele bu: “Me mbvughuru ku nzo a me yi nkulu, omo mu áampala me”. Ya nde bu ayabvughuru, nde sa ayabagha yo mukañana, yi bagyighili okuomo ya bunkere.

⁴⁵ Onjo nde aayigwolo ya nde mifulu nsaama mikimi mi mibvulu nde mu bubi, mye myehene misomo ya mibagha bibini omo. Bungsiili bu mbwuru munde bubu masini sa bubvulu bubi ya bubu nsomo. Bwunu obo si ookala mu eseene ki ebi ki.»

[†] 12:42 12.42 Ngasa, mukogho wu mukaha

*Ngughu ya bambwee ba Yiisu**(Mar 3.31-35; Luk 8.19-21)*

⁴⁶ Yiisu áli nkini mu okabili kundaa mampwumu ma baara, ngughu ya bambwee ba nde bátemene ku mbala ya bákasagha obili ya nde.

⁴⁷ [Mbwuru mumõ áyalyele kundaa nde ti: «Ngughu a we ya bambwee ba we bali ku mbala ya badzyi obili ya we.»]

⁴⁸ Yiisu ábvuhulu kundaa munde wu áakabili ya nde ndiri: «Nande li ngughu a me? Ya bana bali bambwee ba me?»

⁴⁹ Na nseele nde álabala kwogho kundaa binduono bi nde ya ályele ti: «Limono ngughu a me ya bambwee ba me.

⁵⁰ Nswe munde wu aasa waa li Taara a me wu li mu mayulu, me munde li mbwee bwunu we naana a me wu baghala, nkele a me, ya ngughu a me.»

13

*Nkumu yi a mukunu**(Mar 4.1-9; Luk 8.4-8)*

¹ Mu etsughu ekye, Yiisu bu apala mu nzo, áyabwa nsini na mukogho a mubu.

² Mampwumu ma baara malagha máyabvununu na bele a nde, ya mu obo, nde ásomo munsu bwara ya ábwi nsini, ya mpwumu a baara yohono yísyili mu mukogho a madza.

³ Mu mankumu, nde ályele mandagha malagha kundaa bo ti: «Mukunu ápala mu oyikunu.

⁴ Mu matala ma ákanyahala nde nsia, ndaama a nsia yíbwi mu mukogho a nzili. Banjini bágyi ya bátooro yo yohono.

⁵ Yinke yíbwi mu oli mameë, ñaala nsie ka yíli yi alagha o. Yo yímene mu maswa, lo mu nkooro a nsie yiili ka yíli a mubighi o,

⁶ mwiĩ bu abala ya buulu misumunu ka míli a midza o, mye mídzighi ya míkee.

⁷ Yinke yíbwi kunsá mingaama, ya mingaama bu mikulu mísi yo mpíni.

⁸ Yinke yíbwi mu nsie yi mbwe ya yíburu bimburu: Yini bimburu nkama (100), yinke bimburu makwumu masemene (60), ya yimõ bimburu makwumu matere (30).

⁹ Munde wu li a matswi, agyughu!»

*Mu emakye Yĩisu aakabili mu mankumu
(Mar 4.10-12; Luk 8.9-10)*

¹⁰ Binduono bu biyasele kundaa nde, bífwulu nde ti: «Mu emakye we li mu okabulubili ya bo mu mankumu?»

¹¹ Nde ábvuhulu kundaa bo ti: «Kundaa be baagwi bwehe ba osoolo mpaana a Emfumu ki Mayulu, lo ka kundaa bo o.

¹² Mu kuulu, kundaa munde wu li a elogho, sa bafirigwa nde, ya sa akala a bye bi bilagha, lo kundaa munde wu gwene a elogho, sa bamaha nde ekye ki ali a nde.

¹³ Me mu obo me ndi mu okabulubili ya bo mu mankumu, mu kuulu si kala ti bo batála, lo bo omono we, ya si kala ti bo banama, lo bo ogyughu we ya obaghala we,

¹⁴ ya mpaala mandagha ma ma ólyele mubighili Edzayi makeele mu bo:

*Be sa ligyighili ogyughu, lo ka libaghala o,
Be sa ligyighili otala, lo ka limono o.*

¹⁵ *Mu kuulu mukolo a ekaana ki ayi aakubu,*

*bo baakuru matswi ma bo ya baadzwi mihi mi bo.
Mu kuulu banyaã omono mu mihi mi bo,
ya banyaã ogyughu mu matswi ma bo,
ya banyaã obaghala mu mikolo mi bo.
Ya bakwono ogyinji mayele,
ya me ndzuhu bo.»*

¹⁶ «Esee kundaa be mu kuulu mihi mi be mili mu omono, ya matswi ma be mali mu ogyughu.

¹⁷ *Mu enganma*, me ndyele kundaa be ti: Mibighili milagha ya baara baba bunsumu balagha bákasagha omono mi lili mu omono be, lo bo ka bámono mye o, bákasagha ogyughu mi lili mu ogyughu be, lo ka bágyughu mye o.»

*Yïisu baala nkumu yi a mukunu
(Mar 4.13-20; Luk 8.11-15)*

¹⁸ «Be me baala ligyughu mbaala a nkumu yi a mukunu:

¹⁹ Ba baakagyughu ndagha a Emfumu e Nzaami ya bakwono obaghala, bo bali efaana kii mukogho a nzili munde wu oobwi mburu. Wu Mubi agwolo gyi ya gwohono byehene bi baakunu mu mikolo mi bo.

²⁰ Nsie yi a mameẽ mu oobwi mburu, me munde wuulu bu agyughu ndagha a Nzaami, gyagha yo maswa-maswa ya esee.

²¹ Lo, nde ka li a midza mu ndeme o, nde mbwuru wu gwene a mukama. Ya ña oogya mpara bwunu we makimini mu nkooro a Ndagha a Nzaami, ñaana-oño nde bwi.

²² Nsie yi a mingaama mu oobwi mburu, me munde wu gyughu Ndagha a Nzaami, lo minyoõ

mi nsie ya ntono a busini biikasa Ndagha a Nzaami mpini ya yo ka yiikaburu bimburu o.

²³ Nsie yi mbwe mu oobwi mburu, me munde wuulu bu agyughu Ndagha a Nzaami, baghala yo. Nde aakaburu bimburu, limō ligwi nkama (100) a bimburu, lini ligwi bimburu makwumu-masemene (60), li like ligwi bimburu makwumu-matere (30).»

Nkumu yi a esagha ki ebi

²⁴ Yiisu áfirita bo nkumu nkimi. Nde ti: «Emfumu ki Mayulu efaana ya mbwuru wu aakunu nsia yimbwe mu nseghe a nde.

²⁵ Mu matala maala baara baagyonomo en-sama, mutaara a nde gyi, kunu nsia a esagha ki ebi na kara li bele ya gyene.

²⁶ Bele limene ya liburu binsia, esagha ki ebi si epala.

²⁷ Basala ba mfumu nga-a-nzo bagyi ya balyele kundaa nde ndiri: “Mfumu, bunu, we ka oli nsia yimbwe aakanu mu nseghe a we o? Bu esagha ki ebi ki kunu-ako eefi?”

²⁸ Nde bvuhulu kundaa bo ti: “Me mutaara aasi obo.” Basala balyele kundaa nde ti: “Bunu, we dzyi ti bihi liyitumunu esagha ekye?”

²⁹ Nde lyele kundaa bo ti: “Pele! Mara bu litolo esagha ki ebi, be litumunu si bele nzili mō ya kye.

³⁰ Linyaã bye binsa byele bikulu tee ku baatolo bimburu. Ya mu matala ma baatolo, me sa ndyele kundaa ba baatolo ti: Limatswama otolo bisagha bi bibi, likuru bye mu biko ya litsughu bye mbaa. Na nseele be likwu bele kunsu etaghala e me.»

Nkumu yi a nsia a muti a mutaade

(Mar 4.30-32; Luk 13.18-19)

³¹ Yiisu áfirita bo nkumu nkimi ti: «Emfumu ki Mayulu efaana ti nsia a muti wu a nkwumu mutaade* yi ogwolo mbwuru ya akunu mu nseghe a nde.

³² Yo yibvulu busala mu nsia yo yohono. Lo ŋa yiikapala yo, yo yiikabvulu miswoho myehene mimi mu ebwa mutele. Yo yiikakala muti wuulu banjmini ba yulu baakayatwu manzo ma bo mu mampala ma nde.»

Nkumu yi a pfini

(Luk 13.20-21)

³³ Yiisu áfirita bo nkumu nkimi ti: «Emfumu ki Mayulu efaana a pfini li oogwolo mukaha ya atwulu mu mankpaã matere ma farine, tee ku oofuulu mankpaã ma farine mwohono.»

Oluo mu mankumu

(Mar 4.33-34)

³⁴ Mandagha mwohono mamu Yiisu ákalyele mo kundaa mampwumu ma baara bwohono mu mankumu. Ya nde ka ákabili ya bo ku ogwene a ma mankumu o.

³⁵ Mu kuulu mandagha ma áli olyele mubighili makeele:

*Me sa ndzubulu munjma a me mu obili mu mankumu,
me sa ndyele bo mandagha mama ensweghe obaana mu ebaana e nsie.*

Yiisu baala nkumu yi a esagha ki ebi

* **13:31 13.31** *mutaade* liburu li libvulu busala mu nsia yo yohono. **13:35 13.35** Bik 78.2

³⁶ Yiisu bu abulusihi mampwumu ma baara, áyisomo mu nzo, ya binduono bi nde bíyasele kundaa nde, ya bílyele kundaa nde ti: «Gwa bihi mbaala a nkumu yi a esagha ki ebi mu nseghe.»

³⁷ Nde ábvuhulu kundaa bo ti: «Munde wu aakanyahala nsia yi mbwe me Mwana a Mbwuru.

³⁸ Nseghe me nsie, nsia yi mbwe me baana ba Emfumu ki Mayulu, esagha ki ebi me baana ba Nga-a-bubi.

³⁹ Mutaara wu aakanyahala nsia a esagha ki ebi me dyabulu, otolo bimburu me masini ma nsie, ba baakatolo bimburu me bangye-yulu.

⁴⁰ Mu obo, bwunu a bu baakatumunu esagha ki ebi ya otsughu kye kyehe ne ku mbaa, me obo si akala ookala ku etsughu kii masini ma nsie.

⁴¹ Mwana a mbwuru sa agweghe bangye-yulu ba nde. Bo sa bapaha mu Emfumu e nde, byehene bi biikabwihi baara mu masumu, ya ba baakagyighili bubi.

⁴² Ya sa batsili bo kunsá mungele a mbaa, oko ku ookala bilili ya odza myini.

⁴³ Oño banga-a-bunsumu sa basehene ti anga tala mu Emfumu e Taara a bo. Nyaã nga-a-matswi, agyughu!»

Busini bu básweghe

⁴⁴ «Emfumu ki Mayulu efaana ti busini bu básweghe kunsá nseghe, buulu mbwuru ámono bo, áfirisweghe bo. Mu emiini kyehe ne, nde sa ayityeghe bilogho bi nde byehene ya ayaswumu nseghe oyo.»

Nkumu yi nsia

⁴⁵ «Emfumu ki Mayulu efirifaana ti munta-nkaala wu li mu okabulusagha nsia a bolo yi mbwe.

⁴⁶ Bu amono lisia limõ lili ntala yi alagha, nde yityeghe bye byehene bi ali a bye, ya yaswumu lisia lilo.»

Nkumu yi likoho

⁴⁷ «Emfumu ki Mayulu efaana ti likoho li batubu mu mubu li likogho banswi baba mawa-mawa.

⁴⁸ Bu lilwulu, bilebe-banswi bidzuru lo mu mukogho a madza, ya baara bu babwi nsini mu mukogho, babwi osuolo banswi ba babwe ba baalo mu mankuru ya batsili ba bagwene a mupfunu.

⁴⁹ Bwunu obo si ookala mu etsughu ki masini ma nsie. Bangye-yulu sa bagya, sa bakabala ba babi ya ba banga-a-bunsumu,

⁵⁰ ya sa batsili ba babi ku mungele a mbaa. Oko ku ookala bilili ya odza myini.»

Bilogho bi bikulu ya bi binyaghara

⁵¹ «Bunu, be liibaghala mandagha mwohonoma?» Bo bakihi ti: «Eẽ.»

⁵² Nde ályele kundaa bo ti: «Obo me buulu, nswe muluo-mikyene wu báluo mu mi mitala Emfumu ki Mayulu, faana ti mfumu nga-a-nzo wu paha munsa nkiri-mbughu a nde, bilogho bi binyaghara ya bi bikulu.»

Basi Nadzarete ba bihi osa kana mu Yïisu (Mar 4.33-34; Luk 4.16-30)

⁵³ Yïisu bu amana ota mankumu mamu, ámara oño.

⁵⁴ Bu agyi ku etsulu e nsie e ndeme, ku Nadzarete nde ábwi oluo bo mu nzo a lisamana a bomo ya bo bwohono ba bákagyughu nde bákinjimi ya bályele ti: «Kunu oofi nde bunsughu bu ya bimaã bi?

⁵⁵ Bunu, wu ka li mwana a munkomo-manzo o? Ngughu a nde ka Mari o? Ya Dzake, Dzodzefe, Simō ya Yude ka bali bambwee ba nde o?

⁵⁶ Ya bankele ba nde bwohono ka ba bali ña kara li bihi o? Kunu-ako nde aabagha myehene mi?»

⁵⁷ Bo bákakubu makya mu nkooro a nde. Yiisu ályele kundaa bo ti: «Mubighili, ka baakagwa nde budiziri bibini byehene, lo ka mu nsie a ndeme ya mu dzumu li ndeme o.»

⁵⁸ Ya oko Yiisu ka ási bimaã bilagha o, mu kuulu bo ka báli a kana o.

14

Lipfu li Dzã Muboghoru

(Mar 6.14-29; Luk 9.7-9)

¹ Mu matala mamu, Erode mfumu a Ngalile, ágyughu nsia a Yiisu,

² ya ályele kundaa basala ba nde ti: «Munde Dzã Muboghoru aasighili ña kara li ba bápki! Ya me mu obo nde ali a lileene lili okabulusa bimaã».

³ Mu kuulu, Erode áli agwi litumu basyimi Dzã, bakuru nde misyi ya balo nde mu boloko mu nkooro a Erodyade, mukala a Filipe, mbwee a nde.

⁴ Mu kuulu Dzã ákalyele kundaa nde ti: «We ka li a muswa wu ogwolo mukaha munde o!»

⁵ Erode ákadzyi odzwa Dzã, lo nde ákabara mpwumu a baara mu kuulu yo yíkamono ti Dzã li mubighili.

⁶ Lo etsughu kii kyiri ki ndibili-a-mweẽ a et-sughu ki báburu Erode bu eto, mwana a Erodyade wu mukaha áyakini ña nkulu a baara ba ógwi Erode mampighi, ya Erode ámono esee mu nde.

⁷ Mu obo Erode ágwi nde misiini ya álaba mukihi ti: «Nswe elogho ki aaluomo we me, me sa ngwa we kye».

⁸ Mu luo li ngughu a nde, nde ályele kundaa Erode ti: «Gwa me ña munsa ndoõ mutswi a Dzã Muboghorol!»

⁹ Mukogho ányoõ, lo mu nkooro a mukihi wu aalaba ya mu nkooro a baara ba aagwi nde mpighi, nde ágwi litumu bayabiri nde mutswi a Dzã.

¹⁰ Erode átumu baara munsa boloko bayikehe Dzã bolo.

¹¹ Báyabiri mutswi a Dzã munsa ndoõ ya bágwi nde kundaa mutughu, ya mutughu ágyene a nde kundaa ngughu a nde.

¹² Binduono bi Dzã bígyi, bígwolo ebyimi e nde ya bídzyighi kye. Ña mbihi onjo, bo báytwoho nsia kundaa Yiisu.

*Yiisu buñunu mafwunu mataana ma babaghala
(Mar 6.30-44; Luk 9.10-17; Dzã 6.1-14)*

¹³ Yiisu bu agyughu nsia oyo, nde ámara onjo mu bwara ya ágyene ngasighi ku nkolo yi gwene a baara. Lo mampwumu ma baara bu masoolo obo, mápala mu mabvulu mamu ya mánama nde mu myili.

¹⁴ Nde bu apala mu bwara, ámono mpwumu a baara yi nene ya nde ámono bo nyiĩ, ya ábwi odzuhu babyele ba bo.

¹⁵ Nkonkolo bu yito, binduono bi Yiisu bíyasele ku bele a nde ya bílyele kundaa nde ti: «Ebini ki eli ki e nkeẽ ya bwihhi ayi ku ogyili. Bvurulu mampwumu ma baara magye mu mala mu oyiswumu bi-odza.»

¹⁶ Lo [Yiisu] ábvuhulu kundaa bye ti: «Bo ka bali a nzala a obvughuru o, ligwa bo bi-odza beme.»

¹⁷ Bye bílyele kundaa nde ti: «Bihi ki lili a kye ŋa, yini a mampa mataana ya banswi buolo.»

¹⁸ Mu obo, nde ályele kundaa binduono ti: «Ligya a me bye ŋa.»

¹⁹ Ya nde átumu mampwumu ma baara mabwa nsini ŋa yulu a nsele. Nde ágwolo mampa mataana ya banswi buolo, átala ku yulu, áseme bye, átsyiri bye ya ágwi kundaa binduono bi nde, ya binduono bíkaba bye kundaa mampwumu ma baara.

²⁰ Bo bwohonono báli, bágyughuru. Ya bábiriri bitubu kwumu ya byele (12) bi bílwulu mu bitsulu bi bísyili.

²¹ Babo ba báli bye áli bakughu oto mapfwunu mataana (5 000) ma babaghala, gwene otala bakaha ya baana ba basala.

Yiisu dzyara mu yulu a madza

(Mar 6.45-52; Dzã 6.15-21)

²² Ya ŋaana oŋo, Yiisu ásinini binduono bi nde bisomo munsá bwara ya bitswama ku nkulu a

nde ku ngulu a mubu, mu edzighi ki ákabvurulu
nde mampwumu ma baara.

²³ Ya bu amana obvurulu mampwumu ma
baara, nde ákumu ku yulu a munguo, mu oy-
isamana ngasighi. Nja ogyili bwihhi, nde áli oño,
ngasighi.

²⁴ Bwara áli ayi la ya mukogho a mubu. Mampo
ma madza ma manene mákabwa mu bo mu
nkooro a efulu kii mpini ki ékagya.

²⁵ Ku bele a ku ookya bwihhi, Yiisu ágyene
kundaa bo mu okabuludzyara mu yulu a mubu.

²⁶ Binduono bu bimono nde mu okadzyara nja
yulu a madza ma mubu, enkwughu ki enene
ésughuru mu bo ya bályele ti: «Ekye etoomo!» Ya
mu nzalamweë, bo bábwi okehe bingubu.

²⁷ Njaana oño, [Yiisu] átsughu ndagha kundaa
bo ti: «Likala a bukyini, wu me me, ka likala a
nzalamweë o!»

²⁸ Piere ályele kundaa nde ti: «Mfumu, kala ti wu
me we, lo gwa litumu mu kuulu me ngya kundaa
we mu yulu a madza.»

²⁹ Yiisu ályele nde ti: «Gya!»

Piere ásughuru mu bwara, ábwi odzyara mu
yulu a madza ya ábaana ogye kundaa Yiisu.

³⁰ Lo bu amono efulu kii mpini, Piere ábagha
nzalamweë, ya nde ábaana odzyama. Nde ákehe
engubu ya ályele ti: «Mfumu, bvuwu me!»

³¹ Ya njaana oño, Yiisu bu alabala kwogho,
ákwara nde ya ályele kundaa nde ti: «Mbwuru nga
a kana li lisala, mu emakye we aasi mikeme?»

³² Ya bu basomo mu bwara, efulu édzuunu.

³³ Ba báli mu bwara bákunu mabuo mu nsie nja
nkulu a nde ya bályele ti: «Mu enganma we li

Mwana a Nzaami!»

*Yiisu dzuhu babyele ku Ngenedzarete
(Mar 6.53-56)*

³⁴ Bu bapala mu ngulu a mubu, bo báto mu etsulu e nsie kii Ngenedzarete.

³⁵ Baara baba ebini ekye bu bagyahaba Yiisu, bátsala nsia a nde mu etsulu e nsie kyehehe, ya báyabiri babyele bwohono kundaa nde.

³⁶ Bábuono nde mu kuulu nde anyaa bo babyeme yini a nto a enkuru e nde. Baara bwohono ba bábyeme kye bádzughu.

15

*Ekulu ki bakwuru
(Mar 7.1-13)*

¹ Ba-Faridzyē ya baluo-mikyene báfi ku Yerusaleme ya bágyi kundaa Yiisu, ya báfwulu kundaa nde ti:

² «Mu emakye binduono bi we biigwene okanama ekulu ki bakwuru? Mu kuulu bo ka baakaswagha myaa mu matala mama odza o.»

³ Yiisu ábvuhulu kundaa bo ti: «Be mu emakye liigwene okanama mandagha ma ookatumu Nzaami ya be okasalala ekulu ki bakwuru ba be?

⁴ Mu kuulu Nzaami ályele ti: *Gwa taara ya ngughu a we budziri, ya ályele si ti: Munde wu aabiili taara a nde bwunu we ngughu a nde epwolo, bafaana odzwa nde.*

⁵ Lo be, be liikalyele ti nswe munde wu aalyele kundaa taara a nde bwunu we kundaa ngughu a

nde ti: “Bibye bi kaangwa me we mu obaha we, bili ekaba ki aangwa me kundaa Nzaami”,

⁶ lo mbwuru wu obo, ka li a nzala a ogwa taara bwunu we ngughu a nde budziri o. Obo me bu liikakahaba be Ndagha a Nzaami mu nkooro a ekulu ki bakwuru ba be.

⁷ Bampibi! Mubighili Edzayi ágyighili obighili mu be ña ályele nde ti:

⁸ *Ekaana ki okasyighi me yini a mu bibolo, lo mikolo mi bo mili la ya me.*

⁹ *Nsamana a bo mu me yi a bwunu, mu kuulu maluo ma bali mu okabululuo bo yini a mandagha ma ookatumu embwuru baakanama.»*

*Bi biikasumunu mbwuru
(Mar 7.14-23)*

¹⁰ Ña mbihi oño, bu ati mpwumu a baara mbili, nde ályele kundaa bo ti: «Ligyughu ya libaghala!

¹¹ Ka oli ki eekasomo mu muñma eekasumunu mbwuru o, lo me mimye mi miikapala mu muñma, miikasumunu mbwuru.»

¹² Oño binduono bíyasele ku bele a Yíisu ya bílyele kundaa nde ti: «We gyahaba ti ba-Faridzyé baamono mpara mu mikolo ña baagyughu bo mandagha ma we mamo?»

¹³ Yíisu ábvuhulu kundaa bo ti: «Nswe muti wuulu ka oli Taara a me mu yulu aakunu nde o, sa batumunu nde.

¹⁴ Linyaã bo! Bo bali binkpa-mihi bi biikabulubiri bambaala [binkpa-mihi]. Kala ti enkpa-mihi eekabulubiri mbaala enkpa-mihi, bye binsa byele sa biyibwa mu dzunu.»

¹⁵ Piere ályele kundaa nde ti: «Gwa bihi mbaala a nkumu [yi].»

¹⁶ Yiisu ábvuhulu ti: «Behe si nkini ka lili a mayele ma obaghala o?

¹⁷ Bunu, be ka lisoolo o ti bye byehene bi biikasomo mu munjma, biikasughuru mu mweë, ya baakatsili bye ku nto a nkwulu?

¹⁸ Lo mandagha ma maakapala mu munjma ku mukolo maakafa, ya me mo maakasumunu mbwuru.

¹⁹ Mu kuulu mu mukolo ookapala bitsimi bi bibi, odzwa baara, obvughu mbughu ya mukala bwunu we mulumu a nganda-mbwuru, enkwunu, pfyibi, bumpughulu bubu mpya, ot-saala babake.

²⁰ Bibye biikasumunu mbwuru! Lo odza kuulu myaã oswagha we, ka okughu osumunu mbwuru o.»

*Kana li mukaha wu a ku Kaana
(Mar 7.24-30)*

²¹ Na nseele Yiisu ámara onjo, ágyene ku etsulu e nsie kii Tire ya Sidō.

²² Mukaha mutsyini wu musu kaana wu áakakala mu etsulu e nsie ekye, ágyi kundaa Yiisu, ákakehe bingubu kundaa nde ti: «Mfumu, Mwana a Dabvide, mono me nyii! Mufulu wu mubi li mu okamwehē mwana a me wu mukaha kimini.»

²³ Yiisu ka ábvuhulu nde si ndagha mo o. Binduono bi nde bíyasele ya bílyele kundaa nde ti: «Bvurulu mukaha wu, mu kuulu nde li mu okayakehe bingubu ŋa mbihi a bihi-a-be.»

²⁴ Yiisu ábvuhulu kundaa bo ti: «Yini a kundaa bindoomo bi basi Isarayele bi bídzimini baag-weghe me.»

²⁵ Lo mukaha munde ágyi, ákunu mabuo ɲa nkulu a nde ya ályele ti: «Mfumu, baha me!»

²⁶ Yiisu ábvuhulu ndiri: «Ka oli bubwe o mu ogwolo mampa ma baana ya otsili mo kundaa baana ba bambwa.»

²⁷ Mukaha ályele ti: «Bwunu obo Mfumu! Lo baana ba bambwa baakadza mfi-mfihini yi aak-abwa ku nsie a tabele li bamfumu ba bo.»

²⁸ Oɲo Yiisu ábvuhulu kundaa mukaha ti: «Mukaha, kana li we lili li linene! Nyaã okala kundaa we bwunu a bu dzyi we.» Ya mwana a nde wu mukaha ádzughu mu matala maana mammo.

Yiisu dzuhu babyele balagha

²⁹ Yiisu bu amara oɲo, ágyene ku mukogho a mubu wu a Ngalile. Nde ákumu ku yulu a munguo ya ábwi nsini oko.

³⁰ Mampwumu ma baara balagha mágyi kundaa nde, báybiri banga a bipfwumu, binkpa-mihi, bikara, bankini ya babyele balagha bakimi. Bo bátwulu bo ɲa myili mi nde, ya nde ádzuhu bo.

³¹ Baara bákinjimi mu omono bankini mu obili, banga-a-bipfwumu mu odzughu, bikara mu odz-yara, binkpa-mihi mu omono. Ya bo bákasyighi Nzaami a Isaraye.

Yiisu buɲunu mafwunu mana ma babaghala (Mar 8.1-10)

³² Yiisu áti binduono bi nde mbili, ya ályele kundaa bo ti: «Me ndi a nyiĩ a mpwumu a baara yi, mu kuulu bitsughu bitere ayi bamaasa ɲa ya me, ya bo ka bali a bi-odza o. Me ka ndzyi

obvurulu bo ya nzala o, mara bayibwa-kulu mu nzili.»

³³ Binduono bílyele kundaa nde ti: «Kunsa syehe kunu, kunu-ako liibagha mampa ma malagha ma oogyughuru mpwumu a baara yi alagha yi?»

³⁴ Yiisu ályele kundaa bo ti: «Mampa kpe be lili a mo?» Bo bábvuhulu nde ti: «Nsaama, ya mana a binswi-nswi.»

³⁵ Yiisu átumu mpwumu a baara yibwa nsini ña nsie,

³⁶ ágwolo mampa nsaama ya banswi, bu abvuhulu matuono kundaa Nzaami, nde átsyiri mo ya ágwi mo kundaa binduono bi nde. Ya binduono bi nde bíkaba mo kundaa mampwumu ma baara.

³⁷ Bo bwohono báli ya bágyughuru. Ya bábiri bitubu nsaama bi bilwulu mu bitsulu bi bísyili.

³⁸ Babo ba báli bye báli mapfwunu mana (4 000) ma babaghala, gwene a otala bakaha ya baana ba basala.

³⁹ Ña mbihi, bu abvurulu mampwumu ma baara, nde ásomo munsá bwara ya ágyene ku etsulu e nsie kii Mangandane*.

16

*Ba-Faridzyē ya ba-Saduseyē basagha elyimi
(Mar 8.11-13; Luk 12.54-56)*

¹ Ba-Faridzyē ya ba-Saduseyē báyabehene kundaa Yiisu, ya bátsihi nde. Bo báluomo nde asuo bo elyimi ki eefa ku yulu.

* 15:39 15.39 Mangandanebwunu we Mangandala.

² Yiisu ábvuhulu kundaa bo ti: [«Ŋa ookadzyama tala, be liikalyele ti: “Sa okala a matala ma mabwe, buulu yulu libie.”

³ Ya mu epala be liikalyele ti: “Lolo mvulu sa anoŋ, mu kuulu yulu lipyini.” Be lisoolo obaghala bifa bi mayulu, lo be ka likughu obaghala bilyimi bibi matala o!]

⁴ Eseene ki ebi ya kii gwene a mukama mu Nzaami ki eli mu okasagha elyimi! Ka basuo kye elyimi o, kala ti ka kii Dzonase o.» Ya nde ábulusihi bo oŋo ya ágyene.

*Pfini li ba-Faridzyě ya ba-Saduseyě
(Mar 8.14-21)*

⁵ Binduono bi Yiisu bu bipala mu ngulu yinke yi mubu, bye bídzimini ogwolo mampa.

⁶ Yiisu ályele kundaa bye ti: «Limono ya lisa mayele mu pfini li ba-Faridzyě ya ba-Saduseyě!»

⁷ Bo bábwí otsimi bomo ya bályele ti: «Ampe mu kuulu bihi ka liigwolo mampa o.»

⁸ Lo Yiisu bu asoolo bitsimi bi bo, nde ályele kundaa bo ti: «Baara baba kana li lisala, mu emakye be liitsimi ti mu nkooro a bu ligwene a mampa?

⁹ Be nkini liibaghala o? Be limaadzimini nsimi a mampa mataana ma liikaba kundaa mapfwunu mataana (5 000) ma babaghala. Ya mutala a bitubu bi liitolo?

¹⁰ Ngu okala mampa nsaama ma liikaba kundaa mapfwunu mana (4 000) ma babaghala. Ya mutala a bitubu bi liitolo?

¹¹ Bunu, be ka liibaghala o ti me ka aambili kundaa be mu nkooro a mampa o, ŋa aandyele

me be ti: “Limono ya lisa mayele mu pfini li ba-Faridzyē ya ba-Saduseyē!”»

¹² Onjo bo bághala ti Yiisu ka ákabili mu osa mayele mu pfini li mampa o, lo mu maluo ma ba-Faridzyē ya ba-Saduseyē.

Piere lyele ti Yiisu me Kriste
(Mar 8.27-30; Luk 9.18-21)

¹³ Yiisu bu ato mu etsulu e nsie ki eli bele ya bvulu lili Sedzare lili Filipe, nde áfwulu kundaa binduono bi nde ti: «Mu mbiili a baara, Mwana a mbwuru nande ali?»

¹⁴ Bo bábvuhulu nde ti: «Mu bana ti me Dzã Muboghoru, babake ti me Eli, bakimi ti me Dz-eremi bwunu we mumõ ña kara li mibighili».

¹⁵ Yiisu áfwulu bo ti: «Lo mu be, me nande ndi?»

¹⁶ Simõ Piere ábvuhulu ti: «We li Kriste, Mwana a Nzaami wu a mweẽ.»

¹⁷ Mu obo, Yiisu ályele kundaa nde ti: «Esee kundaa we, Simõ mwana a Dzonase, buulu ka oli musunu ya makili biisuo we ndagha oyo o, lo Taara a me wu li mu mayulu.

¹⁸ Ya mehe si me ndyele kundaa we ti: We li limeẽ, ya ña yulu a limeẽ li me sa ntwu Libwunu li me. Ya lileene li lipfu ka libvulu lili lo mu mpini o.

¹⁹ Me sa ngwa we mankogholo ma Emfumu ki mayulu. Mamo ma aakuru we ña nsie, sa bakuru mo mu mayulu. Ya mamo ma akala aanyana we ña nsie, sa banyana mo mu mayulu.»

²⁰ Mu obo nde átswi binduono bi nde mukele binyaã olyele kundaa mbwuru si mumõ ti nde me Kriste.

*Yiisu bili mu lipfu ya osighili o nde
(Mar 8.31–9.1; Luk 9.22-27)*

²¹ Obaana mu matala mamu, Yiisu ábwi osuo epankala kundaa binduono bi nde ti: «Me mfaana okumu ku Yerusaleme ya omonu mpara yi alagha ña myaã mi bakwuru, bakwuru ba bangaa ba nzaami ya baluo-mikyene, bafaana odzwa me, ya mu etsughu kii bitere, me sa nsighili mu lipfu.»

²² Piere ábiri Yiisu mu libee, ábwi ofyẽ nde ya ályele kundaa nde ti: «Mfumu, nyaã Nzaami akala we mu mimye! Pele, mandagha mamu manyaã obwa mu we!»

²³ Lo nde bu akaghala, ályele kundaa Piere ti: «Satana, mara ña nkulu a me! We li kya mu nzili a me, mu kuulu bitsimi bi we ka bili bitsimi bi Nzaami o, lo bili bibi baara.»

Bunu-abo baakanama Yiisu

²⁴ Naana onjo, Yiisu ályele kundaa binduono bi nde ti: «Kala ti mbwuru dzyi onama me, lo atunu nyuru a ndeme, agwolo kuruwa li nde ya anama me.

²⁵ Mu kuulu, nswe munde wu dzyi obvwuhu laama li nde, sa apfihili lo. Lo munde wu aapfihili laama li nde mu nkooro a me, nde sa afiribagha lo.

²⁶ Nsa ndaana mbwuru aakala a yo, kala ti nde bagha busini bu nsie nsyini ya pfihili laama li nde? Bwunu we, emakye mbwuru akughu ogwa ki eli a mupfunu mu oswumu laama li nde?

²⁷ Mu kuulu, Mwana a mbwuru li mu ogya ya bangye-yulu ba nde kunsu nsia a Taara a nde.

Ya oŋo nde sa agwa kundaa mbwuru-mbwuru bwunu a bu oli bigyighili bi nde.

²⁸ Mu enganma me ndyele be ti: Babake ŋa kara li ba lili ŋa, ka bakpa o nsomo bamono Mwana a mbwuru mu ogya mu Emfumu e nde.»

17

Okighiri o Yiisu

(Mar 9.2-13; Luk 9.28-36)

¹ Bitsughu bisemene bu biluru, Yiisu ágwolo Piere, Dzake ya Dzã mbwee a Dzake, ya ábiri bo mu libee ku yulu a munguo wu mula.

² Nde ákighiri ŋa nkulu a bo: Edzili e nde ébwi osehene ti tala, binkuru bi nde bípeneme ti otsyeme.

³ Mono, Moyidze ya Eli báýamoŋono kundaa bo, mu okabili ya nde

⁴ Piere ályele kundaa Yiisu ti: «Mfumu! Oli bubwe ti bihi-a-be likala ŋa. Kala ti we dzyi, lo me ntwu bibvulu bitere ŋa, emõ kii we, emõ kii Moyidze, ya emõ kii Eli.»

⁵ Nde áli nkini mu okabili, mono, edzi kii otsyeme éfughu bo, ya mono, likyi lífi kunsa edzi ya lílyele ti: «Wu me Mwana a me wu mukolo, mu nde me aankamono esee, ligyughu nde!»

⁶ Binduono bu bigyughu obo, bíbwi mapfumunu masu mu nsie, bye bíli a nzalamweẽ yi alagha.

⁷ Yiisu áyasele, bu aberene bo ályele ti: «Litemene! Ka likala a nzalamweẽ o.»

⁸ Bu basiili masu ma bo, bo bámono yini a Yiisu ngasighi.

⁹ Njaala bo mu okakumunu munguo, Yiisu átswi bo mukele wu: «Ka lilyele kundaa mbwuru si mumõ o, mandagha ma liimono be, tee etsughu ki oosighili Mwana a mbwuru ña nsa ba bákpí.»

¹⁰ Binduono bífwulu kundaa nde ti: «Mu emakye baluo-mikyene baakalyele ti Eli faana ogya nsomo?»

¹¹ Nde ábvuhulu kundaa bo ti: «Nganma! *Eli faana ogya mu obvurulu bilogho byehene nsumu.*

¹² Lo me ndyele kundaa be ti Eli maagya, ya baara ka baasoolo nde o, lo baasi nde nswe mimye mi baadzyi bo. Bwunu obo si, bo sa bamwehẽ Mwana a mbwuru mpara.»

¹³ Njaana onjo binduono bíbaghala ti nde mu Dzã Muboghoru ákabili kundaa bo.

*Yiisu dzuhu mwana nga-a-mufulu wu mubi
(Mar 9.14-29; Luk 9.37-43)*

¹⁴ Bu bato ña bele a mpwumu a baara, mbwuru mumõ áyakunu mabuo ña nkulu a Yiisu,

¹⁵ ya ályele ti: «Mfumu, mono mwana a me wu baghala nyĩ, mu kuulu nde li a ebyele ki nzyere ya li mu okamono mpara yi alagha. Emvulugughu nde aakabwa ku mbaa bwunu we mu madza.

¹⁶ Me aambiri nde kundaa binduono bi we, lo bye ka biileene odzuhu nde o.»

¹⁷ Yiisu ábvuhulu ti: «Aa! Eseene ki egwene a kana ya ki egwunumu! Tee nki matala me aankuru mukolo mu be? Ligya a me nde ña.»

¹⁸ Yiisu áñaã mufulu wu mubi ebaghala, nde ápala mu mwana ya mu matala maana mamó, mwana ádzughu.

¹⁹ Mu obo binduono bíyasele kundaa Yiisu, bífwulu nde ɲa ebini kii bo ngasighi ti: «Mu emakye bihi liikwono obyí mufulu wu mubi munde?»

²⁰ Nde ábvuhulu kundaa bo ti: «Mu nkooro a kana li be li lisala. Mu enganma me ndyele kundaa be ti, kala ti be lili a kana li linene ti liburu li muti a mutaade, be sa lilyele kundaa munguo wu ti: “Mara ɲa. Gye kunii”, ya nde sa agye. Ka oli a ndagha yi liikuono a be o.» [

²¹ Lo yini a mu lisamana ya mu okuru nswele mu bala be likughu obyí mufulu wu obo].

Yiisu firibili mu lipfu ya osighili o nde mu lipfu (Mar 9.30-32; Luk 9.43-45)

²² Etsughu nga-emō, bu babvuɲunu ku Ngalile, Yiisu ályele kundaa bo ti: «Sa batyeghe Mwana a mbwuru ɲa myaã mi baara,

²³ bo sa badzwa nde, ya mu etsughu kii bitere, nde sa asighili mu lipfu.» Binduono bísomo kunsá minyoō mi milagha.

Ofiri mpagha a Nzo a nzaami

²⁴ Bu bato ku Kaperenawume, mintolo-mpagha míyasele kundaa Piere ya mífwulu kundaa nde ti: «Bunu, Muluo a be ka aakafiri mpagha a Nzo a nzaami o?»

²⁵ Nde ábvuhulu ti: «Nde aakafiri yo.» Piere bu abvughuru ku nzo, Yiisu átswama olyele kundaa nde ti: «Simō, we bunu tsiimi, mikogho mi nsie, kundaa bana miikaluomo mi bátsyiri ya mpagha? Kundaa baana ba bomu bwunu we kundaa banzyi?»

²⁶ Piere ábvuhulu ti: «Kundaa banzyi». Yiisu ályele ti: «Mu obo, baana ka baakafiri o.

²⁷ Mu kuulu bihi a we linyaã okala makya kundaa baara, gye yitubu ndobo mu mubu. Gwolo nswi wu a nsomo wu aalobo we, dzubulu munjma a nde, we sa mono mupara. Gwolo nde ya gye yigwa bo nde mu nkooro a me ya we.»

18

*Wu bvulu bukwuru mu Emfumu ki mayulu
(Mar 9.33-37; Luk 9.46-48)*

¹ Mu matala mamu, binduono bi Yiisu bíyasehe kundaa nde ya bifwulu nde ti: «Nande bvulu bukwuru mu Emfumu ki mayulu?»

² Nde bu ati mwana wu asala mbili, átwulu nde ŋa kara-a-kara li bo

³ ya ályele ti: «Mu enganma me ndyele kundaa be ti, kala ti be ka ligyiŋi mayele ya likala ti anga baana ba basala o, lo be ka lisomo mu Emfumu ki mayulu o.

⁴ Mu obo, nswe munde wu akughulu ti anga mana mwana wu, me munde wu bvulu bukwuru mu Emfumu ki mayulu.

⁵ Ya munde wu aagyagha mwana ti anga wu mu nkwumu a me, lo meme nde agyagha.»

*Osa mayele
(Mar 9.42-48; Luk 17.1-2)*

⁶ «Nswe munde wu aabwihi mu lisumu, mumõ mu bike-bike bi biikasa kana mu me bi, lo bubwe bakuru nde limeẽ li linene mu nkyighi, batsili nde ku nsie a mubu.

⁷ Nyiĩ kundaa baara ba nsie yi, mu kuulu mi miikasa ti baara bakubu makya, mili milagha! Mu enganma, okubu makya ofaana okala, lo nyiĩ kundaa mbwuru wu aakasa ti babake bakubu makya!

⁸ Kala ti kwogho bwunu we kwulu e we eekab-wihi we mu masumu, tsyiri kye tsili, kye la ya we. Obvulu bubwe kundaa we mu osomo mu laama li enganma ya kwogho bwunu we kwulu etsyini, ya bu kala a myaã ya myili minsa myele ya batsili we ku mbaa yi a mibvu ya mibvu.

⁹ Ya kala ti lihi li we liikabwihi we mu masumu, lo sorolo lo, tsili lo la ya we. Obvulu bubwe kundaa we mu osomo mu laama lili enganma ya lihi limõ, ya bu kala a mihi minsa myele ya batsili we ku mungele a mbaa.»

¹⁰ «Lisa mayele! Ka libele mwana si mumõ mu bike-bike bi o, mu kuulu me ndyele kundaa be ti, mu mayulu, bangye-yulu ba bo baakateme matala mwohononja nkulu a Taara a me wu li mu mayulu. [

¹¹ Mu kuulu Mwana a mbwuru aagyi mu obvwuhu babo ba bádzimini.]

*Nkumu yi a endoomo ki édzimini
(Luk 15.3-7)*

¹² Be bunu litsimi? Kala ti mbwuru li a bindoomo nkama (100), ya emõ mu bye egwunumu, nde ka asihi bindoomo makwumu-wa ya wa (99) ku yulu a munguo mu oyisagha ekye ki eegwunumu o?

¹³ Ya kala ti nde mono kye, mu enganma me ndyele kundaa be ti, nde sa akala a esee ki ebvulu

mu kye, ya ki ali a nde mu bindoomo makwumu-wa ya wa (99) bi biigwene ogwuñumu.

¹⁴ Bwunu obo si, Taara a be wu li mu mayulu dzyi ti si mumõ mu bike-bike bi ka dzimini o.»

Na ookabwa nganda-mbwuru mu masumu

¹⁵ «Kala ti nganda-mbwuru gyighili we ndagha yi mbi, gye yimono nde ya syeme nde ña o be buolo. Kala ti nde gyughu we, lo we aafiribagha nde.

¹⁶ Lo, kala ti nde ka gyughu we o, gwolo mbwuru mumõ bwunu we baara buolo bakimi bakala ya we, mu kuulu ligyighili ndagha oyo ña nkulu a bampughulu buolo bwunu we batere.

¹⁷ Kala ti nde bihi ogyughu bo, lo lyele ndagha oyo ña nkulu a emvununu e nzaami. Ya kala ti nde bihi ogyughu emvununu e nzaami, lo nyaã nde akala kundaa we ti anga mbwuru wu aagwene okasa kana mu Nzaami, bwunu we muntolo-mpagha.»

¹⁸ «Mu enganma, me ndyele kundaa be ti: Nswe ndagha yi akala liikuru be ña nsie sa bakuru yo mu mayulu, ya nswe ndagha yi akala liinyana be ña nsie, sa banyana yo mu mayulu.»

¹⁹ Me firindyele be ti: «Kala ti baara buolo ña kara li be bagwihini ña nsie mu oluomo ndagha nswe ndagha mu lisamana, lo Taara a me wu li mu mayulu sa agyighili bo yo.

²⁰ Mu kuulu, onjo ña oobvununu baara buolo bwunu we batere mu nkwumu a me, me ndi ña kara li bo.»

Nkumu yi a musala wu aagwene okasa kolokolo

²¹ Onjo, Piere áyasele ña ndaa Yiisu ya áfwulu nde ti: «Mfumu! Mansa kpe me mfaana osa nganda-mbwuru kolokolo, kala ti nde gyighili me ndagha yi mbi? Tee mansa nsaama?»

²² Yiisu ábvuhulu kundaa nde ti: «Me ka ndyele kundaa we ti tee mansa nsaama o, lo tee mansa makwumu nsaama (70) mbala nsaama.

²³ Me mu obo Emfumu ki mayulu efaana ti bu: Mukogho mutsyini ádzyi ti basala ba nde basuo nde bu basalala bo nzi a nde.

²⁴ Mu obaana, báyabiri kundaa nde munde wu áli a ebyimi ya nde kii mafwunu mwolo (10 000) ma mipara.

²⁵ Buulu nde ka áli a nzi yi ofiri ebyimi ekye o, mfumu a nde ágwi litumu batyeghe nde, mukala a nde, baana ba nde ya bilogho bi nde byehene, mu kuulu bafiri ebyimi e nde.

²⁶ Mu obo, musala ábwi ña nsie a myili mi mfumu a nde, ákunu mabuo ña nsie ya ályele ti: “Makuru mukolo a we mu okebe, ya sa me mfiri ebyimi e we kyehe.”

²⁷ Mfumu bu ámono musala a nde nyiĩ, nde ányaghala ebyimi e nde, ya ányaã nde agye.

²⁸ Musala munde bu apala, ábwana a mumõ mu banganda ba nde baba esala wu áli a ebyimi ya nde kii nkama (100) a mipara mimi bisyeẽ. Nde ábwirili nde, ápyere nde ña bolo, ya ályele kundaa nde ti: “Firi ebyimi ki ásuomo we kundaa me.”

²⁹ Nganda a nde ákunu mabuo ña nsie ña nkulu a nde, ya ábuono nde ti: “Makuru mukolo a we mu okebe, ya me sa mfiri ebyimi e we kyehe.”

³⁰ Lo wu muke ábihi, nde ágyene áyilo nde mu boloko tee mu matala ma áfiri nde ebyimi ekye.

³¹ Basala babake bu bamono mi míluru, basomo kunsá minyoõ mi milagha ya báytwoho myehene mi míluru kundaa mfumu a bo.

³² Mu obo, mfumu áti nde mbili ya ályele kundaa nde ti: “We li musala wu mubi! Me aanyaghala ebyimi e we kyehehe mu nkooro a bu aabuno we me.

³³ Wehe si, we áli faana omono nganda a we nyiĩ ti bu aamono me we nyiĩ.”

³⁴ Ya mu nkehe, mfumu ágweghe nde mu oyisala engaama tee ña aamana nde ebyimi kyehehe ofiri».

³⁵ Yiisu áfiribwehe ndiri: «Bwunu obo si Taara a me wu li mu mayulu akala aasa mu be, kala ti mbwuru-mbwuru mu be ka si nganda kolokolo mu mukolo a nde mumõ o.»

19

Maluo ma Yiisu mu mi mitala odzwa mabala (Mar 10.1-12)

¹ Yiisu bu amana ogwa maluo mamó, nde ámara ku Ngalile, ya ágyene ku etsulu e nsie kii Yude, ku ngulu a mwele wu a Dzurudě.

² Mampwumu ma baara mánama nde, ya oko nde ádzuhu babyele balagha.

³ Ba-Faridzyě báyasele kundaa Yiisu mu otsihi nde. Bo báfwulu nde ti: «Mu mikyene mi bihi-a-be, mbwuru li a muswa mu obyi mukala a nde mu nswe ebili?»

⁴ Yiisu ábvuhulu kundaa bo ti: «Be nkini lítala mandagha ma básono mu mukaana a Nzaami o ti: “Mu ebaana, Mugyighili ámyene bo baghala ya mukaha?”

⁵ Ya Nzaami ályele ti: *“Me mu obo, baghala faana osihi nzo a taara ya ngughu a nde mu oyikala emõ ya mukala a nde, ya bo bansa buolo sa bakala mbwuru mumõ”*.

⁶ Mu obo, bo ka bafirikala baara buolo o, lo bo ayi mbwuru mumõ. Nyaã mbwuru ka kabala ba óbvughu Nzaami o!»

⁷ Ba-Faridzyë báfíwulu nde ti: «Mu emakye Moyidze ágwi baghala muswa wu ogwa mukala a nde mukaana wu odzwa mabala, ña ali mu okabyi nde?»

⁸ Yiisu ábvuhulu kundaa bo ti: «Mu nkooro a mikolo mi be mi mikubu Moyidze ágwi be muswa mu obyi bakala ba be. Lo ku ebaana, ka óli obo o.

⁹ Lo me ndyele kundaa be ti: Nswe munde wu aabyi mukala a nde, kala ti ka oli mu enkwunu o, ya nde kye mukaha mukimi, lo nde bukala asi.»

¹⁰ Binduono [bi nde] bílyele kundaa nde ti: «Kala ti leme me lilo mulumu afaana okala a lo ña nkulu a mukala a nde, lo ka oli mupfunu mu okye o.»

¹¹ Yiisu ábvuhulu kundaa bo ti: «Ka oli baara bwohono baabaghala maluo [ma o]. Lo yini a babo ba ógwi Nzaami muswa mu obaghala mo.

¹² Baara bana ka bakye o, mu kuulu bo bali bamfi obaana emburu-ngughu. Ba bake, bákala bamfi mu ku bágwogholo bo. Ba bake si bákala bamfi mu nkooro a Emfumu ki mayulu. Nyaã wu kughu obaghala, abaghala!»

*Yiisu seme bike-bike
(Mar 10.13-16; Luk 18.15-17)*

¹³ Baara báyabiri bike-bike kundaa Yiisu, kuulu nde anaã bye myaã ya asamana mu nkooro a bye. Lo binduono bísyeme baara babo.

¹⁴ Mu obo, Yiisu ályele ti: «Linyaã bike-bike bigya, ka likahaba bye mu ogya kundaa me o, mu kuulu Emfumu ki mayulu eli kii ba bali ti anga bye.»

¹⁵ Ya bu amana onaã bye myaã, nde ámara ña ebini ekye.

*Yiisu ya mumpala wu esini
(Mar 10.17-31; Luk 18.18-30)*

¹⁶ Ya mono, baghala mutsyini áyasele kundaa Yiisu, ya ályele nde ti: «Muluo, emakye ki ebwe me mfaana osa mu obagha laama lili mibvu ya mibvu?»

¹⁷ Yiisu ályele kundaa nde ti: «Mu emakye we li mu ogwa me efwulu mu mi mibwe? Yini a mumõ li mubwe. Kala ti we dzyi osomo mu laama lili mibvu ya mibvu, kebe mikyene.»

¹⁸ Baghala munde áfwulu kundaa Yiisu ti: «Nki mikyene?» Yiisu ábvuhulu nde ti: «Ka dzwa o, ka bvughu mbughu ya mukala bwunu we mulumu a nganda-mbwuru o, ka kala mpughulu wu a mpya o, ka turu o,

¹⁹ gwa taara a we ya ngughu a we budziri, ya Dzyi nganda-mbwuru ti anga weme.»

²⁰ Mumpala munde ályele kundaa nde ti: «Mye myehene mimye me aakansalala mye. Emakye me nkughu ofirisa?»

²¹ Yiisu ályele kundaa nde ti: «Kala ti we dzyi okala mukughu, lo gye, tyeghe bi li a we ya gwa

nzi kundaa bawele, ya we sa bagha busini mu mayulu. Na mbihi oño, gya, nama me!»

²² Lo, mumpala munde bu agyughu ndagha oyo, ágyene kunsá minyoõ, mu kuulu nde áli a busini bulagha.

²³ Yiisu ályele kundaa binduono bi nde ti: «*Mu enganma* me ndyele yo kundaa be, oli mpara kundaa esini mu osomo mu Emfumu ki mayulu.

²⁴ Me firindyele kundaa be ti, ka oli a mpara o kundaa nyama wu baakata Syamo mu oluru mu kuhu li nyoõ, lo obvulu a mpara kundaa esini mu osomo mu Emfumu e Nzaami.»

²⁵ Binduono bi Yiisu bu bigyughu ndagha oyo, bíkinjimi ku olagha ya bílyele ti: «Lo nande kughu obvwughu?»

²⁶ Yiisu bu atala kundaa bo, ályele ti: «Kundaa baara, ka okughu okala o, lo kundaa Nzaami myehene mikughu okala.»

²⁷ Mu obo, Piere ályele kundaa Yiisu ti: «Mono, bihi liisihi byehene mu onama we. Bunu ookala kundaa bihi?»

²⁸ Yiisu ábvuhulu kundaa bo ti: «*Mu enganma*, me ndyele kundaa be ti, mu matala ma obwa Mwana a mbwuru nsini ña likubu li nde lili nsia mu nsie yi nyaghara, be ba liinama me, behe si sa libwa nsini ña makubu kwumu ya mwolo (12) mu osa madzumu kwumu ya mwolo (12) mama Isarayele muyala.

²⁹ Ya nswe munde wu aasihi manzo, bankele ba nde ba babaghala ya ba bakaha, taara, ngughu, baana, bwunu we manseghe mu nkooro a nkumu a me, lo nde sa abagha bye ku obvulu mansa nkama (100), ya sa abagha pfa lili laama

lili mibvu ya mibvu.

³⁰ Balagha ba bali ba bansomo mu matala ma, sa bakala binsiele-mbihi, ya balagha ba bali binsiele-mbihi sa bakala ba bansomo.»

20

Nkumu yi basala baba tala lili masini

¹ «Emfumu ki mayulu eli ti anga mfumu a nzo wu pala mu epala-epala, mu kuulu agwolo basala ba baayisala mu nseghe a nde yi a bviini.

² Nde ágwihini ya basala babo mu ofiri bo mupara mumõ mu etsughu, ya nde ágweghe bo ku nseghe a nde yi a bviini.

³ Mu tala lili wa, nde bu afiripala mu nzo, ámono baara bakimi ba bátemene ña ebini emõ gwene a ki baasa.

⁴ Nde ályele kundaa bo ti: “Behe si ligye ku nseghe a me yi a bviini, ya me sa ngwa be mufuru wu a kughu.”

⁵ Bo bágyene. Ya nde bu áfiripala mu tala lili embehe*, ya mu lili kwumu ya mataana (15), nde ási bwunu obo.

⁶ Ku bele a tala lili kwumu ya nsaama (17), nde bu afiripala, ámono babake bátemene oño ya nde ályele kundaa bo ti: “Mu emakye be liitemene ña bwihi butsyini, ku ogwene a elogho osa?”

⁷ Bo bábvuhulu kundaa nde ti: “Mu kuulu ka oli a mbwuru wu aagwolo bihi mu osala o.” Nde ályele kundaa bo ti: “Behe si ligye ku nseghe a me yi a bviini.”

* **20:5 20.5***Embehe* tala lili kwumu ya mwolo (12), li baakata si ntaña a minsene.

⁸ Nkonkolo bu yito, nga-a-nseghe a bviini ályele kundaa wu aakatumu basala ba nde ti: “Ta basala mbili, ya gwa bo mufuru a bo, obaana mu ba aangwolo me nseele ya mana mu baba nsomo.”

⁹ Baba tala lili kwumu ya nsaama (17) bágyi, ya mbwuru-mbwuru ábagha mupara mumō-mumō.

¹⁰ Na masini, ba bansomo bágyi, ya bo bákatsimi ti bo sa babagha mufuru wu bvulu, lo boho si bábagha mupara mumō-mumō mu mbwuru.

¹¹ Bu bagyagha mufuru, bo bábwi onjununu mu nga-a-nzo.

¹² Bo bályele ti: “Baba nsiele ba baasala yini a tala limō, lo we ofuru bo mutala mumō ya bihi ba liimono mpara mu osala bwihhi bu mpwunju† kunsu kyanana kii mpini!”

¹³ Nga-a-nseghe ábvuhulu kundaa mumō mu bo ti: “Ndughu a me, me ka ndi a epfwumu kundaa we o, bihi a we ka liigwihini mu mupara mumō o?”

¹⁴ Gwolo mufuru a we ya mara ŋa. Me ndzyi ogwa kundaa wu aagyí nsiele wu ti bu aangwi me we.

¹⁵ Me ka ndi a muswa wu ogyighili mi ndzyi mu nzi a me o? Bunu, we mukolo mubi mu kuulu me ndi mbwuru wu mubwe?”

¹⁶ Mu obo, baba nsiele sa bakala baba nsomo, ya baba nsomo sa bakala baba nsiele.»

Yiisu firibili mu lipfu ya osighili o nde mu lipfu (Mar 10.32-34; Luk 18.31-34)

¹⁷ Mu matala ma ókagye Yiisu ku Yerusaleme, mu nzili nde ábiri [binduono] kwumu ya bye (12) mu libee, ya ályele kundaa bo ti:

† 20:12 20.12 bwihhi bu mpwunjumbaala ti etsughu ki etsyini.

¹⁸ «Mono! Bihi-a-be lili mu okakumu ku Yerusaleme, ya sa bagwa Mwana a mbwuru ŋa myaã mi bakwuru ba bangaa ba nzaami ya baluo-mikyene. Bo sa bagwolo mukakana wu odzwa nde,

¹⁹ ya sa bagwa nde ŋa myaã mi baala ka bali ba-Dzwife o. Bo sa basa nde munsensehẽ, bakaha nde nswa-nswa, bakomo nde ŋa kuruwa, ya mu etsughu kii bitere, nde sa asighili mu lipfu.»

*Oluomo o ngughu a Dzake ya Dzã
(Mar 10.35-45)*

²⁰ Naana oŋo, ngughu a baana ba Nzebede ásele kundaa Yiisu ya baana ba nde ba babaghala. Ya nde ákunu mabuo mu nsie mu oluomo ndagha mō kundaa nde.

²¹ Yiisu áfwulu nde ti: «We emakye dzyi?» Nde ábvuhulu kundaa Yiisu ti: «Sa kuulu ti, ŋa aakala we mukogho, baana ba me buolo ba babwa nsini ya we, mumō ku ngo-kwogho, ya wu muke ku engbambogho.»

²² Yiisu ábvuhulu ti: «Be ka lisoolo mi lili mu okaluomo be o. Bunu, be likughu oŋma ebaha kii kimini ki aaŋma me?» Bo bábvuhulu kundaa nde ndiri: «Bihi likughu.»

²³ Yiisu ályele kundaa bo ti: «Ebaha e me, be sa liŋma kye. Lo mu mi mitala obwa nsini ku ngo-kwogho e me ya ku engbambogho e me, me ka ndi a litumu lilo o, bibini bibye bili bibi babo ba ogyighili Taara a me bye.»

(Mar 10.42-45; Luk 22.24-27)

²⁴ Binduono kwumu bibike bu bigyughu obo, ka bámono esee mu naana ya mbwee o.

²⁵ Yiisu áti bo mbili ya ályele kundaa bo ti: «Be lisoolo ti bitumu bi mansie biikamwehẽ baara mpara mu litumu li bo, ya baara baba mupfunu baakasuo leme li emfumu e bo ɲa yulu a babake.

²⁶ Ka ofaana okala obo ɲa kara li be o. Lo, munde wu dzyi okala mukwuru ɲa kara li be, nyaã nde akala esala e be.

²⁷ Ya kala ti mbwuru mu be dzyi okala wu a nsomo, nyaã nde akala nkana a be.

²⁸ Me mu obo Mwana a mbwuru ka agyi mu kuulu baara basalala nde o, lo mu osalala ya ogwa laama li nde mu ofiri ekolo mu baara balagha.»

*Yiisu dzuhu binkpa-mihi byele
(Mar 10.46-52; Luk 18.35-43)*

²⁹ Yiisu ya binduono bi nde bu bakapala mu bvulu lili Dzeriko mpwumu a baara yi nene yíluono nde.

³⁰ Ya, binkpa-mihi byele bíbwi nsini mu mukogho a nzili. Bo bu bagyughu ti Yiisu li mu okaluru, bábwí okehe bingubu: «Mfumu, Mwana a Dabvide, mono bihi nyĩ!»

³¹ Mpwumu a baara yífyee bo mu ebaghala mu kuulu bo bakala pii. Lo bo bábvulu ofirikakehe bingubu mu mpini: «Mfumu, Mwana a Dabvide, mono bihi nyĩ!»

³² Yiisu bu atemene, áti bo mbili ya ályele kundaa bo ti: «Emakye be lidzyi ti me nsa mu be?»

³³ Bo bábvuhulu nde ti: «Mfumu, nyaã we dzubulu bihi mihi!»

³⁴ Yiisu ámono bo nyĩ, áberene a mihi mi bo, ya ɲaana oɲo, bo bábwí omono ya bánama nde.

21

*Yiisu somo mu Yerusaleme
(Mar 11.1-11; Luk 19.28-40; Dzã 12.12-19)*

¹ Bu bayabehene ya Yerusaleme ya bato ña Betefadze, ña bele a Munguo wu a mi-Olibve, Yiisu ágweghe binduono byele.

² Nde ályele kundaa bo ti: «Ligye ku bula bu buli ña nkulu a be, ya oño, be sa limono eburu e aane ki baakuru ya mwana a nde. Linyana ya liyabiri me bye.

³ Ya kala ti mbwuru lyele be ndagha, be libvuhulu kundaa nde ti: “Mfumu li a nzala a bye.” Ya nde sa anyaa bye bigye.»

⁴ Mandagha ma mábwi mu kuulu mi ólyele mubighili mitswighi:

⁵ «*Lilyele kundaa mutughu wu a Siyõ ti:
Mono mukogho a we li mu ogya kundaa we,
nga-a-edzuunu, ya nde aakumu ña yulu a eburu e
aane,
ña yulu a pulu li aane, mwana a nyama wu akabiri
bi biri.*»

⁶ Binduono bígyene ya bísi bwunu a bu ótumu bo Yiisu.

⁷ Bo bágyene a eburu e aane ya pulu li aane, bátwulu ña yulu a biko bi bo, ya Yiisu ábwi nsini ña yulu a nde.

⁸ Mpwumu a baara yi alagha yíkagyala binkuru mu nzili, baara babake bátsyiri matsyiri ma miti* ya bágyala mo mu nzili.

* **21:8** *21.8Matsyiri ma miti* ku ebaana basono ti: Bakatsyiri mampala ma miti ya bakagyala mo mu nzili (mu osa Yiisu nsia)

⁹ Mampwumu ma máli ku nkulu ya ma máli ku mbihi a nde mákabalubiili bingubu:

«*Odzaana kundaa Mwana a Dabvide!*

Liseme kundaa munde wu li mu ogya mu nkwumu a Mfumu!

Odzaana mu bibini bi bili ku nkara a yulu!»

¹⁰ Yiisu bu asomo mu Yerusaleme, bvulu lwohono línyinji ya baara bákalyele ti: «Wu nande?»

¹¹ Mampwumu mákabvuhulu ti: «Wu me Yiisu, mubighili wu a ku Nadzarete, mu Ngalile.»

Yiisu mu nzo a Nzaami

(Mar 11.15-19; Luk 19.45-48; Dzã 2.13-22)

¹² Yiisu bu asomo mu nzo a Nzaami, nde ábyi bo bwohono ba bákatyeghe ya ba bákaswumu munsa nzo a Nzaami, átsili batabele ba baakasobo nzi ya bipehe bi minta-nkaala a mabeeme ku mbala.

¹³ Ya nde ályele kundaa bo ti:

«*Básono ti: “Nzo a me sa bata yo nzo yi a lisamana”.*

Lo be liikirili yo ngala a bantwumu!»

¹⁴ Binkpa-mihi ya banga-a-bipfwumu báyasele kundaa nde munsa nzo a Nzaami, ya nde ádzuhu bo.

¹⁵ Bakwuru ba bangaa ba nzaami ya baluo-mikyene ka bámono esee o, bu bamono mandagha mama okinjimi ma ókagyighili Yiisu, ya bike-bike bi bíkabiili bingubu munsa Nzo a nzaami ti: «*Odzana kundaa Mwana a Dabvide!*»

¹⁶ Bo bályele kundaa nde ti: «Bunu, we li mu ogyughu bu bali mu okalyele bo?» Yiisu ábvuhulu kundaa bo ti: «Eě! Bunu, be nkini ka lítala o ti:

“We ási kuulu ti miŋma mi mana bike-bike ya mimi ba bali mu okaŋma mabyene, miwa we masyighi?”»

17 Ya bu abulusihi bo oŋo, nde ápala mu bvulu ya ágyene ku Betani, ku áluhu nde mpyibi.

Yiisu gwi muti a finge epwolo

(Mar 11.12-14; 11.20-24)

18 Mu minkya-nkya, Yiisu bu akayabvughuru ku bvulu, nzala yifuru nde.

19 Yiisu bu ataala mufinge mu mukogho a nzili, áyabehene ya nde, lo nde ka ámono elogho o, yini a matsyiri. Nde ályele kundaa nde ti: «Si okala ka bunu, we ka kughu ofiriburu bimburu o!» Ya mufinge ásaakee.

20 Binduono bu bimonu obo, bíkiŋimi ya bílyele ti: «Bunu-abo mufinge aasaakee?»

21 Yiisu ályele kundaa bo ti: «Mu enganma me ndyele kundaa be ti, kala ti be lili a kana ya ka lisi mikeme o, be ka ligyighili yini a mi nsi me mu mufinge o, lo be lilyele kundaa munguo wu ti: “Mara oŋo ya yibwa mu mubu”, lo sa okala obo.

22 Nswe ki akala liiluomo be mu lisamana, bu lisi kana, be sa libagha kye.»

Litumu li Yiisu kunu liikafa?

(Mar 11.27-33; Luk 20.1-8)

23 Yiisu ásomo mu nzo a Nzaami. Mu matala ma ákaluo nde, bakwuru ba bangaa ba nzaami ya bakwuru ba ba-Dzwife báyasele ya bályele kundaa nde ti: «Mu nsa litumu we li mu okabulugyighili mamo? Ya na aagwi we litumu lilo?»

24 Yiisu ábvuhulu kundaa bo ti: «Mehe si ndi a efwulu, yini a emõ ki aangwa me be, kala ti be

ligwi me mvuru, mehe si sa ndyele kundaa be munsa litumu me ndi mu okabulugyighili mamu.

²⁵ “Nande áagweghe Dzã mu oboghoru baara? Nzaami bwunu we baara?” Bo báfuhunu bo-a-bo ndiri: Kala lilyele ti: “Nzaami”, nde sa alyele kundaa bihi-a-be ti: “Bu mu emakye be liigwene okasa kana mu nde?”

²⁶ Ya limana olyele ti: “Baara”, bihi-a-be lifaana osa mayele mu mpwumu a baara, mu kuulu baara bwohono baakagwolo Dzã ti mubighili.»

²⁷ Mu obo, bo bábvuhulu kundaa Yiisu ti: «Bihi ka lisoolo.» Ya ndehe si ályele kundaa bo ti: «Mehe si ka andyele be munsa litumu me ndi mu okabulugyighili mamu o.»

Nkumu yi a baana buolo ba babaghala

²⁸ Yiisu áfirilyele ti: «Be bunu litsimi mu ndagha yi? Baghala mumõ áli a baana buolo. Bu ayasele kundaa wu a nsomo, ályele kundaa nde ti: “Mwana me, gye yisala lolo ku nseghe a bviini.”

²⁹ Mwana ábvuhulu kundaa nde ti: “Me ka ndzyi o”. Ya mana matala bu maluru, mwana ásobo bitsimi ya ágyene ku nseghe a bviini.

³⁰ Nde bu ayasele kundaa wu a buolo, ályele kundaa nde bwunu obo. Mwana ábvuhulu kundaa nde ti: “Mfumu, me ndi mu ogye”. Lo, ka ágyene o.

³¹ Mu bo buolo nande aasi waa li taara a nde?» Bo bábvuhulu ndiri: «Wu a nsomo». Yiisu ályele kundaa bo ti: «Mu enganma, me ndyele kundaa be ti, mintolo-mpagha ya bakaha banga-a-enkwunu sa batswana nkulu ya be mu Emfumu e Nzaami.

³² Buulu Dzã ali aagyi kundaa be mu nzili yi a bunsumu, ya be ka liisi kana mu nde o, lo mintolo-mpagha ya bakaha banga-a-enkwunu baasi kana mu nde. Ya ku nkulu, be bu limono obo, be ka liigyinji mayele o mu osa kana mu nde.»

*Nkumu yi binkamana bi bviini bi bibi
(Mar 12.1-12; Luk 20.9-19)*

³³ «Ligyughu nkumu yinke. Óli a nga-a-nzo wu ákunu nseghe a bviini. Nde ási yo ekagha, átsimi dzunu li baakakamana mala ya átwu nzo yi mutele wu mula. Ya ña mbihi, nde ágwihini ya binkamana bi bviini bikasalala o bo yo, ya nde ágyene midzye.»

³⁴ Matala mama otolo bimburu bu mato, nde ágweghe basala ba nde kundaa binkamana bi bviini mu ogwolo kaba lili ndaa nde.

³⁵ Lo binkamana bi bviini bíbwirili basala ba nde, mumō bákaha nde nswa-nswa, wunu bádzwi nde, wu muke bádzwi nde mu mameë.

³⁶ Nde áfirigweghe basala babake ba babvulu olagha ya baba nsomo, ya bágyighili bumō kundaa bo si.

³⁷ Ña masini, nde ágweghe bo mwana a nde, ya ályele ti: «Bo sa bagwa mwana a me budziri.»

³⁸ Lo binkamana bi bviini bu bimonono mwana, bíbili bo-a-bo ti: «Wu me wu aagwolo pfa li taara a nde! Ligya, litswe lidzwa nde ya ligwolo pfa li nde.»

³⁹ Bu babwirili nde, bátsili nde ku mbala a nseghe a bviini ya bádzwi nde.

⁴⁰ Obo me buulu, ña akala oogya mfumu a nseghe a bviini, nde bunu aasa mu binkamana bi bviini bi?

⁴¹ Bo bábvuhulu kundaa nde ti: «Nde sa adzwa ba babi babo ku ogwene a nyiĩ, ya nde sa agwihini ya binkamana bi bviini bikimi bikasalala o bo yo, bi akala bikagwa nde bimburu mu matala ma bye.»

⁴² Ya Yiisu ályele kundaa bo ti: «Bunu, be nkini ka lítala mi básono o:

“Limeẽ li ootsili ba baakatwu,

me lo ayi lili li linsomo ña mutswunu,

ndagha oyo yifi kundaa Mfumu,

ya ña mihi mi bihi, yili ndagha yi okinimi!”»

⁴³ «Me mu obo me ndyele kundaa be ti: Emfumu e Nzaami, sa bamaha be kye, mu ogwa kye kundaa ekaana ekimi ki eeburu bimburu mu kye.

⁴⁴ [Nswe munde wu akala aabwa ña yulu a limeẽ li sa atsanama, ya nswe munde wu liibwirili lo, sa apweẽ.]»

⁴⁵ Bakwuru ba bangaa ba nzaami ya ba-Faridzyẽ bu bagyughu mankumu mamo, bábaghala ti Yiisu me mu bo ákabili.

⁴⁶ Bo bákasagha bunu baasyimi nde, lo bábara nzalamweẽ a mampwumu ma baara, mu kuulu mo mákagwolo Yiisu ti mubighili.

22

Nkumu yi kyiri kii mabala

¹ Yiisu áfiribili kundaa bo mu mankumu, ya ályele ti:

² «Emfumu ki mayulu efaana ya mukogho mutsyini wu áagyighili kyiri ki mabala ma mwana a nde.

³ Nde ágweghe basala ba nde mu oyita ba bágwi mpighi a kyiri kii mabala mbili, lo bo ka bádzyi ogya o.

⁴ Nde áfirigweghe basala bakimi ya ályele bo mu otuoho mukyene wu kundaa ba bágwi mpighi: “Mu matala ma, baamana onaã bi-odza, baadzwi bangoomo ya bibuolo bi me bibi maala, byehene biikughu, ligya ku odza!”

⁵ Lo babo ba bágwi mpighi, bágyene obo ku ogwene okihi mbili, mumõ ku manseghe ma ndeme, wu muke ku nkaala a nde,

⁶ bana bu babwirili basala ba nde, bátughu bo ya bádzwi bo.

⁷ Mukogho ákolo nkehe. Nde ágweghe bambumbu ba nde mu oyidzwa babo ba baadzwi basala ba nde ya otsughu bvulu li bo mbaa.

⁸ Na nseele, nde ályele kundaa basala ba nde ti: “Byehene bibi kyiri kii mabala biikughu, lo ba baagwi mpighi ka baakakala ba bafaana o.

⁹ Ligye mu mapfulu, ya lita baara bwohono ba liimono be mbili bagya ku kyiri.”

¹⁰ Basala ba nde bápala, bágyene mu manzili ya bábvughu baara bwohono ba bámono bo, ba babi ya ba babwe. Mbala a kyiri yílwulu mu baara.

¹¹ Mukogho bu agyi mu okabulutala ba baagyi ku kyiri, nde ámono mbwuru wuulu ka álaha enkuru kii kyiri o.

¹² Nde áfwulu kundaa nde ti: “Ndughu a me, we bunu aasi mu osomo mu kuu ogwene a enkuru kii kyiri?” Lo mbwuru munde ka ábvuhulu nde ndagha o.

¹³ Mu obo mukogho ályele kundaa basala ba nde ti: “Likuru nde misyi mu myili ya mu myaã,

litsili nde ku mbaala ku oli mpyibi, oko ku ookala bilili ya odza myini.”

¹⁴ Baara balagha báti mbili, lo ba básuolo bali ndaama.»

Ofiri mpagha kundaa Sedzare

(Mar 12.13-17; Luk 20.20-26)

¹⁵ Mu obo, ba-Faridzyë báykuru mfwunu bunu baaleghebe Yiisu mwere mu mi aabili nde.

¹⁶ Na mbihi bo bágweghe kundaa nde binduono bi bo, emõ ya baara baba emvununu ki Erode mu olyele ti: «Muluo, bihi ligyhaba ti we nga a enganma ya ti we li mu okabululuo baara nzili a Nzaami mu enganma, ku ogwene a obara mbwuru, mu kuulu we ka aakatala baara mu bidzili o.

¹⁷ Lo lyele bihi, we bunu tsimi mu ndagha yi: Oli a muswa mu ofiri mpagha kundaa Sedzare bwunu we pele?»

¹⁸ Lo Yiisu bu asoolo bitsimi bi bo bi bibi, ályele kundaa bo ndiri: «Bampibi! Mu emakye be lidzyi otsihi me?

¹⁹ Lisuo me mupara wu baakafiri mpagha.» Bo básuo nde denye* mumõ.

²⁰ Nde áfwulu kundaa bo ti: «Edzili ki ya bisono bi bibi na?»

²¹ Bo bábvuhulu kundaa nde ti: «Bibi ndaa Sedzare.» Mu obo, nde ályele kundaa bo ti: «Libvurulu bibi Sedzare kundaa Sedzare, ya bibi Nzaami kundaa Nzaami.»

²² Bo, bu bagyughu mandagha mamõ, bákinjimi, bábulusihi nde ya bágyene.

* **22:19 22.19** Denye, mupara wu esyeë wu báakafiri mpagha mu nde

Efwulu mu osighili mu lipfu
(Mar 12.18-27; Luk 20.27-40)

²³ Mu etsughu ekye, ba-Saduseyë ba baakalyele ti osighili mu lipfu ka oli o, báyabehene ku bele a Yiisu ya bo báfwulu nde ti:

²⁴ «Muluo, Moyidze ályele ti: *“Kala ti baghala kpi ku ogwene oburu baana, mbwee a nde sa akie mupfili, mu oburu nde baana”*.

²⁵ Ku bula bu bihi óli a baana nsaama ba baghala baba taara mumō. Wu a nsomo, kie mukala, kpi ku ogwene a baana, ya sihi mukala a nde kundaa mbwee wu aanama nde.

²⁶ Bumō si kundaa wu a buolo, kundaa wu batere ya tee mu bo bwohono nsaama.

²⁷ Na nseele, na mbihi a bo bwohono, mukaha kpi.

²⁸ Lo na akala oosighili baara mu lipfu, nde mukala a na aakala, buulu bo bansa nsaama áli balumu ba nde?»

²⁹ Yiisu ábvuhulu kundaa bo ti: «Be liigwunumu, mu kuulu ngu okala Bisono, ngu okala lileene li Nzaami, be ka lisoolo bye o.

³⁰ Na akala oosighili baara mu lipfu, ka okala a balumu o, bwunu we bakala o, lo bo sa bakala ti anga bangye-yulu mu yulu.

³¹ Ya, mu mi mitala osighili o ba bákpi, be ka lítala ndagha yi ólyele be Nzaami o ti:

³² *“Me ndi Nzaami a Abarahame, Nzaami a Idzake, ya Nzaami a Dzakobe?”* Nde ka li Nzaami a ba bákpi o, lo nde li Nzaami a baba mweë.»

³³ Mampwumu ma baara mákinjimi na mágyughu mo maluo ma nde.

Mukyene wu bvulu bunene
(Mar 12.28-34; Luk 10.25-28)

³⁴ Ba-Faridzyē bu bagyughu ti Yiisu aakuru minjma mi ba-Saduseyē, bo bábvuṇunu ṇa ebini kyini ekye.

³⁵ Ya mumō mu bo, muluo-mikyene bu adzyi otsihi Yiisu, áfwulu nde ti:

³⁶ «Muluo, nsa mukyene bvulu bunene mu Mikyene?»

³⁷ Yiisu ályele kundaa nde ti: « “Dzyi *Mfumu Nzaami a we mu mukolo a we wohono, mu mugwumu a we wohono ya mu mayele ma we mwohono*”.

³⁸ Munde me mukyene wu bvulu bunene ya wu a nsomo.

³⁹ Wu a myele wu a faana a nde me wu: “Dzyi *nganda-mbwuru a we ti budzyi weme*”.

⁴⁰ Mikyene myehene ya mibighili mili kunsu mikyene myele mi.»

Kriste ya Dabvide
(Mar 12.35-37; Luk 20.41-44)

⁴¹ Buulu ba-Faridzyē áli bábvuṇunu, Yiisu áfwulu kundaa bo ti:

⁴² «Etsimi e be bunu eli mu nkooro a Kriste? Nde mwana a na ali?» Bo bábvuḥulu kundaa nde ti: «Wu a Dabvide.»

⁴³ Nde ályele kundaa bo ti: «Lo bunu-a-bo, mu Mufulu, Dabvide áti nde “Mfumu”, ṇa ályele ti:

⁴⁴ *Mfumu aalyele kundaa Mfumu a me ti: Bwa nsini ṇa kwogho e me kii babaghala tee ṇa aantwulu me mitaara mi we ṇa nsie a myili mi we?*

⁴⁵ Kala ti Dabvide li mu ota nde “Mfumu”, lo bunu nde akughu ofirikala mwana a nde?»

⁴⁶ Mbwuru si mumõ ka ákughu ogwa Yiisu mvuru mu ndagha nsyini o. Ya obaana etsughu ekye, ka oli a mbwuru wu áafirikabagha bukyini mu ogwa nde bifwulu o.

23

*Osa mayele mu Baluo-mikyene ya ba-Faridzyë
(Mar 12.38-39; Luk 11.43,46; 20.45-46)*

¹ Mu obo Yiisu ábili kundaa mampwumu ma baara ya kundaa binduono bi nde ti:

² «Esala ki Baluo-mikyene ya ba-Faridzyë me mu okabaala Mikyene mi Moyidze.

³ Be, liikagyighili ya liikakebe mandagha mwohonono ma baakalyele bo be, lo ka likanama bigyighili bi bo o, mu kuulu bo baakabili, lo ka baakagyighili mi baakabili o.

⁴ Bo baakakuru matsulu [mama leme ya mpara mu obiri] ya baakanaã mo ña yulu a bisanama bi baara. Lo bomo, ka baakaberene a mo mu mulyeme o.

⁵ Bigyighili bi bo byehene bili mu nzala a omonono ña mihi mi baara. Bo baakagyighili mipa mi minene mu básono mandagha ma Nza-ami mi baakalaha ña yulu a mbwi bwunu we ña kwogho mu matala ma baakasamana bo, ya baakalabala manto ma binkuru bi bo.

⁶ Bo badzyi bibini bi binsomo mu byiri bibi odza ya bibini bi binsomo mu manzo ma lisamana ma ba-Dzwife.

⁷ Ya bo badzyi ti bakagwa bo mamboro mu bibini bibi baara bwohonono, ya badzyi ti baara bakata bo *Muluo* .

⁸ Lo be, banyaã okata be *Muluo*, mu kuulu be lili a *Muluo* yini a mumõ, ya be bwohonon lili bakulu ya bambwee.

⁹ Ka likata mbwuru si mumõ “Taara” a be ña nsie o. Mu kuulu be lili a nde yini a mumõ, Taara wu li ku yulu.

¹⁰ Banyaã si okata be “Mugyihi wu munene”, mu kuulu be lili a mugyihi yini a mumõ, ngu Kriste.

¹¹ Wu bvulu bukwuru ña kara li be akala musala a be.

¹² Munde wu aakumu sa basurulu nde, ya munde wu aasughuru sa bakuhubu nde.»

¹³ «Nyĩ kunda be Baluo-mikyene ya ba-Faridzyẽ! Be lili bampibi, mu kuulu be liikakaha baara osomo mu Emfumu ki mayulu. Beme ka liikasomo omo o, ya be ka liikagwa baara ba badzyi osomo omo nzili o!» [

¹⁴ Nyĩ kunda be Baluo-mikyene ya ba-Faridzyẽ! Be lili bampibi, mu kuulu be liikagwolo busini bwohonon bubu bapfiili baba bakaha ya be liikasa nsamana yi nda mu kuulu baara bamono be. Me mu obo, Nzaami sa alamana be mu nkehe.]

¹⁵ Nyĩ kunda be Baluo-mikyene ya ba-Faridzyẽ, be lili bampibi! Mu kuulu be liikadzye mu bibini byehene bibi ña nsie ya mu mibu mu obagha mbwuru mumõ wu aakihi osomo mu emvununu e be. Ya be bu libagha nde, be likirili nde mwana wu a mungele a mbaa, wu bvulu be mansa mwolo.

¹⁶ Nyĩ kunda be, mimbiri mi binkpa-mihi mi miikalyele ti: «Munde wu aalaba mukihi mu nzo

a Nzaami, ka li a ndagha o. Lo munde wu aalaba mukihi mu oore li nzo a Nzaami, nde faana okuhu mukihi a nde.»

¹⁷ Be lili biwulu ya binkpa-mihi! Emakye ebvulu mupfunu: Oore bwunu we nzo a Nzaami yi aakagwa lo bungili?

¹⁸ Ya be liifirikalyele ti: «Munde wu aalaba mukihi mu ebini ki baakatsughu bikaba ka li a ndagha o. Lo munde wu aalaba mukihi mu ekaba ki baatwulu na yulu a ebini ekye, nde faana okuhu mukihi a nde.»

¹⁹ Binkpa-mihi! Emakye ebvulu mupfunu: Ekaba bwunu we ebini ki baakatsughu bikaba eekasa ti ekaba ekala kii ngili?

²⁰ Munde wu aalaba mukihi mu ebini ki baakatsughu bikaba aakalaba nde mu ebini e kye ya mu bilogho byehene bi bili na yulu a kye.

²¹ Ya munde wu aakalaba mukihi mu nzo a Nzaami aakalaba nde mu yo ya mu munde wu aakakala munsa yo.

²² Munde wu aalaba mukihi mu nkwumu a yulu, aakalaba mukihi mu likubu li Nzaami ya mu munde wu aakabwa nsini na yulu a lo.

²³ Nyiĩ kunda be baluo-mikyene ya ba-Faridzye baara baba bampibi! Mu kuulu be liikagwa kaba lili kwumu lili mampihi-a-mpihi ya lili miswoho mimi nkwumu anete ya kumine, ya be liikamenene bi bibvulu mupfunu mu mikyene: Bunsumu, mukolo wu a nyiĩ ya kana. Me mimye be likaakasa ya ogwene a omenene mi mike si.

²⁴ Mimbiri mi okpi mihi, be liikakele mala ma be mu omaha bimpimpi, lo be liikamini nyama wu baakata syamo wu mutsyini!

25 Nyiĩ kundaa be baluo-mikyene ya ba-Faridzyē, be lili bampibi! Mu kuulu be liikatse-hebe mbihi a ebaha ya mbihi a ndoŋo, lo kunsā kara bilwulu mu bilogho bibi pfiyibi ya mu nzala a mandagha ma mabi.

26 We mu-Faridzyē wu enkpa-mihi! Matswama otsehebe ebaha mu kara, mu kuulu ebaha ekala si ki etsyeme ku mbala.

27 Nyiĩ kundaa be baluo-mikyene ya ba-Faridzyē be lili bampibi! Mu kuulu be lili ti anga mampyeme ma bágyogho mpeeme. Ku mbala mo maakamoŋono ma mabwe. Lo kunsā kara mo malwulu mu miwehe mi ba bákpi ya nyara yi alagha.

28 Bumō si kundaa be, ku mbala be liikamoŋono ti baba bunsumu, lo kunsā kara be lili bampibi ya liilwulu mu bubi.

29 Nyiĩ kundaa be baluo-mikyene ya ba-Faridzyē be lili bampibi! Be ba liikatwu mampyeme ma mibighili ya be liikabwehe mampyeme ma baba bunsumu,

30 ya be liikalyele ti: «Kala ti bihi áli liili mu matala mama bataara ba bihi, nkini bihi ka líkaakala mfwunu mō ya bo mu otsala makili ma mibighili o.»

31 Mu obo, be lili bampughulu ba beme ti be lili baana ba babo ba bádzwi mibighili.

32 Lo be, limana esala ki óbaana bataara ba be!

33 Be lili bantaala, etswumu kii bampili! Bunu-abo be likughu ogwenē masyeme ma mungele a mbaa?

34 Me mu obo, me ngweghe mibighili, ban-sughu ya baluo-mikyene kundaa be. Be sa lidzwa

bana mu bo ya likomo bo na kuruwa, be sa likaha babake nswa-nswa mu manzo mama lisamana ma ba-Dzwife, ya be sa libyi bo mu mabvulu ya mabvulu.

³⁵ Mu kuulu makili ma baba bunsumu mwohono ma matsanama na nsie, obaana makili ma Abele, wu a bunsumu tee mu Dzakari mwana a Baraki, wu lidzwi be na kara li ebini ki baakatsughu bikaba ya ngwumu yi a ngili, mabwa na yulu a be.

³⁶ *Mu enganma* me ndyele kundaa be ti: «Masyeme mwohono mamo sa mabwa na yulu a eseene ki!»

*Yisu lili mu nkooro a Yerusaleme
(Luk 13.34-35)*

³⁷ «Yerusaleme, Yerusaleme, we wu aakadzwa mibighili ya wu aakadzwa bantumu ba baakagweghe we mu mameẽ. Matala malagha me aakansagha obvughu baana ba we ti anga bu ookakogho nsuhu baana ba nde kunsu mapaba. Lo we ka dzyi o.

³⁸ Mono! Nzo a be sa yisyili mukana.

³⁹ Mu kuulu, me ndyele kundaa be ti be akala ka liifirimono me o, tee mu matala ma liilyele be ti:

Munde wu aagya mu nkwumu a Mfumu, li wu liseme!»

24

*Yisu bighili otsanama o Nzo a Nzaami
(Mar 13.1-2; Luk 21.5-6)*

¹ Yiisu ápala mu Nzo a Nzaami, ya bu abaana ogye, binduono bi nde bíyasele kundaa nde mu osuo nde bu bátwu Nzo a Nzaami.

² Nde ábvuhulu kundaa bo ti: «Be lili mu okamono bilogho byehene bi? *Mu enganma* me ndyele be, ka akala osyili limeẽ ña yulu a limeẽ ña ebini ki o, byehene sa bitsanama.»

Masini ya makimini
(*Mar 13.3-13; Luk 21.7-19*)

³ Bu abwi nsini ña Munguo wu a mi-Olibve, binduono biyasele kundaa nde mu libee, ya bílyele nde ndiri: «Lyele bihi, munsá matala mandagha mamó akala maamonono, ya nsa ely-imi eesuo ogya o we ya masini ma nsie.»

⁴ Yiisu ábvuhulu kundaa bo ti: «Lisa mayele, mbwuru anyaa odzihibi be.

⁵ Mu kuulu, balagha akala baagya mu nkwumu a me, ya sa balyele ti: “Me ngu Kriste!” Ya sa badzihibi baara balagha.

⁶ Be sa ligyughu bakabili mu mamvulu ya mu nsia a mamvulu mama ku la. Likala yeelee! Ka likala a nzalamweẽ o, mu kuulu mandagha mamó mafaana ogya, lo mamó nkini ka mali masini o.

⁷ Mu kuulu baara ba nsie mō sa batemene mu oyidzwana a baara baba nsie yinke, ya mukogho mumō sa atemene mu oyidzwana a mukogho wu muke, sa okala a munzyala, ya nsie sa yinyinj mansa malagha.

⁸ Myehene mimye ngu ebaana ki misuo mii oburu.

⁹ Mu matala mamõ sa batara be mu kuulu bamwehẽ be kimini, ya sa badzwa be, sa babele be kundaa bikaana byehene mu nkooro a nkwumu a me.

¹⁰ Ya mu matala mamo, balagha akala baabwa, bo-a-bo sa batara bambaala ya sa babele bambaala.

¹¹ Mibighili milagha mimi mpya sa mipala ya sa midzihibi baara balagha.

¹² Mu nkooro a bubi ba buubvulu, dzyi li baara balagha sa liwolo.

¹³ Lo munde wu asa mukama tee ku masini, sa abvwughu.

¹⁴ Sa batsala Nsia yi Mbwe yi a Emfumu yi mu nsie yohono, mu kuulu yo yisuo bumpughulu kundaa bikaana byehene. Me oño akala masini maagya.»

Kimini li lilagha

(Mar 13.14-23; Luk 21.20-24)

¹⁵ «Ŋa akala liimono be mu ebini kii ngili *Ngughu a bubi ba buukabyihi*, bu áli ólyele mu-bighili Danyele, nyaã wu li mu otala abaghala.

¹⁶ Mu matala mamo, babo ba baakala mu Yude, nyaã babara ku yulu a minguo.

¹⁷ Munde wu aakala ku yulu a see li nzo lili eyala, anyaã osughuru mu otolo bilogho bi bili munsa nzo a nde.

¹⁸ Munde wu aakala ku manseghe, anyaã obvughuru ku mbihi mu oyigwolo enkuru ki ela kii kobo.

¹⁹ Nyiĩ kundaa bakaha ba baakala a mayimi ya ba baakala mu otsyaha baana mu bitsughu bibye!

²⁰ Lisamana Nzaami mu kuulu be linyaã obara mu ndo yi a mpie yi alagha, ya mu etsughu kii sabate.

²¹ Mu kuulu oŋo sa okala a mpara yi alagha, yiili nkini ka yimaabwa o, obaana ku ebaana e nsie tee mu matala ma, ya kimini lii obo ka lifirikala o.

²² Ya kala ti mutala a bitsughu bibye ka bási nde wu a sala o, nkini mbwuru si mumõ ka ákaabvwughu o. Lo mu nkooro a ba ósuolo Nzaami, bitsughu bibye sa bikala bi bisala.

²³ Me mu obo, kala ti mbwuru lyele kundaa be ti: “Kriste li ŋa!” Bwunu we: “Nde li ŋanii!” Ka lisa nde kana o.

²⁴ Mu kuulu, bakriste baba mpya ya mibighili mimi mpya sa batemene. Bo sa basa bilyimi bi binene ya mandagha mama okinjimi mu eteese kii odzihibi, ngu oli ba básuolo kala ti okughu okala.

²⁵ Me aangyehe be!

(Luk 17.23-24,37)

²⁶ Lo kala balyele kundaa be ti: “Limono, nde li ku syehe”, ka ligye oko o. Bwunu we balyele ti: “Limono nde aasweme ŋa”, ka lisa nde kana o.

²⁷ Mu kuulu, bwunu a bu ookasehene musehene a nzele ku ookapala tala tee ku ookadzyama tala, bwunu obo si ogya o Mwana a mbwuru akala ookala.

²⁸ Ŋa ebini ki ookala ebyimi, me oŋo bango-mbimi akala baabvununu.»

Ogya o Mwana a mbwuru

(Mar 13.24-27; Luk 21.25-28)

²⁹ «Ŋaana oŋo, ŋa mbihi a bitsughu bibye bibi kimini lili lagha,

*tala sa likala mpyibi,
mweele wu a ngoono ka afirigwa otsyeme o,
banomanomo sa babwa na nsie,
ya lileene lili mayulu sa linyiji.*

³⁰ Onjo elyimi e Mwana a mbwuru sa epala mu yulu, ya baara baba bitswumu byehene bi bili na nsie sa basyama mu bilili, ya sa bamono *Mwana a mbwuru bu aagya mu bidzi bi mayulu* mu lileene ya mu nsia yi nene.

³¹ Ya nde sa agweghe bangye-yulu ba nde ya mvulu-a-mvulu yi nene, ya bo sa babvughu baba ndaa nde ba asuolo mu manto ma nsie mansa mana, tee mu nto ya nto yi a mayulu.»

Nkumu yi a mufinge

(Mar 13.28-31; Luk 21.29-33)

³² «Libaghala nkumu yi a mufinge: Manto ma mampala ma nde kala ayi minene ya kala ti matsyiri maafulu, lo be lisoolo ti dzwa liibehene.

³³ Bumō si, na akala liimono be mandagha mwohono mamō, lo be lisoolo ti Mwana a mbwuru ayi aayabehene, nde ayi be-bele.

³⁴ *Mu nganma* me ndyele kundaa be ti, eseene ki ka eluru o, nsomo mandagha mwohono mamō maakughu.

³⁵ Yulu ya nsie sa biluru, lo mandagha ma me ka maluru o.»

Yini a Nzaami soolo matala mama masini

(Mar 13.32-37; Luk 17.26-30; 17.34-36)

³⁶ «Mu mi mitala etsughu ekye ya matala mamō, mbwuru si mumō ka soolo bye o, ngu okala bangye-yulu ba mayulu, ngu okala Mwana, yini a Taara nde ngasighi.

³⁷ Bwunu a bu óli mu bitsughu bi Nowe, bwunu obo si ogya o Mwana a mbwuru ookala.

³⁸ Bwunu a bu óli baara [babo] mu bitsughu bi bítswama ndwuru a madza yi nene, bo bákadza ya bákam̃ma, bo bákakie ya bákakwehe, tee mu etsughu ki ósomo Nowe mu bwara ba bunene.

³⁹ Bo ka bákasoolo o, tee ña ógyi ndwuru a madza yi nene yi áabiri bo bwohonon. Me bwunu obo [si] ookala ogya o Mwana a mbwuru.

⁴⁰ Mu obo, mu baara buolo ba baakala mu nseghe, sa bagwolo mumõ, ya sa basihi wu muke.

⁴¹ Mu bakaha buolo ba bali mu okasighi mburu ña yulu a limeẽ li baakasighi mburu, sa bagwolo mumõ, ya sa basihi wu muke.

⁴² Mu obo, be likahala mihi, mu kuulu be ka lisoolo o nsa etsughu Mfumu a be akala aagya.

⁴³ Be lisoolo ti kala nga-a-nzo áli gyahaba matala mama mpyibi ma oogya muturu, nkini nde ákaakahala mihi, ya ka ákaatala o ti babulu nzo a nde.

⁴⁴ Me mu obo, behe si, likala yeelee, mu kuulu Mwana a mbwuru sa agya mu matala maala be ka likala a etsimi o.»

*Musala wu bunsumu ya wu gwene a bunsumu
(Luk 12.41-48)*

⁴⁵ «Nande li musala wu bunsumu ya wu li a mayele, wuulu mfumu aagwi nde litumu ña yulu a baara ba nzo a nde mu ogwa bo bi-odza mu matala ma mafaana?

⁴⁶ Esee kundaa musala munde, wuulu mfumu a nde bu agyi yabagha nde ña yulu a esala ekye.

⁴⁷ *Mu nganma*, me ndyele kundaa be ti, nde sa agwa nde emfumu ña yulu a bilogho bi nde byehene.

⁴⁸ Lo, kala ti musala li wu mubi ya etsimi kunsa mukolo a nde ti: “Mfumu a me ka ali mu obaagya o”,

⁴⁹ ya bwi okaha banganda ba nde baba esala, bwi odza ya onma ya binkolo-mala,

⁵⁰ mfumu a musala munde sa agya mu etsughu kiili nde ka ali mu okakebe nde o, ya mu matala maala nde ka agyahaba o.

⁵¹ Mfumu sa abyì nde ya musala munde sa ebagha masyeme emõ ya bampibi, oko ku ookala bilili ya odza myini.»

25

Nkumu yi batughu kwumu

¹ «Emfumu ki mayulu efaana a batughu baba nkyini kwumu, baala bu bagwolo miindi mi bo, bápala mu oyibwana mulumu.

² Bataana mu bo báli biwulu, ya bataana babake báli ya mayele.

³ Batughu baba biwulu, bu bagwolo miindi, ka bágwolo maala o.

⁴ Lo batughu baba mayele bágwolo miindi mi bo ya maala mu mana a mambwara.

⁵ Mulumu bu ágwene obaagya, bo bwohonon báto ensama ya bágyonomo tolo.

⁶ Mu kara-a-kara li mpyibi, engubu ébwi: “Mulumu ndeghe! Lipala liyibwana a nde.”

⁷ Mu obo batughu bwohonon básighili ya bábwi ogyighili miindi mi bo.

⁸ Batughu baba biwulu bályele kundaa batughu baba mayele ti: “Ligwa bihi mana ndaama a maala ma be, mu kuulu miindi mi bihi mili mu okagye ku odzimi.”

⁹ Lo babo baba mayele ábvuhulu kundaa bo ti: “Pele! Mo ka makughu mu bihi ya mu be o. Ligye kundaa minta-nkaala ya liswumu maala mama ndaa beme.”

¹⁰ Mu matala ma bágyene bo ku oyiswumu maala, mulumu áyato, ya batughu ba báli yeelee básomo munsa nzo a kyiri kii mabala, ya bákuru munjma a nzo.

¹¹ Na mbihi onjo, batughu bataana babake bágyi, ya bákalyele ti: “Mfumu, mfumu, dzubulu bihi nzo!”

¹² Lo nde ábvuhulu ti: “*Mu enganma* me ndyele kundaa be ti, me ka nsoolo be o.”»

¹³ «Me mu obo, likahala mihi, mu kuulu be ka lisoolo o, ngu okala etsughu, ngu okala matala.»

Nkumu yi batalanta
(Luk 19.11-27)

¹⁴ «Sa okala ti anga mbwuru wu li mu okagye ku midzye, nde áti basala ba nde mbili ya ágwi bo busini bu nde.

¹⁵ Kundaa mumõ nde ágwi batalanta bataana, kundaa wunu nde ágwi buolo, kundaa wu muke nde ágwi mumõ, bwunu a bu oli mpini a mbwuru-mbwuru, ya nde ágyene midzye.

¹⁶ Musala wu áabagha batalanta bataana áyisalala mu bo ya ábagha bataana bakimi na yulu.

¹⁷ Bwunu obo si, wu bágwi batalanta buolo ábagha batalanta buolo bakimi.

¹⁸ Lo munde wu bágwi talanta mumõ, áyitsimi dzunu mu nsie ya ásweghe nzi a mfumu a nde omo.

¹⁹ Matala malagha bu maluru, mfumu a basala áyabvughuru. Ya nde áfwulu bo bunu-a-bo básalala nzi a nde.

²⁰ Munde wu bágwi batalanta bataana áyasele ya ásuo batalanta bataana bakimi ya ályele ndiri: “Mfumu, we áli aagwi me batalanta bataana, mono batalanta bataana bakimi ba aafirimbagha me.”

²¹ Mfumu a nde ályele kundaa nde ndiri: “Bubwe! We li musala wu mubwe ya wu a bunsumu. We aasuo bunsumu mu bi bisala, me sa ngwa we litumu mu bi bibvulu mupfunu. Gya, ya kala mu esee ya mfumu a we.”

²² Na mbihi, munde wu bágwi batalanta buolo áyasele ya ályele ti: “Mfumu, we áli aagwi me batalanta buolo, mono batalanta buolo bakimi ba aambagha me.”

²³ Mfumu a nde ályele kundaa nde ndiri: “Bubwe! We li musala wu mubwe ya wu a bunsumu. We aasuo bunsumu bu we mu bi bisala, me sa ngwa we litumu mu bi bibvulu mupfunu. Gya, ya kala mu esee ya mfumu a we.”

²⁴ Na masini, wu bágwi talanta mumõ bu ayasele si, nde ályele ti: “Mfumu, me nsoolo ti we li mbwuru nga-a-mukolo mpini, we aakatolo mburu na ebini kiili ka oli we aakunu o, we aakakwu mburu na ebini kiili ka we aanyahala o.

²⁵ Mu nzalamweẽ, me áayindyighi talanta a we ku nsini a nsie. Gwolo talanta a we!”

²⁶ Lo mfumu a nde ábvuhulu kundaa nde ti: “We

li musala wu mubi ya mubolo! We gyighili osoolo ti me aakantolo mburu ɲa ebini kiili ka oli me aankunu o, ya me aakankwu mburu ɲa ebini kiili ka me aanyahala o.

²⁷ Nkini áli we aatwulu nzi a me ku banke, mu kuulu ɲa aayamvughuru me, me ngwolo yo ya ndaana ɲa yulu.

²⁸ Ligwolo nde talanta wu ali a nde ya ligwa nde kundaa munde wu li a batalanta kwumu.

²⁹ Mu kuulu, kundaa munde wu li a elogho, sa bafirigwa nde bi bibvulu, ya nde sa akala a bye bi bilagha. Lo, kundaa munde wuulu ka ali a elogho o, sa bamaha nde si okala enda-ndaama ki ali a nde.

³⁰ Musala wu gwene a mupfunu wu, litsili nde kunsá mpyibi yi a ku mbala, oko ku ookala bilili ya odza myini.”»

Mumfwunu wu masini

³¹ «Ɗa akala oogya Mwana a mbwuru munsá nsia a nde, nzili mō ya bangye-yulu bwohonon, nde sa abwa nsini ɲa likubu li nde lili nsia.

³² Bikaana byehene sa bibvununu ɲa nkulu a nde, ya nde sa akabala baara mu makaba mwolo, ti bu ookakabala munkaa-bibuolo bindoomo ya bantaba.

³³ Nde sa atwulu bindoomo ku ngo-kwogho e nde ya bantaba ku engbambogho e nde.

³⁴ Ono mukogho sa alyele kundaa ba baakala ku ngo-kwogho e nde ti: “Ligya, be ba óseme Taara a me, libyala pfa* li Emfumu ki bágyighili mu be obaana ku ebaana e nsie.

* **25:34 25.34** Pfa bwunu we mukobo, busini bu ookasihi mbwuru wu aakpi

³⁵ Mu enganma me aandi a nzala, ya be liigwi me bi-odza, me aandi a nyoro, ya be liigwi me bi-onma, me aandi munzyi, ya be liibwana a me.

³⁶ Me aandi mpene, ya be liigwi me binkuru, me aandi mbyele ya be liiyatala me, me aandi mu boloko, ya be liiyatala me.”

³⁷ Mu obo, baara baba bunsumu sa babvuhulu kundaa nde ti: “Mfumu, bu nki matala bihi ali liimono we ya nzala ya bihi liigwi we bi-odza, we ya nyoro, ya bihi liigwi we madza?”

³⁸ Bu nki matala bihi ali liimono we munzyi ya bihi liibwana a we, mpene ya bihi liigwi we binkuru?

³⁹ Nki matala bihi ali liimono we mbyele bwunu we mu boloko, ya bihi liigy kundaa we?”»

⁴⁰ Ya mukogho sa abvuhulu kundaa bo ti: «*Mu enganma*, me ndyele kundaa be ti: Nswe ŋa liikasa be obo kundaa mumō mu ba babvulu osala ba, ba bali bambwee ya banaana ba me, me kundaa me be liikasa obo!»

⁴¹ «Ŋa nseele, mfumu sa alyele kundaa ba bali ku engbambogho e nde ti: “Be ba bágwi epwolo, ligye la ya me, ku mbaa yi aagwene okadzimi yi bágyighili mu nkooro a dyabulu ya bangye-yulu ba nde.

⁴² Mu kuulu me aandi ya nzala ya be ka liigwi me bi-odza o, me aandi ya nyoro ya be ka liigwi me madza o.

⁴³ Me aandi munzyi ya be ka liibwana a me o, me aandi mpene ya be ka liigwi me binkuru o, me aandi mbyele ya mu boloko, ya be ka liiyamono me o.”

⁴⁴ Mu obo, boho si sa babvuhulu kundaa nde ti: “Mfumu, nki matala bihi áli liimono we ya nzala

bwunu we ya nyoro, munzyi bwunu we mpene, mubyele bwunu we mu boloko, ya bihi liikwono oyabaha we?”»

⁴⁵ Nde sa abvuhulu kundaa bo ti: «*Mu enganma*, me ndyele kundaa be ti: “Nswe ŋa liikwono osa be obo kundaa mumõ mu ba babvulu osala ba, me kundaa mehe si be liikwono osa obo!”

⁴⁶ Ya, bo sa bagye ku masyeme mama mibvu ya mibvu, ya baara baba bunsumu ku laama lili mibvu ya mibvu.»

26

Mfwunu yi odzwa Yiisu

(Mar 14.1-2; Luk 22.1-2; Dzã 11.45-53)

¹ Yiisu bu amana ogwa maluo mwohonono mamu, nde ályele kundaa binduono bi nde ti:

² «Be lisoolo ti, bitsughu byele bisyili mu oto kyiri kii Paake, ya Mwana a mbwuru sa bagwa nde ŋa myaã mi baara mu kuulu bakomo nde ŋa kuruwa.»

³ Mu obo, bakwuru ba bangaa ba nzaami ya bakulu baba ekaana ki ba-Dzwife bábvununu ku mbala nzo a mfumu a bangaa ba nzaami wu a nkwumu a Kayife.

⁴ Bo bákuru mfwunu mu osyimi Yiisu mu mayele mu kuulu badzwa nde.

⁵ Lo bo bákalyele ti: «Ka ŋa kara li kyiri o, mu kuulu mpaatsala yinyaã obwa ŋa nsa baara.»

Mukaha gyiri mananaase ŋa yulu a mutswi a Yiisu

(Mar 14.3-9; Dzã 12.1-8)

⁶ Ya Yiisu bu áli ku Betani, ku nzo a Simõ nga-abwala,

⁷ mukaha mumõ áyasele kundaa nde ya mbwara yi a mu alabatare yi áalwulu mu mananaase mama ntala. Nde ágyiri mo ña yulu a mutswi a Yiisu ñaala bo bábwi nsini ña tabele.

⁸ Binduono bu bimonono obo, ka bímonono esee o ya bílyele ti: «Mu emakye bapfihili mananaase ma?

⁹ Mu kuulu, ali bakughu otyeghe mo mu ntala yi alagha, ya ogwa nzi oyo kundaa bawele!»

¹⁰ Yiisu bu asoolo ndagha oyo, nde ályele kundaa bo ti: «Mu emakye be lili mu omweẽ mukaha wu mpara? Nde aagyighili ndagha yimbwe mu me.

¹¹ Mu kuulu bawele, be sa likala ya bo mu matala mwohonono. Lo me ka ankala ya be mu matala mwohonono o.

¹² Nde bu agyiri mananaase ma mu nyuru a me, nde aasi me mansagha ma baadzyighi me.

¹³ *Mu engarjma* me ndyele kundaa be ti: Nswe ebinini ki akala baatsala Nsia yi Mbwe mu nsie nsyini, sa babili si mu yo, bu balibili nde mweẽ mu ndagha yi aagyighili nde.»

*Yuda sagha bu aatyeghe Yiisu
(Mar 14.10-11; Luk 22.3-6)*

¹⁴ Mu obo, mumõ mu kwumu ya buolo (12) wu a nkwumu Yuda Isikaryote, ágyene kundaa bakwuru ba bangaa ba nzaami,

¹⁵ ya ályele kundaa bo ti: «Be emakye liigwa me mu kuulu me ntyeghe nde kundaa be?» Bo

bágwi nde makwumu matere (30) ma mipara mimi bisyeẽ.

¹⁶ Obaana oŋo, nde ábwi osagha matala ma mabwe mu kuulu nde atyeghe bo Yiisu.

Yiisu tumu binduono bi nde bibwehẽ kyiri kii Paake

(Mar 14.12-21; Luk 22.7-14; 22.21-23; Dzã 13.21-30)

¹⁷ Mu etsughu kii nsomo kii mampa ma magwene a pfini, binduono bíyalyele kundaa Yiisu ti: «Kunu-ako we dzyi ti bihi linaã we bi-odza bibi kyiri kii Paake?»

¹⁸ Nde ályele ti: «Ligye ku bvulu kundaa mfunnga-empele ya lilyele nde ti: “Muluo bu alyele ti: Matala ma me maabehene, ku nzo a we me aandza kyiri kii Paake ya binduono bi me.”»

¹⁹ Binduono bísi bwunu a bu ótumu bo Yiisu ya bábwehẽ kyiri kii Paake.

²⁰ Nkonkolo bu yito, nde ábwi nsini ŋa tabele ya binduono kwumu ya byele (12).

Yiisu lyele ti sa batyeghe nde

(Mar 14.18-21; Luk 22.21-23; Dzã 13.21-30)

²¹ Mu matala ma bákadza bo, Yiisu ályele ti: «*Mu enganma* me ndyele be, mumõ ŋa kara li be sa atyeghe me.»

²² Bo bányoõ ku olagha, bábaana olyele kundaa nde mumõ-mumõ ti: «Mfumu, me?»

²³ Nde ábvuhulu ti: «Munde wu aalo kwogho mu ndoõ sa limõ ya me^{*}, me nde aatyeghe me.

26:15 26.15 Dza 11.12 ^{*} **26:23 26.23** Mar 14.20. Bo bwohono áli okadza mu ndoŋo mo. Ojala si mu Bik 41.10.

24 Mwana a mbwuru li mu ogye bwunu a bu básono mu nde, lo nyĩ kundaa munde wu li nzili yi baatyeghe Mwana a mbwuru! Ali bubwe banyaã oburu mbwuru munde!»

25 Yuda wu aatyeghe nde ályele kundaa nde ti: «*Muluo*, me?» Yiisu ábvuhulu kundaa nde ti: «Weme lyele yo!»

Bi-odza bi Yiisu bibi masini ya binduono bi nde (Mar 14.22-26; Luk 22.14-20; 1 Kor 11.23-25)

26 Mu matala ma bákadza bo, Yiisu ágwolo limpa, ya bu aseme lo, nde átsyiri lo, nde ágwi lo kundaa binduono bi nde, ya nde ályele ti: «Ligwolo, lidza, yi me nyuru a me.»

27 Bu ágwolo ebaha ya bu abvurulu matuono, ágwi bo kye ya ályele ti: «Lin̄ma kye be bwohono,

28 mu kuulu ma me makili ma me, makili mama ogwihini ma maatsan̄ama mu nkooro a baara ba balagha, mu kolokolo a masumu.

29 Me ndyele kundaa be ti: Me ka amfirin̄ma mala ma bviini ma o tee mu etsughu ki akala aamfirin̄ma me mo ma manyaghara emō ya be mu Emfumu e Taara a me.»

30 Bu bamana ogyimi bikwumu bibi masyighi†, bo bápala mu ogye ku Munguo wu a mi-Olibve.

Yiisu lyele ti Piere sa atunu nde (Mar 14.27-31; Luk 22.31-34; Dzã 13.36-38)

31 Mu obo Yiisu ályele kundaa bo ti: «Mu mpyibi yiyi, be bwohono sa libwa mu nkooro a me. Mu kuulu básono ti:

26:24 26.24 Bik 22.2-19; Edz 53 **26:28 26.28** Opa 24.8; Dze 31.31-34 † **26:30 26.30** Bikwumu bi bákagyimi bo mu etsughu kii Kyiri kii Paake áli kii 113 tee kii 118, mu mukaana wu Bikwumu.

*Me sa nkaha munkala-bibuolo,
ya bindoomo bibi mukaã a bibuolo sa bitsanama*

³² Lo, ña akala aansighili me mu lipfu, me sa nswama ku Ngalile.»

³³ Piere ábvuhulu kundaa nde ti: «Ngu okala ti bwohonon sa babwa mu nkooro a we, si okala ka bunu, me ka ambwa o.»

³⁴ Yiisu ályele kundaa nde ti: «*Mu enganma*, me ndyele kundaa we, mu mpyibi yi, nsomo mulumu a nsuhu akuolo, we sa tunu me mansa matere.»

³⁵ Piere ályele kundaa nde ti: «Ngu okala ti me mfaana okpa emõ ya we, si okala ka bunu, me ka ntunu we o.» Ya binduono byehene bílyele bwunu obo si.

*Yiisu buono Nzaami ku Ngetesemane
(Mar 14.32-42; Luk 22.39-46)*

³⁶ Yiisu bu ayato ya bo ña ebini kii nkwumu Ngetesemane‡, nde ályele kundaa binduono ti: «Libwa mansini ña, mu matala ma aayinsamana me Nzaami ñanii.»

³⁷ Bu abiri Piere ya baana ba Nzebede bansa buolo, nde ábaana omonon nyiĩ ya mukolo maã-maã.

³⁸ Mu obo, nde ályele kundaa bo ti: «Muwumunu a me ayi ya nyiĩ tee mu eteese kii lipfu. Likala ña ya likahala mihi ya me.»

³⁹ Nde bu agyene mana etiiri ki ela, ábwi edzili ña nsie, ábuono Nzaami ya ályele ti: «Taara a me, kala ali bukughu okala, nyaã ebaha ki eluru la ya me! Lo, ka bu ndzyi me o, lo bu dzyi we!»

26:31 26.31 Dza 13.7 ‡ **26:36 26.36** *nkwumu Ngetesemane*
yidzyi olyele ti: ebini ki baakakamana maala.

⁴⁰ Nde áyabvughuru kundaa binduono ya nde ámono bye bigyonomo ensama. Nde ályele kundaa Piere ti: «Bu me buulu be ka liibagha mpini yi okeelee ya me mu tala limō o!»

⁴¹ «Likahala mihi ya lisamana mu kuulu be linyaã obwa mu bigyeele. Mufulu li a mpini, lo nyuru yikolo.»

⁴² Nde áfirigye la mu sa lili ywolo, ásamana ya ályele ti: «Taara a me, kala ti ebaha ki ekughu oluru kuulu me kye onma we, nyaã waa li we likala!»

⁴³ Na mbihi, nde áfiriyabvughuru ya áyabagha bo mu ensama, mu kuulu mihi mi bo áli míleme.

⁴⁴ Nde bu asihi bo, áfirigye la ya bo ya ásamana Nzaami mu sa lili tere. Nde áfirilyele mandagha maana mamō.

⁴⁵ Mu obo nde ábvughuru kundaa binduono ya lyele kundaa bo ti: «Mu matala ma, ligyonomo ya ligwumu o be! Mono, tala liibehene, ya Mwana a mbwuru sa bagwa nde ŋa myaã mi banga-amasumu.

⁴⁶ Litemene! Liyatswe! Limono, munde wu aatyeghe me maayabehene!»

Basyimi Yüisu

(Mar 14.43-50; Luk 22.47-53; Dzã 18.3-12)

⁴⁷ Nde áli nkini mu okabili, mono, Yuda, mumō mu binduono kwumu ya byele (12), áyato ya mpwumu a baara yi nene yi áali a mapee ya mankwogho, ba ógweghe bakwuru ba bangaa ba nzaami ya bakulu baba ekaana ki ba-Dzwife.

⁴⁸ Ya munde wu aakatyeghe nde ágwi bo elyimi, ályele ti: «Munde wu aanyuburu me, me munde, lisyimi nde!»

⁴⁹ Naana onjo, nde áyasele kundaa Yiisu ya ályele ti: «*Muluo*, mboro a we!» Ya nde ányuburu nde.

⁵⁰ Yiisu ályele kundaa nde ti: «Ndughu a me, esala ki aayasa we, sa kye!» Bu bayasele, bábwirili Yiisu ya básyimi nde.

⁵¹ Ya mono, mumõ mu ba bali ya Yiisu, bu apaha lipee li nde, átiní musala a mfumu a bangaa ba nzaami, átsyiri nde tswi.

⁵² Mu obo, Yiisu ályele kundaa nde ti: «Bvurulu lipee li we ña likukuru li lo, mu kuulu babo ba baakagwolo lipee, sa bakpa mu lipee.

⁵³ We bunu tsimi, ti me ka nkughu obuono Taara a me o, mu kuulu nde agwa me ña-ña mikaã mi bangye-yulu kwumu ya myele (12)?

⁵⁴ Lo bunu-abo Bisono bi biilyele ti ofaana okala obo biikeele?»

⁵⁵ Na nseele, Yiisu ályele kundaa mampwumu ti: «Be liipala ya mapee ya mangbala mu osyimi me ti anga ntwumu! Nswe etsughu me aakambwa nsini munsá nzo a Nzaami mu okaluó, lo be ka liisyimi me o.

⁵⁶ Lo myehene mimye miimonõono mu kuulu mi básono ya mi ólyele mibighili mikeele.» Onjo binduono byehene bíbulusihi nde ya bíbara.

Yiisu ña nkulu a emvununu ki ekwuru ki ba-Dzwife

(Mar 14.53-65; Luk 22.54-55; 22.63-71; Dzã 18.13-14,19-24)

⁵⁷ Ba básyimi Yiisu bábiri nde kundaa Kayife mfumu a bangaa ba nzaami, oko ku óbvununu baluo-mikyene ya bakulu ba ba-Dzwife.

⁵⁸ Piere ákanama nde la-la tee kunsa mbala a nzo a Mukwuru a bangaa ba nzaami. Bu asomo kunsa kara, ábwi nsini ya bankyele ba Kayife mu omono bunu ndagha yi yiisughu.

⁵⁹ Bakwuru ba bangaa ba nzaami ya ekwuru ki ba-Dzwife kyehehe bákasagha bumpughulu bubu mpya mu Yiisu mu kuulu batsyiri nde mukakana wu lipfu.

⁶⁰ Lo bo ka bábagha o, ngu okala ti bampughulu baba mpya balagha báyamonono. N̄a masini, babaghala buolo bágyi

⁶¹ ya bályele ti: «Mbwuru wu aakalyele ti: “Me nkughu otsala nzo a Nzaami ya ofiritwu yo mu bitsughu bitere.”»

⁶² Mukwuru a bangaa ba nzaami bu atemene, ályele kundaa nde ti: «We ka li a ndagha yi aabvuhulu mu bumpughulu bu baara ba mu we o?»

⁶³ Lo Yiisu ka átsughu ndagha o. Mukwuru a bangaa ba nzaami ályele kundaa nde ti: «Mu nkwumu a Nzaami wu a mweē, me nduomo we mu olyele bihi, kala ti we me Kriste, Mwana a Nzaami.»

⁶⁴ Yiisu ábvuhulu kundaa nde ti: «Weme lyele yo. Lo me ndyele kundaa be ti, obaana matala ma, be sa limono *Mwana a mbwuru* ábwi nsini n̄a ngo-kwogho ki Nga-a-lileene ya *li mu okagya mu bidzi mu mayulu.*»

⁶⁵ Mu obo mfumu a bangaa ba nzaami ákaghala binkuru bi ndeme ya ályele ti: «Nde aatsaala Nzaami. Mu emakye bihi liifirikala a nzala

a bampughulu? Be liigyughu bu aatsaala nde Nzaami.

⁶⁶ Be bunu litsimi?» Bo bábvuhulu ti: «Nde faana okpa!»

⁶⁷ Onjo bo bábwi otswulu nde manteẽ ku edzili ya okaha nde minkono, bana bákaha nde mam-pala,

⁶⁸ ya bákalyele ti: «Kriste, bighili, nande mu bihi aakaha we?»

Piere tunu Yiisu

(Mar 14.66-72; Luk 22.56-62; Dzã 18.15,25-27)

⁶⁹ Piere áli ábwi nsini ku mbala a nzo. Musala mumõ wu mukaha bu ayasele kundaa nde, ályele ti: «Wehe si aakakala ya Yiisu wu a ku Ngalile!»

⁷⁰ Lo nde átunu ña nkulu a baara bwohono, ya ályele ti: «Me ka nsoolo ndagha yi dzyi we olyele o.»

⁷¹ Ña nseele, Piere bu ákagye ku bele a edzughubu ki enene ki ekagha, musala mukimi wu mukaha ámono nde ya ályele kundaa ba báli onjo ti: «Mbwuru wu aakakala ya Yiisu musi Nadzarete.»

⁷² Nde áfiritunu ya ályele ti: «Me ndaba mukihi, me ka nsoolo mbwuru wu o!»

⁷³ Ña mbihi a edzighi ebi, ba báli onjo báyasele ya bályele kundaa Piere ti: «Mu enganma, wehe si li wu a ndaa bo! Mu kuulu mbiili a we yi li mu ofwunu we.»

⁷⁴ Mu obo nde álaba mukihi mu okabiili mpwoho ti: «Me ka nsoolo mbwuru wu o!» Ya ñaana onjo mulumu a nsuhu ákuolo.

⁷⁵ Ya Piere álibili mweẽ mu ndagha yi ólyele nde Yiisu: «Nsomo mulumu a nsuhu akuolo, we sa

tunu me mansa matere.» Ya nde bu apala ku mbala, ábuulu mukaba a elili kii minyoõ.

27

Yiisu ña nkulu a Pilate

(Mar 15.1; Luk 23.1-2; Dzã 18.28-32)

¹ Bwihi bu buki, bakwuru ba bangaa ba nzaami bwohono ya bakulu ba ekaana ki ba-Dzwife bákuru mfwunu yi otsyiri Yiisu mukakana wu lipfu.

² Ya bu bakuru nde misyi, bábiri nde ya bágwi nde ña myaã mi Pilate, mfumu a etsulu e nsie.

Yuda dzwi nyuru a nde

(Big 1.18-19)

³ Yuda wu aatyeghe Yiisu, bu amono ti baatsyiri nde mukakana wu lipfu, ásobo bitsimi, ya áyibvurulu makwumu matere ma mipara (30) mimi bisyeẽ kundaa bakwuru ba bangaa ba nzaami ya bakulu ba ekaana ki ba-Dzwife,

⁴ ya ályele kundaa bo ti: «Me aansí masumu bu aatyeghe makili mama wu gwene osoolo ndagha!» Lo bo bályele ti: «Ka mitala bihi o! Oyo ndagha a we!»

⁵ Nde ábulutsili mipara mimi bisyeẽ mu nzo a Nzaami, ápala ya áyilele swe.

⁶ Bakwuru ba bangaa ba nzaami bágwolo mipara mimi bisyeẽ mimye ya bályele ti: «Ka oli a muswa mu olo mye mu baakabunu nzi a nzo a Nzaami o, mu kuulu mye mili mutala a makili*.»

* **27:6 27.6** Ntala a makili bwunu we ntala a laama li mbwuru.

⁷ Bo bákuru mfwunu, báswumu nseghe a wu aakagyighili bilogho bi bámyene mu mubweẽ mu mipara mimye mu kuulu yikala mampyeme ma banzyi.

⁸ Me mu obo tee mu matala ma, baakata nseghe oyo «nseghe a makili».

⁹ Obo me bu ókeele mi áli ólyele mubighili Dzeremi: «*Bo baagwolo makwumu matere (30) ma mipara mimi bisyeẽ, munde me mutala wu ólyele baana ba Isaraye, wu bákehe mu mbwuru munde,*

¹⁰ ya bo baagwi mipara mimye mu nseghe a wu wu aakagyighili bilogho bi bámyene mu mubweẽ, *bwunu a bu ógwi me Mfumu litumu*[†].»

Pilate gwi Yiisu bifwulu

(Mar 15.2-5; Luk 23.3-5; Dzã 18.33-38)

¹¹ Bábirí Yiisu ɲa nkulu a Mfumu a etsulu e nsie. Nde áfwulu nde ti: «Bunu, we me mukogho a ba-Dzwife?» Yiisu ályele ti: «Weme lyele yo.»

¹² Lo mu matala ma ókafwulu nde bakwuru ba bangaa ba nzaami ya bakulu ba ekaana ki ba-Dzwife, nde ka ábvuhulu ndagha o.

¹³ Mu obo, Pilate ályele kundaa nde ti: «Bunu, we ka li mu okagyughu mandagha mwohono ma bali mu okakwighi we o?»

¹⁴ Lo Yiisu ka ábvuhulu nde mvuru o, ya mfumu a etsulu e nsie ákinjimi ku olagha.

Bakehe Yiisu mukakana wu lipfu

(Mar 15.6-15; Luk 23.13-25; Dzã 18.39–19.16)

[†] **27:10 27.10** Bu babvughu Dza 11.12-13 ya Dze 18.2-3; 19.1-2; 32.6-15, oɲo babagha ndagha oyo.

¹⁵ Mu nswe kyiri kii Paake, mfumu a etsulu e nsie ekye áli a epfu kii okapaha mbwuru a boloko mumõ, wu odzyi mpwumu a baara.

¹⁶ Mu matala mamõ óli a mbwuru a boloko mumõ wu a nsia, nkwumu a nde [Yiisu] Barabase‡.

¹⁷ Pilate áfwulu kundaa mpwumu yi áabvununu ti: «Nande be lidzyi ti me nyaã, [Yiisu] Barabase, bwunu we Yiisu wu baakata Kriste?»

¹⁸ Mu kuulu, nde ásoolo ti bo baatyeghe Yiisu mu nkooro a ebaa e bo.

¹⁹ Mu matala ma ábwi nde nsini ña epehe kii muyala, mukala a Pilate ágweghe mbwuru alyele kundaa nde ti: «Ka somo mu ndagha a mbwuru wu bunsumu wu o! Mu kuulu lolo mu nzolo me aamono mpara alagha mu nkooro a nde.»

²⁰ Bakwuru ba bangaa ba nzaami ya bakulu ba ekaana ki ba-Dzwife bápeene a mampwumu ma baara mu kuulu mo maluomo Barabase ya badzwa Yiisu.

²¹ Bu afiribili, mfumu a etsulu e nsie áfwulu kundaa bo ti: «Mu bo buolo, be na lidzyi me nyaã?» Bo bábvuhulu ti: «Barabase!»

²² Pilate áfwulu kundaa bo ti: «Emake me aansa mu Yiisu, wu baakata ti Kriste?» Bo bwohono bábvuhulu ti: «Bakomo nde ña kuruwa!»

²³ Nde áfirifwulu bo ti: «Nde nsa bubi aagyighili?» Lo bo bákakehe bingubu mu mpini ya bákalyele ti: «Bakomo nde ña kuruwa!»

(*Mar 15.15; Luk 23.24-25; Dzã 19.16*)

²⁴ Pilate bu amono ti nswe yi aalyele nde ka yifirikala a mupfunu o, lo mpaatsala yiikabvulu,

‡ 27:16 27:16 mikaana milagha mi mikulu mídzimini osono nkwumu yi a Yiisu.

nde ágwolo madza ya áswagha myaã ña nkulu a mpwumu a baara, ya ályele ti: «Me ka nsoolo ndagha mu makili ma o. Mitala beme!»

²⁵ Baara bwohono bábvuhulu ti: «Nyaã makili ma nde mabwa ña yulu a bihi, ya ña yulu a baana ba bihi!»

²⁶ Oño, nde ányaã bo Barabase. Lo Yiisu, bu bamana okaha nde nswa-nswa, Pilate ágwi nde ña myaã mi bo mu kuulu bakomo nde ña kuruwa.

*Bambumbulu basi Yiisu munkulu
(Mar 15.16-20; Luk 23.11; Dzã 19.2-3)*

²⁷ Mpwumu yohono yi a bambumbulu ba mfumu a etsulu e nsie yíbiri Yiisu mu nzo a emfumu, ya yídzyi nde.

²⁸ Bo bádzwulu nde binkuru ya bálaha nde enkuru ki ela kii mungala.

²⁹ Bátwu ebara kii mansiene ya bákwichi nde kye ña yulu a mutswi. Bágwí nde edzyara akwara ña ngo-kwogho. Bu bakunu mabuo ña nkulu a nde, bábwí osa nde munkulu ya bákalyele ti: «Mukogho a ba-Dzwífe, mboro a we!»

³⁰ Bo bátswulu nde manteẽ, bágwolo edzyara ya bábwí okakaha nde ña mutswi.

³¹ Ya bu bamana osa nde munsensehẽ, bádzwulu nde enkuru ki ela ya báfirilaha nde binkuru bi ndeme. Ya bábirí nde mu okomo nde ña yulu a kuruwa.

*Bakomo Yiisu ña yulu a kuruwa
(Mar 15.21-32; Luk 23.26-43; Dzã 19.17-27)*

³² Bo bu bapala mu bvulu, bámono mbwuru mumõ wu a ku Sirene, nkwumu a nde Simõ, bákwichi nde kuruwa li Yiisu obiri.

³³ Bo báto ɲa ebini ki baakata ti, «Ngolongota», mbaala ti, «etye ki mutswi a mbwuru».

³⁴ Bámíhi nde mala ma bviini li bábvughu ya nsogho-ɲmeẽ. Bu alyini lo, nde ábihi oɲma.

³⁵ Bu bamana okomo nde ɲa yulu a kuruwa, *bákaba binkuru bi nde mu empa kiili nga-a-bwehe me wu aagwolo.*

³⁶ Ya bo bábwi nsini mu okakebe nde oɲo.

³⁷ Bo bátwulu liyu-yulu li mutswi a nde ebili ki lipfu li nde, básono ti: «Wu me Yiisu, mukogho a ba-Dzwife.»

³⁸ Mu matala maana mamó, bambumbulu bákomo emó ya nde ɲa yulu a makuruwa, bantwumu buolo, mumó ku ngo-kwogho, wu muke ku engbambogho.

³⁹ Baara ba bákáluru bákátughu nde ya bákanyíhi mitswi mi bo,

⁴⁰ ya bákalyele ti: «We wu aatsala nzo yi a ngili ya ofiritwu yo mu bitsughu bitere, bvuwu nyuru a we weme. Kala ti we li Mwana a Nzaami, sughuru ɲa kuruwa!»

⁴¹ Bumó si bakwuru ba bangaa ba nzaami, Baluo-mikyene ya bakulu ba ekaana ki ba-Dzwife, bákasa nde munsensehẽ ya bákalyele ti:

⁴² «Nde aabvwuhu babake, lo ka kughu obvwuhu nyuru a ndeme o! Nde li mukogho a Isarayelee, mu bu nyaã asughuru ɲa kuruwa, ya bihi sa lisa kana mu nde!

⁴³ *Nde ási mukolo a nde mu Nzaami, nyaã Nzaami akwulu nde mu matala ma, kala ti nde*

dzyi nde, mu kuulu nde aalyele ti: “Me ndi Mwana a Nzaami!”»

⁴⁴ Bantwumu ba bákomo ña yulu a makuruwa emõ ya nde bákatughu nde bwunu obo si.

Lipfu li Yiisu

(Mar 15.33-41; Luk 23.44-49; Dzã 19.28-30)

⁴⁵ Obaana mu tala lili embehe tee mu tala lili matere, mpyibi yíbwi ña yulu a nsie yohono.

⁴⁶ Ku bele a tala lili matere, Yiisu ásyama mu likyi lili mpini ya ályele ti:

«*Eli, Eli, lema sabakatani?*»

Mbaala ti: «*Nzaami a me, Nzaami a me, mu emakye we aanyaghala me?*»

⁴⁷ Mu ba báli oño, bu bagyughu, bana bályele ti: «*Ligyughu, nde li mu ota Eli mbili!*»

⁴⁸ Ñaana oño, mumõ mu bo ábara áyigwolo nsana, átsubu mu bviini lili ñeë, ya bu akuru yo mu edzyara, ágwi nde aña.

⁴⁹ Lo babake bályele ti: «*Makebe, litswe limono kala ti Eli sa ayabvwuhu nde!*»

⁵⁰ Lo Yiisu áfirisyama mu likyi lili mpini, ya átaghaba.

⁵¹ Ya mono, nkpaña eko yi aakakabala nzo yi a ngili yíkagha mu bipa byele, obaana ku yulu tee ku nsie. Nsie yínyinji, mameë ma manene mábaghala.

⁵² Mampyeme mádzubulu, baara balagha baba ngili baala áli bákpi, básighili mu lipfu.

⁵³ Bo bápala mu mampyeme, ya ña mbihi a osighili o Yiisu mu lipfu, bo básomo mu bvulu lili ngili ya bámonono kundaa baara balagha.

⁵⁴ Mukwuru a bambumbulu nkama (100) ya ba bákakebe Yiisu, bu bamono bu ónyiŋi nsie ya mi míbwi, bábagha nzalamweē yi alagha ya bályele ti: «Ngaŋma, wu ali Mwana a Nzaami!»

Badzyighi Yiisu

(Mar 15.42-47; Luk 23.50-56; Dzã 19.38-42)

⁵⁵ Oŋo óli a bakaha balagha ba bákatala la-la. Bo bákanaama Yiisu obaana ku Ngalile§, ya bákabulusalala nde.

⁵⁶ Mu bo oli a Mari musi Mangadala, Mari ngughu a Dzake ya Dzodzefe, ya ngughu a baana ba Nzebede.

⁵⁷ Nkonkolo bu yito, baghala mumō wu esini wu a nkwumu a Dzodzefe, musi Arimate, ágyi. Ndehe si áli enduono e Yiisu.

⁵⁸ Nde áyimono Pilate ya áluomo nde nyuru a Yiisu. Pilate ágwi litumu ti bagwa nde yo.

⁵⁹ Dzodzefe bu agwolo nyuru a Yiisu, ádzyi yo kunsá nkpaŋa yi a lino li linyaghara.

⁶⁰ Nde átwulu yo mu dzunu li ndeme li linyaghara li átsimi kunsá limeē, ákimini limeē li linene mu okyi dzunu ya ágyene o nde.

⁶¹ Mari musi Mangadala ya Mari wu muke áli bábwi nsini ŋa nkulu a mpyeme.

Batwulu bambumbulu mu okebe mpyeme a Yiisu

⁶² Etsughu ki eluono áli etsughu ki ékanama etsughu ki baakabwehē sabate. Bakwuru ba bangaa ba nzaami ya ba-Faridzyē bágyene mu emvuŋunu kundaa Pilate,

§ 27:55 27.55 Obaana mu matala ma óbaana Yiisu esala, bakaha babo bákabulunama nde.

⁶³ bo bályele ti: «Mfumu, bihi liilibili mweẽ ti nga-a-mpya munde, ɲa aali nde mweẽ, nde ályele ti: “ɲa mbihi a bitsughu bitere, me sa nsighili mu lipfu.”

⁶⁴ Mu obo, gwa litumu mu kuulu bakebe mpyeme tee mu bitsughu bitere, mfangolo binduono bi nde biyaturu nde ya bilyele kundaa baara ti: “Aasighili ɲa kara li ba bákpi!” Ya mpya yi masini oyo sa yibvulu yi a nsomo.»

⁶⁵ Pilate ályele kundaa bo ti: «Be lili a babo ba baakakebe. Ligye likebe mpyeme bwunu a bu lidzyi be.»

⁶⁶ Ya bo bu bagyene, bákebe mpyeme, bu bakuru yo mu limeẽ ya basi yo bilyimi, bátwulu ba baakakebe oɲo.

28

Yiisu sighili mu lipfu

(Mar 16.1-10; Luk 24.1-12; Dzã 20.1-10)

¹ ɲa mbihi a etsughu kii sabate, mu epala-epala kii etsughu kii nsomo mu limiɲi, Mari musi Mangadala ya Mari wu muke, báyitala mpyeme.

² Ya mono, nsie yínyĩ ku olagha. Ngye-yulu a Mfumu áfi ku yulu, áyakimini limeẽ ya ábwi nsini ɲa yulu a lo.

³ Nde ákasehene ti anga musehene a nzele ya enkuru e nde éli kii buɲu lili nkara olagha.

⁴ Bambumbulu ba bákakebe mpyeme bu ba-mono nde, bábwi oteghere mu nzalamweẽ ya bákala ti anga bibyimi.

⁵ Lo ngye-yulu átsughu ndagha ya ályele kundaa bakaha ti: «Be ka likala a nzalamweẽ o, mu

kuulu me nsoolo ti be Yiisu wu baakomo lili mu okabulusagha.

⁶ Nde ka li ɲa o, mu kuulu nde aasighili mu lipfu bwunu a bu áli ályele nde. Ligya, limono ebiní ki ali baalaha nde.

⁷ Ya lisa maswa liyilyele kundaa binduono ti: “Nde aasighili ɲa kara li ba bákpi, ya mono, nde aatswama ku Ngalile, oko be liimono nde.” Limono, me ndyele be yo.»

⁸ Bo bámara ku mpyeme mu maswa, ya nza-lamweē ya esee ki elagha, bábara ntyini báyilyele nsia kundaa binduono.

⁹ Lo mono, Yiisu áyibwana a bo ya ályele kundaa bo ti: «Mboro a be!» Bo báyasele kundaa nde, bákunu mabuo ɲa nsie ɲa nkulu a nde ya bákware myili mi nde.

¹⁰ Oɲo Yiisu ályele kundaa bo ti: «Ka likala a nzalamweē o. Ligye, liyitwoho nsia kundaa banaana ya bambwee ba me, bagye ku Ngalile, me oko bo baamono me.»

Mi ólyele bambumbulu

¹¹ Bo áli nkini mu nzili, mono, ndaama mu bankyele bágyi ku bvulu ya bátwoho nsia yi a mandagha mwohono ma mábwi kundaa bakwuru ba bangaa ba nzaami.

¹² Bakwuru ba bangaa ba nzaami ya bakulu baba ekaana ki ba-Dzwife bábvuɲunu ya bákuru mfwunu. Bu bagwi mutala a nzi wu afaana kundaa bambumbulu

¹³ bátswi bo mukele wu: «Liyilyele bu: “Binduono bi nde biigyí mu mpyibi ya biituru nde, mu matala ma liikagyonomo bihi.”

¹⁴ Ya kala ti mfumu a etsulu e nsie gyughu ndagha yi, bihi akala liibwihi [nde] mukolo, bihi liisa ti be linyaã okala mu mpara.»

¹⁵ Bo bágwolo nzi ya bágyighili bwunu a bu báluo bo. Ndagha oyo yítsanama kundaa ba-Dzwife tee mu etsughu kii lolo.

Yiisu moŋono kundaa binduono

(Mar 16.14-18; Luk 24.36-49; Dzã 20.19-23; Big 1.6-8)

¹⁶ Binduono kwumu ya emõ (11) bígyene ku Ngalile, ku munguo wu áli ólyele bo Yiisu.

¹⁷ Bo bu bamono nde, bákunu mabuo ŋa nsie ŋa nkulu a nde, lo babake báli a mikeme.

¹⁸ Yiisu bu ayasele, ályele kundaa bo ti: «Litumu lwohono bágwi me lo ku yulu ya ŋa yulu a nsie.

¹⁹ Mu obo, bu liigye, lisa ti bikaana byehene bikala binduono bi me, liboghoru bo mu nkwumu yi a Taara, ya yi a Mwana, ya yi a Mufulu a Ngili.

²⁰ Liluo bo bakakebe mandagha mwohono ma aantumu me be. Ya mono, me ndi ya be bitsughu byehene, tee ku masini ma matala.»

Teke Sud-Ouest

Teke-Tyee: Teke Sud-Ouest (New Testament)

copyright © 2024 Wycliffe Bible Translators, Inc.

Language: (Teke-Tyee)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

6f558581-83f7-55dd-acef-3d682f6a705d